

二十四史九通政典類要合編

宋

第三冊

欽定四庫全書

PDG

宋二十五

兵訓練 選補 屯戍 器甲 屯營田 馬政

訓練之制禁軍月奉五百以上皆日習武技三百以下或給役或習技後別募廂兵亦閱習武技號教閱廂軍戍川廣者舊不訓練嘉祐以後稍習焉凡諸日習之法以鼓聲爲節騎兵五習步兵四習以其坐作進退非施於兩軍相當者然自宋初以來中外諸軍皆用之明道二年樞密使王曠言本廂下軍止給役而未嘗習武技宜取材勇者訓練生補禁軍上可其奏康定元年帝御便殿閱諸軍陣法議者謂諸軍止教坐作進退雖整肅可觀然臨敵難用請自今遣官閱陣畢令解鍙以弓弩射營置弓三等自一石至八斗弩四等自二石八斗至二石五斗以次閱習詔行之陝西河東河北路是歲詔教士不祇帶金革緩急不足以應敵自今諸軍各予鎧甲十馬甲五令迭披帶又命諸軍班聽習雜武技勿輒禁止慶厯元年徙邊兵不教者于內郡俟習武技卽遣戍邊二年諸軍以射親疎爲賞罰中的者免是月諸役仍藉其名關校長則按籍取中多者補樞密直學士楊楷請教騎兵止射九斗至七斗三等弓畫的爲五量去的二十步引滿卽發射中者視量數給錢爲賞騎兵佩劈陣刀訓練時以木桿代之奏可四年詔騎兵帶甲射不能發矢者奪所乘馬與本營藝優士卒韓琦言教射唯事體容及疆弓不習射親不可以臨陣臣至邊嘗定弓弩挽繩硬射規格願行諸軍立賞

肆習歲以春秋二時各一閱諸營先上射親吏卒之數命近臣與殿前馬步軍司閱之其射親入第四至第七等量先給賜入第二等已上及挽強聽硬中格悉引對親閱等數多者其正副指揮使亦第賜金帛詔以所定格班教諸軍四年遣官以陝西陣法分教河北軍士五年密詔益利梓夔路鈐轄司以弓弩習士卒候民間觀聽寢熟即便以短兵日教三十人十日一易知井州明鎬言近臣籍諸營武藝之卒使帶甲試克奇兵外爲三等庶幾主將悉知軍中武技強弱臨敵可用詔頒其法三路范仲淹請以帶甲射一石克奇兵餘自九斗至七斗第爲三等射力及等卽升之詔著爲令六年詔諸軍夏三月毋教弓弩止習短兵又詔以春秋大教弓射一石四斗弩彊三石八斗槍刀手勝二人者立爲武藝出畧格中者本營闕階級卽以次補至和元年詔諸軍選將校武藝鈞以射親爲上韓琦又言奉詔軍士弩彊四石二斗并弓箭槍手應舊規選中者卽給挺補守闕押官然則排連舊制爲虛文矣請三路兵遇春秋大教武技出衆者優給賞物免本營他役候階級闕如舊制選補奏可治平二年詔河北戰卒三十萬一千陝西四十五萬九百并義勇等委總管司訓練毋得冗占

志

太祖皇帝建隆三年十一月講武於近郊六軍之容甚甚

帝每御講武殿親臨教閱其法刻木爲箭鏃裏以氈罽命強者兩兩相射避卽捶之取其不避者又以木挺爲馬搥施韋鞞俾馳騎相擊取其尤勝者各分等級以遷隸之自是師旅皆精銳

太宗太平興國二年將伐太原詔築講武堂於西郊九月大閱上與從官登而觀焉是冬又觀飛山兵射連弩發機石於臺下

帝循太祖舊制親閱武藝御便坐時召上軍觀步射擊刺列爲行伍或召宰相親王臨觀間亦幸殿前班閱馬射行幸池苑亦令諸軍衛士騎射馳盤截柳枝或於庭中令射毛毬溜化五年八月召天武士卒教射於殿庭弓力有至石三斗以引強平射者爲上等艱於引滿者別爲一等其諸淺軟者又爲一等各量其材力而遷隸之至道元年九月又閱禁旅有挽強至一石五斗連三十發而有餘力又令騎兵步兵各數百東西列陣挽強教弩視其進退發矢如一容止中節上曰此殿庭間數百人耳猶兵威可觀況堂堂之陣數萬成列者乎

眞宗咸平二年八月大閱諸軍於東郊其儀最備詔有司擇地於含暉門外之東武村爲廣場乙丑夜三鼓殿前侍衛馬步軍二十萬分出諸門丙寅上乘馬以出示室近臣尚書侍郎御史中丞給諫上將軍節度觀察防禦團練刺史並別駕從賜以窄袍上至行宮諸軍陣於臺前左右相向步騎交屬諸班衛士翼侍於臺後有司奏成列上升臺東向召從臣坐而觀之殿前郎指揮使王超執方旗以節進退又於兩陣中起候臺相望使人執旗以應之初舉黃旗則諸軍旅拜舉赤旗則騎進舉青旗則步進每旗動則鼓作鼓作則士進皆三挑而後退次舉白旗則諸軍復再拜呼萬歲有司奏陣堅而整士勇而厲欲再舉上曰可止矣遂舉黑旗以振旅軍於左者畧右陣以還由臺前出西北隅

軍於右者畧左陣以還由臺前出西南隅以歸御東華門閱諸軍還營翊日近臣諸軍將校以內職皆賜飲其後又幸飛山教場觀發機石連弩及便坐日閱召募新軍時令習戰陣之狀率如兩朝舊規其事悉見兵志

熙甯四年始詔畿內保丁肄習武事歲農隙所隸官期日於要便村都試騎步射並以射中親疏遠近爲等騎射校其用馬有餘藝而願試者聽之第一等保明以聞引見於庭天子親閱視之命以官第二等免當年春夫一月馬藁四十役錢二千本戶無可免或所免不及聽移他戶而受其直第三等四等視此有差卽藝未精願來閱試者聽

五年詔以涇原路蔡挺衙教陣隊於崇政殿引見仍頒行於諸路

其法五伍爲隊爲陣陣橫列騎兵二隊亦五伍列之其出皆以鼓爲節束草象人而射焉中則有賞馬步皆前三行槍刀後二行弓弩附隊以虎蹲弩床子弩各一射與擊刺迭出皆聞金卽退預籍人馬之強者隱於隊中遇可用則別出爲奇帝以其點閱周悉常有出野之備故令頒行

六年帝初置內教法旬一御便殿閱武技程其能否而勸沮之

元豐元年詔立在京秋校試諸軍技藝格第爲上中下三等步射六發而三中爲一等二中爲二等一中爲三等馬射五發驟馬直射三矢背射二矢中數第如步射法弩射自上中至二中床子弩及砲自三中至一中爲及等並賞銀有差槍刀并標排手角勝負計所勝第賞其弓弩隊落或縱矢不

及棚或挽弓破體或局而不張或矢不滿或弩蹶不上牙或獲不發或身倒足落並為不合格卽射已中賞餘箭不合格者降一等無可降者罷之十一月京西將劉元上言馬軍教習不成請降補步軍又不成降廂軍詔下令諸軍約一季不能學者如所請降之

二年立府界集教大保長法以昭宣使入內侍省副都知王中正東上閣門使狄詒兼提舉府界教保甲大保長總二十二縣為教場十一所大保長凡二千八百二十五人每十人一色事藝置教頭一凡禁軍教頭二百七十都教頭三十使臣十弓以八斗九斗一石為三等弩以二石四斗二石七斗三石為二等馬射九斗八斗為一等其材力超拔者為出等當教時月給錢三千日給食官子戎械戰袍又具銀樸酒醪以為賞犒三年大保長藝成乃立團教法以大保長為教頭教保丁焉凡一都保以相近者分為五團卽本團都副保正所居聚教之以大保長藝成者十人衮教五日一周之五分其丁以其一為騎二為弓三為弩府界法成乃推之三路各置文武官一人提舉

三年內教法格并圖其象頒行之步射執弓發矢連手舉足移步及馬射馬使蕃槍馬上野戰格關步用劍排皆有法象凡千餘言使軍士習誦焉

趙高言今欲大閱漢蕃陣隊且以萬二千五百人為法旌旗麾幟各隨方色戰國時大將之旗以龜為飾蓋取前列先知之義今中亦宜以龜為號其八隊旗別繪天地風雲龍虎鳥蛇天地則狀其方圓風雲則狀其飛揚熊虎則狀其猛厲鳥蛇則狀其翔盤之勢以備大閱而樞密院以為陣

隊旗號若繪八物慮士衆難辨且其間亦有無形可繪者遂詔大閱旗幟上依方色仍畢其刑制令勿雜而已

詔樞密院曰唐李靖兵法世無全書雜見通典離析譌舛又官號物名與今稱謂不同武人將佐多不能通其意令樞密院檢詳官與王震會啟王白郭逢原等校正分類解釋令今可行

帝諭近臣曰黃帝始置八陣法敗蚩尤於涿鹿諸葛亮造八陣圖於魚復平沙之上累石爲八行晉桓溫見之曰常山蛇勢也文武皆莫能識之此卽九軍陣法也後至隋韓擒虎明其法以授甥李靖靖以時遇久亂將臣通曉其法者多故造六花陣以變九軍法使世人不能曉大抵八陣卽九軍九軍者方陣也六花陣卽七軍七軍者圓陣也蓋陣以圓爲體方陣者內圓而外方圓陣卽內外俱圓矣故以圓物驗之則方以八包一圓以六包一此九軍六花陣大體也六軍者左右虞候軍各一爲二虞候軍左右廂各二爲四廂軍與中軍共爲七軍八陣者加前後二軍共爲九軍本朝祖宗以來置殿前馬步軍三帥卽中軍前後軍帥之別名四馬步軍都虞候是爲二虞候軍天武捧日龍神衛四廂是爲四廂軍也中軍帥總制九軍卽殿前都虞候專總中軍一軍之事務是其名實與右九軍及六花陣相符而不少差也今論兵者俱以唐李筌太白陰經中所載陣圖爲法失之遠矣朕嘗覽近日臣僚所獻陣圖皆妄相眩惑無一可取果如此輩之說則兩敵相遇必須遣使豫約戰日擇一寬平之地仍夷阜塞壑誅草伐木如射圃教場方可盡其法耳以理推

之知其不可用也決矣今可約李靖法爲九軍營陣之制然李筌之圖乃營法非陣法也朕採之法酌今之宜曰營曰陣本出於一法而已止曰營行曰陣在奇正言之則營爲正陣爲奇也於是以八月大閱兒軍陣於城南荆家陂已事坼營回軍賜遂等下指揮馬步諸軍銀絹有差

兵考

以上通考

開禧元年六月命諸路安撫司教閱禁軍

名臣奏議曰袁說友上言曰今日之所豫備者莫先於修軍政而軍政之最切者莫大於治軍實夫軍實者武藝軍徒器械是也臣嘗得之於宿將謂軍中如弓弩手如鎗刀手皆有升加等則弩手之高強者則有四石與五石焉其用鐵搭者則加以三斗矣弓手之高強者則有二石五斗焉鎗手之高強者則有五百六百楨者焉刀手之高強者則有格鬪屢勝者焉力愈強則斗力楨力愈高矣必有此武藝則有此升加與之增食錢增衣賜所增多寡視其藝之高下統帥等日試月比每季屬之總領親與審擇從實升加升加既畢卽請增給然後士伍激勸一遇征行莫非強勇之士今江蜀諸屯豈不知此而升加之法百不舉一臣又知其說矣軍中旣無餘力總司復無餘財誠恐升加既多月支必廣既有犒設復添衣賜自度無以辦此不復敢事勸激遂使士卒有勇莫施有力莫見人材沈鬱緩急無用豈不深可惜哉臣愚欲望睿斷行下諸處統帥將弓弩手鎗刀手每日比試籍定斗力石力與楨數格鬪勝數最高強者候至一季取其最高者不限以人數

三  
兵  
日約雅堂藏板



多寡令總領同統帥親與審試不得徇情須從實升加犒設外照格增添請給各具名奏聞諸軍士卒自皆踴躍自奮願以勇力競相呈露一有邊警以此禦敵臣知所向無前矣

續通考  
兵考

### 右訓練

遷補之制自殿前侍衛馬步軍校每遇大禮後各以次遷謂之轉員轉員至軍都指揮使又遷則遙領刺史又遷為廂都指揮使遙領團練使員溢卽從上罷軍職為正團練使刺史之本任或有他州總管鈐轄其老疾若過失者為御前忠佐馬軍都軍頭副軍頭隸軍頭司其黜則為外州馬步軍都指揮使凡軍主關以軍都指揮使遞還餘關以諸軍都虞候指揮使副指揮使行首軍使副行首副兵馬使十將遞遷凡將校一軍營止補十人其廂都指揮使軍都指揮使虞候指揮使營主其一卽闕其三殿前左右班都虞候遙領刺史卽與捧日軍都指揮使通以次遷捧日龍衛廂都指揮使仍遙領團練使若員溢卽為正刺史補外他如諸軍例遞遷凡以列校轉補有司先闕是躍上下馬次出指二十步掩一目試之左右各五占數為見物武藝弓射五斗弩張一石五斗槍刀手稍練負罪不至徒年未高或雖年高而無疾精力不耗者竝取之凡諸軍轉員後取殿前指揮使長入祗候填行門取東西班長入祗候殿侍諸班直充諸班押班諸軍將校者皆親閱前一日命入內都知或押班一人勾當御藥院內侍一人同軍頭引見司較定弓弩斗力標誌之凡弓弩藝等者人占其一至日引見弓弩列置殿前命取一以射軍頭引見司專視喝箭以奏如喝失當卽奏改正入內都知或押

班同勾當御藥院內侍殿上察視如引見司不覺舉亦奏改正槍刀手竭勝負若喝不以實并引見司失覺舉竝劾其罪太平興國九年以上詣崇政殿轉改諸軍將校自軍都指揮使以下員僚以上皆按名籍驗勞績而升陟之凡數日而畢內外感悅乃謂宰臣等曰朕遷轉軍員先取其循謹能御下者武勇次之若不自謹飭則其下不畏憚雖有一夫之勇亦何所用咸平三年五月上御便殿遷補軍職凡十一日而畢自神衛右第二軍都指揮使恩州刺史周訓而下遞遷者千三十一人四年十二月帝謂呂蒙正曰選衆求才誠非易事朕常孜孜詢訪冀有所得向求於軍校中超擢八九人委以方任其間王能魏能頗甚宣力陳興張禹珪亦有能名蒙正等曰才難求備今拔十得五有以見陛下知臣之明也

兵志

容齋洪氏隨筆曰國朝宿衛禁旅遷補之制以歲月功次而遞進者謂之排連大禮後次年殿庭較藝乘輿臨軒曰推塚子其歲滿當去者隨其本資高者以正任團練使刺史補外州總管鈐轄小者得州郡監當留者於軍職內陞補謂之轉員唯推塚之日以疾不趁赴者爲害甚重紹興三十二年四月予以右史午對時將有使事與上介張才甫同飯於皇城司有一老兵幘頭執黑杖子拜辭皇城幹辦官劉知閭泣涕哽噎劉亦爲惻然予問其故兵以杖相示滿其上皆揭記士卒姓名營屯事件云身是天武第一軍都指揮使曾立戰功積官至遙郡團練使今年滿當出職若御前呈試了便得正任使名而爲近郡總管不幸小疾遂遭揀汰只可降移外藩將校在身官位

一切除落方伏事州都監聽管營部轄三十七年動勞一旦如掃薄命不偶至於如是坐者同歎  
息憐之案崇寧四年有詔諸班直嘗備宿衛病告滿尚可療者殿前指揮使補外牢城指揮使蓋

舊法也

通考  
兵考

### 右遷補

屯戍之制凡遣上軍軍頭司引對賜以裝錢代還亦入見犒以飲食簡拔精銳退其癯老至於諸州  
禁廂軍亦皆戍更隸州者曰駐泊戍蜀將校不遣都虞候當行者易管他營凡屯駐將校帶遙郡者  
以客禮見長吏餘如屯駐將校凡駐泊軍若捍禦邊寇卽總管鈐轄共議州長吏等毋預事涉本城  
并屯駐在城兵馬卽知州都監監押同領若州與駐泊事相關者公牒交報凡戍更有程京東西河  
北河東陝西江淮兩浙荆湖川峽廣南東路三年廣南西路二年陝西城砦巡檢并將領下兵半年  
景祐元年詔若聞陝西戍卒多爲大將選置麾下及偏裨臨陣鮮得精銳自隨自今以全軍隸逐將  
毋得選占三年詔廣桂荆潭鼎澧六州各置雄畧一營與歸遠軍更戍領外康定元年頒桐符木契  
傳信牌銅符上篆刻曰某處發兵符下鑄虎豹爲飾而中分之右符伍左旁作虎豹頭四左符五右  
旁爲四竅令可勘合又以篆文相向側刻十千字爲號一甲己二乙庚三丙辛四丁壬五戊癸左符  
刻十千半字右符止刻甲己等兩半字右五符留京師左符降總管鈐轄知州軍官高者掌之凡發  
兵樞密院下符一至五周而復始指揮三百人至五千人用一虎一豹符五千人已上用雙虎豹符

樞密院下符以右符第一爲始內匣中緘印之命使者齎宣同下云下第一符發兵與使者復緘右符以還仍疾置間所在籍下符資次日月及兵數毋得付所司其木契上下題某處契中剖之上三枚中爲魚形題一二三下一枚中刻空魚令可勘合左旁題云左魚台右旁題云右魚合上三枚留總管鈐轄官高者掌之下一枚付諸州軍城砦主掌之總管鈐轄發兵馬百人已上先發上契第一枚貯以韋囊緘印之遣指揮齎牒同往所在驗下契與上契合卽發兵復緘上契以還仍報總管鈐轄其發第二第三契亦如之掌契官籍發契資次日月及兵數以爲驗傳信牌中爲池槽藏筆墨紙今主將掌之每臨陣傳命書紙內牌中持報兵官復書事宜內牌中而還主將密以字爲號驗毋得漏泄軍中事

兵志

葉適論四屯駐大兵曰敢問四大兵者知其爲今之深患乎使其深爲患豈有積五十年之久而不求所以處此者然亦不知而已矣自靖康破壞維揚倉卒海道艱難杭越草創天下遠者命令不通近者橫潰莫制國家無威信以驅使强悍而諸將自誇雄豪劉光世張俊吳玠兄弟韓世忠岳飛各以成軍雄視海內其玩寇養尊無若劉光世其任數避事無若張俊當是時屢稍惟其所賦功動惟其所奏將版之祿多於兵卒之數朝廷以轉運使主餽餉隨意誅剝無復顧惜志意盛滿仇疾互生而上下同以爲患矣及張俊收光世兵柄制取無策呂祉以疎俊趣之二旦殺帥卷甲而遁其後秦檜慮不及遠急於求和以屈辱爲安者蓋憂諸將之兵未易收浸成疽贅則非

特北方不可取而南方亦未易定也故約諸軍支遣之數分天下之財特命朝臣以總領之以爲  
喉舌出納之要諸將之兵盡隸御前將帥雖出於軍中而易置皆由於人主以示臂指相使之勢  
向之大將或殺或廢傷息俟命而後江左得少安故知其爲深患若此而已雖然以秦檜之慮不  
及遠也不止於屈辱爲安而直以今之所措置者爲大功疲盡南方之財力以養此四大兵端端  
然常有不足之患檜徒坐視不恤也檜久於其位老疾而死後來者習見而不復知以爲當然故  
朝廷以四大兵爲命而困民財四都副統制因之而侵刻兵食內臣貴倖因之而握制將權盡弊  
相承無甚於此而况不戰既久老成消耗新補情偷堪戰之兵十無四五氣勢悞弱加以役使回  
易交跋債負家小日增生養不足怨嗟嗷嗷聞於中外昔祖宗竭天下之財以養天下之兵固前  
世之所無有而今日竭南方之財以養四屯駐之兵又祖宗之所無有也夫以地言之則北爲重  
以財言之則南爲多運吾之多財兵強士飽事力雄富以此取地於北不必智者而後知其可爲  
也今奈何盡耗於三十萬之疲卒龔五六十年之積弊以爲庸將腐閣賣鬻營貴之地則陛下之  
遠業將安所託乎陛下誠奮然欲大有爲於天下遽不可掩抑之素志以謀夫不同覆載者之深  
讎必自是始使兵制定而減州縣之供餽以蘇息窮民種植基本於是厲其兵使必闕屬其將使  
不懼一再當虜而勝負決矣兵以少而後強財以少而後富其說甚簡其策甚要其行之甚易也

器甲之制其工畧則有南北作坊院有弓弩院諸川皆有作坊皆役工徒而限其常課南北作院歲造塗金脊鐵甲等凡三萬二千弓弩院歲造角弣弓等凡千六百五十餘萬諸州歲造黃樺黑漆弓弩等凡六百二十餘萬又南北作坊及諸州別造兵幕甲袋梭衫等什物以備軍行之用京師所造十日一進謂之旬課上親閱視置五庫以貯之嘗令試牀子弩於郊外矢及七百步又令別造步弩以試戎具精緻犀利近代未有開寶三年五月詔京都士庶之家不得私蓄兵器軍士素能自備技擊之器者寄掌本軍之司俟出征則陳牒以請品官準法聽得署隨身器械時兵部令史馮繼昇等進火箭法命試驗且賜衣物束帛淳化二年申明不得私蓄兵器之禁至道二年二月詔先造光明細鋼甲以給士卒者初無襯裏宜以紬裏之俾損者不磨傷肌體咸平元年六月御前忠佐石歸宋獻木羽弩箭箭裁尺餘而所激甚遠中鎧甲則箝去而鏃存牢不可拔詔增歸宋月奉且補其子爲東西班侍三年四月神騎副兵馬使焦僮獻盤鐵槊重十五斤令僮試之馬上往復如飛命遷本軍使八月神衛水軍隊長唐福獻所製火箭火毬火蒺藜造船務匠項綰等獻海戰船式各賜緡錢先是相國寺僧法山本洛州人彊姓其族百口悉爲戎人所掠至是願還俗隸軍伍以効死力且獻鐵輪撥運重三十三斤首尾有刃爲馬上格戰具詔補外殿直五年知甯化軍劉永錫製手砲以獻詔沿邊造之以充用六年十月給軍中傳信牌其制漆木爲牌長六寸濶三寸腹背刻字而中分之置

鑿柄令可合又穿二竅容筆墨上施紙札每臨陣則分而持之或傳令則署其言而擊軍吏之頸至  
彼合契乃書復命因冀州團練使石普之請也仁宗時天下久不用兵天聖四年詔減諸路歲造兵  
器之半是歲詔作坊造鐵槍一萬五千給秦渭環慶延州鎮戎軍六年詔外器甲久不繕先遣使分  
詣諸路閱視修治之景祐二年罷秦州造輪京師弓弩三年詔廣南民家毋得置博刀犯者并鍛入  
竝以私有禁兵律論先是嶺南爲盜者多持博刀杖罪輕不能禁轉運使以爲言故著是令四年詔  
作坊製槍子槍柵槍各五萬康定元年四月詔江南淮南州軍造紙甲三萬給陝西防城弓手又詔  
河東彊壯習弩者聽自置戶四等以下官給之八月詔陝西製柳木旁牌慶厯元年知州楊偕遣曲  
陽縣主簿楊拯獻龍虎八陣圖及所製神盾劈陣刀手刀鐵連槌鐵簡且言龍虎八陣圖有奇有正  
有進有止遠則射近則擊以刀盾彼蕃騎雖衆見神盾之異必遽奔潰然後以驍騎夾擊無不勝者  
歷代用兵未有經慮及此帝聞於崇政殿降詔獎諭其後言者以爲其器重大緩急難用云二年詔  
鄜延環慶涇原秦鳳路各置都作院賜河北義勇兵弓弩箭材各一百萬四年賜鄜延路總管風羽  
子弩箭三十萬五年詔諸路所儲兵械悉報三司三司歲具須知以聞仍約爲程式預頒之八年詔  
士庶之家所藏兵器非法所許者限一月送官敢匿聽人告捕皇祐元年御崇政殿閱知澧州供備  
庫副使宋守信所獻衝陣無敵流星弩拒馬皮竹牌火鏢石火鋼三刃黑漆順水山字鐵甲野戰拒  
馬刀弩砦脚車衝陣劍輪無敵車大風翎弩箭八種四年河北河東陝西都總管司言郭諮所造獨

轅衝陣無敵流星弩可以備軍陣之用詔弓弩院如樣制之

兵志

王氏揮麈錄承平時揚州郡治之東廡扁鎮屋數間上有建隆元年朱漆金書牌云非緩急不得開宣和元年盜起浙西詔以童貫提師討之道出淮南見之焚香再拜啟視之乃弓弩各千愛護甚至儼然如新貫命弦試之其力比後來過倍而製作精妙不可跂及士卒皆歎服施之於用以致成功此蓋太祖皇帝親征李重進時所留者仰知經武之畧明見於二百年之前聖哉帝也

熙甯六年置軍器監總內外軍器之政置判一人同判一人屬有丞主簿有管當公事先時軍器領於三司至是罷之一總於監凡產材州置都作院凡天下知軍器監利害者聽詣監陳述於是吏民獻器械法式者甚衆是歲又置內弓箭南庫而軍器監奏遣使以利器頒諸路作院爲式焉

時帝欲利戎器而患有司苟簡王秀知帝意奏曰漢宣帝號中興賢主而史官所敘獨以爲技巧工匠精於元成時然則此雖有司之事而上繫朝廷之政方今外禦兩邊之患內虞盜賊之變而天下歲課弓弩甲冑之類入充武庫之積以千萬數乃無一堅好精利實可爲武備者臣嘗觀諸州作院至於兵匠之少而拘市人以備役所作之器但形質具而已矣武庫吏亦唯計其多寡之數藏之未有責其實用者故所積雖多大抵敝惡耳夫爲政如此而猶欲抗威決勝外懾夷狄之強獷內沮姦凶之竊發臣愚未見其可也臣私計其便莫若更制法度斂數州之作而聚以爲一處若今錢監之比每監擇知工事之臣使專於其職且募天下之良工散爲匠師而朝廷內置工



官以總制其事察其精蘊而賞罰之則人人務勝不加責而皆精矣聞今武庫太祖時所爲弓尚有可弦如新者而近世所造往往不可用有以見法禁之張弛異也昔者垂爲共工而歷代資其竹矢然則所以爲至治此其一事也帝訥秀說

時軍器監製器下一材用滋耗於是詔下以常制選官馳往州縣根牛皮角筋能令數羨次第加獎是歲始造箭曰狼牙箭鴨嘴箭出尖四楞箭一插刃鑿子箭凡四色推行之

以上通考兵考

宋理宗淳祐二年詔淮西制置大使司出十七界楮幣一萬米二萬斛令安豐軍修武備

先是高宗紹興三十二年詔江東安撫司造木弩五千箭五十萬隆興元年御降木羽弩箭式每

路依製箭百萬孝宗淳熙九年衢州守臣製到木鶴箭弩二千箭十萬又河北京西造納無羽箭

帝曰箭不用羽可謂精巧其屋藏之淳熙十五年工部侍郎李昌圖言弓矢之利貴於便疾神臂

弓斗力及遠屢獲其用後又造神勁弓及遠雖在神臂弓上軍中多言其發遲每神臂三矢而神

勁方能一發若臨敵之際便捷反出神臂下帝曰平原曠野宜用神勁弓西蜀崇山峻嶺未知孰

利詔金州都統司詳議以聞既而都統制吳挺奏神勁弓并彈子頭箭諸軍用之誠便疾神臂不

及也詔從其便楚州兵馬鈐轄言弩之力勁者三十石次者十五石矢之鏃狀若鋏所發何啻數

百步洞穿數人江上諸軍有弩式皆廢不修詔兩淮荆襄沿邊城守各製二十枝御前軍器所亦

如之紹熙而後日造器械數目山積至理宗開慶元年壽春府造鹽筒木弩與常弩明牙發不同

箭置筒內甚穩尤便夜中施發又造突火槍以鉅竹爲筒內安子窠如燒放炮絕然後子窠發出如砲聲遠及百五十餘步

度宗咸淳九年六月京湖制置司請給器械詔內軍器庫選犀利者賜之仍增錢百萬備修繕

沿邊州郡因舊式製回回砲有觸類巧思別置砲遠出其上且爲破砲之策尤奇其法用稻穰草成堅索條圍四寸長三十四尺每二十條爲束別以麻索繫一頭於樓後柱搭過樓下垂至地楸梁垂四層或五層周比樓屋沃以泥漿火箭火砲不能侵砲石雖百鈞無所施矣且輕便不費財

力名曰護陣籬索是時兵紀不振獨器甲視舊制益詳

以上續通考兵考

### 右器甲

景德四年兵費浸廣言屯營田者輒詔邊臣經度行之順安軍兵馬都監馬濟請於靖戎軍東壘飽河開渠入順安威虜二軍置水陸營田於其側命莫州部署石普護其役踰年而畢知保州趙彬復奏決鷄距泉自州西至蒲城縣分徐河水南流注運渠廣置水陸屯田詔駐泊都監王昭遜共成之自是定州亦置屯田五年罷襄州營田下務六年耿望又請於唐州緒陽陂置務如襄州歲種七十餘頃方城縣令佐掌之調夫耘耨景德初從京西轉運使張巽之請詔止役務兵二年令緣邊有屯營田州軍長吏並兼制置諸營田屯田事務兼使者如故大中祥符九年改定保州順安軍營田務爲屯田務凡九州軍皆遣官監務置吏屬淮南兩浙舊皆有屯田後多賦民而收其租第存其名在

河北者雖有其實而歲入無幾利在蓄水以限戎馬而已天禧末諸州屯田總四千二百餘頃河北歲收二萬九千四百餘石而保州最多逾其半焉襄唐二州營田既廢景德中轉運使許遵復之初畝望借種田人牛及調夫耨穫歲入甚廣後張異改其法募水戶分耕至述又參以兵夫久之無大利天聖四年遣尚書屯田員外郎劉漢傑往視漢傑言二州營田自復至今襄州得穀三十三萬餘石爲緡錢九萬餘唐州得穀六萬餘石爲緡錢二萬餘所給吏兵俸廩官牛雜費襄州十三萬餘緡唐州四萬餘緡得不補失詔廢以給貧民頃收半稅其後陝西用兵詔轉運司度隙地置營田以助邊計又假同州沙苑監牧地爲營田而知承興軍范雍括諸郡牛頗煩擾未幾遂罷石正言田況言鎮戎原渭地方數百里舊皆民田今無復農事可卽其地大興營田以保捷兵不習戰者分耕五百人爲一堡三兩堡置營田官一領之播種田園農隙則習武事疏奏不用後乃命三司戶部副使夏安期等議並近置屯田迄不能成治平二年河北屯田三百六十七頃得穀二萬五千四百六十八石熙寧初以內侍押班李若愚同提點制置河北屯田事三年王韶言渭原城而下至秦州成紀旁河五六十里良田不耕者無慮萬頃治千頃歲可得三十萬斛知秦州李師中論韶指極邊見招弓箭手地恐秦州益多事詔遣王克臣等按視復奏與師中同再下沈起起奏不見韶所指何地雖實有之恐召人耕種西蕃驚疑侍御史謝景溫言聞沈起妄指甘谷城弓箭手地以塞韶妄而竇舜卿奏實止有關田一項四十三畝中書言起未嘗指甘谷城地以實韶奏而師中前在秦州與韶更相

論奏互有曲直詔遂以妄指閒田自著作佐郎責保平軍節度推官師中亦落待制其後韓縝知秦州乃言實有古渭砦弓箭手未請空地四千餘頃遂復詔故官從其所請行之明年河北屯田司奏豐歲屯田入不償費於是詔罷緣邊水陸屯田務募民租佃收其兵爲州廂軍時陝西曠土多未耕屯戍不可撤遠方有輸送之勤知延州趙高請募民耕以紓朝廷憂詔下其事經畧安撫使郭遠言懷靈砦所得地百里以募弓箭手無閒田高又言之遂括地得萬五千餘頃募漢蕃兵幾五千人爲八指揮詔遷高官賜金帛而熙州王詔又請以河州蕃部近城川地招弓箭手以山坡地招蕃兵弓箭手每砦五指揮以二百五十人爲額人給地一頃蕃官二頃大蕃官三頃熙河多良田七年詔委提點秦鳳路刑獄鄭民憲興營田許奏群官屬以集事樞密使吳克上疏曰今之屯田誠未易行古者一夫百畝又受田十畝爲公田莫若因弓箭手倣古助田法行之熙河四州田無慮萬五千頃十分取一以爲公田大約中歲畝一石則公田所得十五萬石官無屯營牛具廩給之費借用衆力而民不勞大荒不收而官無所損省轉輸平糴價如是者其便有六而提點刑獄鄭民憲言祖宗時屯營田皆置務屯田以兵營田以民固有異制然襄州營田旣調夫矣又取鄰州之兵是營田不獨以民也邊州營屯不限兵民皆取給用是屯田不獨以兵也至於招弓箭手不盡之地復以募民則兵民參錯固無異也而前後施行或侵占民田或差借耨夫或諸郡括牛或兵民雜耕或諸州廂軍不習耕種不能水土頗致煩擾至於廢之所入不償其費遂又報罷惟因弓箭手爲助田法一夫受田

百畝別以十畝爲公田俾之自備種糧功力歲畝收一石水旱三分除一官無廩給之費民有耕鑿之利若可以爲便然弓箭手之招至未安其業而種糧無所仰給又責其惜力於公田慮人心易搖乞候稍稔推行九年詔熙河弓箭手耕種不及之田經畧安撫司點廂軍田之官置牛具農器人一頃歲終參較弓箭手廂軍所種優劣爲賞罰弓箭手逃地并營田召佃租課許就近於本城皆輸納仍免折變支移

食貨志

寧宗嘉定三年五月經理兩淮屯田

國子司業劉燡接伴金使于盱眙軍還言兩淮之地藩蔽江南干戈盜賊之後宜加經理必于招集流散之中就爲足食足兵之計淮東地平博膏腴有陂澤水泉之利而荒蕪實多其民勁悍勇敢習邊鄙戰鬪之事而安集者少誠能經畫郊野招集散亡約頃畝以授田使毋廣占拋荒之患列溝洫以儲水且備戎馬馳突之虞爲之具田器貨種種相其險易聚爲室廬使相保護聯以什伍教以擊刺使相糾率或鄉爲一團里爲一隊平居則耕有警則守有餘力則戰帝嘉納之後又奏使沿邊之民各自什伍教閱于鄉有急則相救援無事則耕稼自若軍政隱然寓于田里之間此非一時之利也

七年以京西屯田募人耕種

十三年措置四川屯田

初奉寧保定軍節度使吳玠平蜀以軍儲不繼治褒城堰爲屯田民謂不便因漕臣郭大中言約中其數使民自耕而歲入多于屯田孝宗乾道五年三月四川宣撫使鄭剛中撥軍耕種以歲收租米對減成都路對糴米一十二萬石贖軍然兵民雜處村疇爲擾百端數百里外差民保甲教耕有二三年不代者民甚苦之知興元府晁公武欲以三年所收最高一年爲額等第均數召佃放兵及保甲以護邊從之淳熙中游仲鴻知中江縣時關外營田凡萬四千頃畝僅輸七升仲鴻建議請以兵之當汰者授之田存亦籍遲以數年汰者衆耕者多則橫斂一切之賦可次第以減爲大將吳挺所沮而止至是宣撫安丙總領任處厚言紹興十五年諸州共墾田二千六百五十餘頃夏秋輸租一十四萬一千餘石餉所屯將兵罷民和糴爲利甚溥乾道四年以後屯兵歸軍教閱營田付諸州募佃遂致租利陷失驕將豪民乘時占據弊不可悉今豪強移徙田土荒闕正當拘種之秋宜命總領所與宣撫司措置其逃絕之田關內外亦多有之爲數不貲其利不在營田之下乞併括從之其後理宗端平元年十月知大寧監邵潛言昔鄭剛中嘗于蜀關隘雜兵民屯田歲收粟二十餘萬石是後屯田之利既廢糧運之費益增宜詔帥臣縱兵民耕之所收之粟計值以償則總所無轉輸之苦邊關有儲峙之豐戰有餘勇守有餘備矣亦從之

謹案宋史吳玠傳玠與敵對壘十年常苦遠餉勞民益治屯田歲收至十萬斛又調戍兵治褒城廢堰民知灌溉可恃願歸業者數萬家若然則玠之屯田民固甚便之矣志所云與傳異

十五年七月詔江淮荆襄四川制置監司條畫營田來上

司封郎中魏了翁奏曰四川制置司措置利州路營屯田見已置司經理凡在邊鄙莫不踴躍但西邊自惟寇以來原堡多墮地利悉棄以故流人久不復業穀粟自貴兵民交敝今若遽行屯田則宜葺邊堡宜用兵耕而邊堡則諸將慮事謹審欲及冬時伺乘機便乃可修築兵耕則自頃年累減軍額以來以之坐守尚多闕數矧今久戍之餘難復再加役使臣竊謂有屯田有墾田二者相近而不同墾田者何大兵之後田多荒萊如諸路有閒田寺觀有常住皆當廣行招誘使人開墾田可復業則耕穫之實效往往多于屯田惟毋責屯田之虛名而先究墾田之實利則庶幾矣今日所當墾之田如利之西路則皂郊之內湫池諸谷水關之內崖石諸鎮利之東路則洋川之內青崖華陽鳳集之內盤車諸嶺大率昔爲膏腴今成荒棄至于金州近襄亦多有之其田去邊或百里或二三百里有高山大陵之險可據有原堡兵戍之援可恃亦有敵騎從來所不曾至之處若更得土豪之助則指日可成今聞三路土豪有願自備費用自用土人者亦有願略資官司給助者若聽其施功略計所耕可數十頃則明年此時便收地利縱官未立額或量行輪租潛裕兵民使漸食賤粟比之頃歲人苦斛貴官苦糴貴其利害豈不萬萬相絕乎況耕田之民又皆可用之兵不數年間邊食既豐兵丁亦足家自爲守人自爲戰比于倉卒遣兵戍守亦萬不侔若是則雖無屯田之名而有屯田之實無養兵之費而又可潛制驕蹇之兵保蜀之策無大于此

宋史汪綱傳曰綱提舉淮東常平有獻言制司廣買荒田開墾以爲營田綱以爲荒瘠之地不難變而工力水利非久不可棄產欺官良田終不可得耗費公帑開墾難就曷若勸民盡耕閒田則滄溼塞則官爲之助變瘠爲沃使民有餘蓄晁錯入粟之議本朝便糴之法在其中矣制司知其無益乃止

以上續通  
考田賦考

### 右屯營田

國馬之政歷五代浸廢至宋而規制備具自建隆而後其官司之規廐牧之政與夫牧市之利牧地

之數支配之等曰券馬曰省馬曰馬社曰括買沿革盛衰皆可得而考焉凡御馬之等三

入殿祇候  
六五匹別

寫下四匹從  
寫一十四給用之等十有五

日揀中日不得支使日添價日明信日臣僚日諸班日御龍直日捧  
日龍衛日拱聖日驍騎日雲武騎日天武龍猛日配軍日雜吏日馬

羣號之字十有七

日左日右日千日立日水日官日吉日天日  
主日三日日與日來日萬日小日官日退

毛物之種九十有二  
叱檢之別八  
青之別二白

之別一鳥之別五素之別五紫之別六駮之別十一縉白之別六騮之別八  
騮之別六駮之別五騮之別五駮之別八駮跨之別六駮之別三騮之別七其官司之規則太祖承

前代之制初置左右飛龍二院以左右飛龍二使領之太平興國五年改飛龍爲天廐坊雍熙四年

改天廐爲左右騏驎院左右天駟監四左右天廐坊二皆隸焉真宗咸平元年敕置估馬司凡市馬

掌辨其良鷺平其直以分給諸監三年置羣牧使以內臣勾當制置羣牧司京朝官爲判官景德二

年改諸州牧龍坊悉爲監賜名鑄印以給之在外之監十有四大名曰大名洺州曰廣平衛州曰淇

水並分第一第二河南曰洛陽鄭州曰原武同州曰沙苑相州曰安陽澶州曰鎮寧邢州曰安國中



牟日淳澤許州曰單鎮四年以知樞密院陳堯叟爲羣牧制置使又別置羣牧使副都監增判官爲二員凡廐牧之政皆出於羣牧司自騏驥院而下皆聽命焉諸州有牧監知州通判兼領之諸監各置勾當官二員又置左右廂提點又置牧養上下監以養療京城諸坊監病馬又詔左右騏驥院諸坊監官並以三年爲滿如習知馬事願留者羣牧司以聞而徙洩他監焉其廐牧之政則自太祖置養馬務一葺舊務四以爲牧放之地始太平興國四年太宗觀兵于幽得汾晉燕薊之馬四萬二千餘疋內阜充報始分置諸坊牧養之時殿直李諤坐贓監牧許州盜官菽馬多死并主吏斬於市又詔擇豐壤地置牧龍坊八以便牧養淳化二年十二月詔圜人取善馬數十疋於便殿設阜棧教以秣飼且以其法論宰執仍頒于諸軍復以醫馬良方賜近臣嘗從趙守倫之請於諸州牧龍坊畜牧馬萬五千疋逐水草牧放不費芻秣生駒蕃息足資軍用至是守倫復言諸坊牧馬萬疋歲當生駒四千今歲止二千五百典司失職當嚴責罰若馬百疋歲得駒七十則加遷擢諸坊產駒卽籍以聞牧放軍人當募少壯充役並從之眞宗大中祥符元年立牧監賞罰之令外監息馬一歲終以十分爲率死一分以上勾當官罰一月奉餘等第決杖牧倍多而死少者給賞緡有差凡生駒一疋兵校而下賞緡一疋當是時凡內外坊監及諸軍馬凡二十餘萬疋飼馬兵校一萬六千三十八人每歲京坊草六十六萬六千圍麩料六萬二千二百四石鹽油藥糖九萬五千餘斤石諸州軍不預焉左右騏驥六坊監止留馬二千餘疋皆春季出就牧孟冬則別其羸病就棧阜養飼其尚乘之馬唯備

用者在焉

兵志

凡市馬之處河東則府州岢嵐軍陝西則秦渭涇原儀環慶階文州鎮戎軍川峽則益黎茂雅

夔州水康軍皆置務遣官以主之歲得五千餘匹以布帛茶物物準其直

舊運銅錢給之太平興國八年有司言戎人得

錢悉銷鑄爲器乃定此制其後諸州亦畜馬給直漸高務增數以爲課積景德中戎事已息因詔條約之

招馬之處秦渭階文之吐蕃回紇麟府之黨

項豐州之藏才族環州之白馬鼻家保家名市族洎涇儀延鄜火山保安軍唐龍鎮制勝關之諸

蕃每歲皆給以空名敕書委沿邊長吏擇牙吏入蕃招募給券詣京師至則估馬司定其直自三

十五十至千凡二十三等舊選三歲至十七歲者景德二年詔止市四歲至十三歲者餘聽私市

其蕃部又有直進者自七十五千至十七千凡三等有獻尚乘者自百一十千至六十千亦三等

其孳生之所卽大名洺衛相州凡七監多擇善馬爲種牝牡爲羣歲遣判官一人巡行點印二歲

已上者歲約八千餘匹凡京城諸州飼馬兵校一萬六千三十八人坊監及諸軍馬二十餘萬每

歲京城草六十六萬六千圓麩料六萬三千二百四石監藥油糖九萬五千餘斤石枚諸州諸軍

不預焉左右驛驢院六坊上留馬二千餘皆季春出就放牧至秋冬而入其尚乘之馬唯備用者

在焉

諸班不自出馬寄兩院

其牧地始自畿田及於近郡皆遣使分行水草善地而標占之諸坊監總四萬

九千四百餘頃諸班諸軍又三萬九百九十頃皆有涼棚井泉所屬縣令檢校之外坊監亦有四

時逐水草以肆游牧者

凡御馬有三等其次給用又有十六等自恩賜外皇族及內臣伎術官要司職掌皆給借之凡馬以府州爲最蓋生於子河以有善種次環慶次秦渭雖骨格稍大而蹄薄多病文雅諸州爲下止給本處兵契丹馬骨格頗多河北草生謂之本羣馬蓋因其水土服習而少疾焉又泉福州興化軍亦有洲嶼馬皆低弱不勝具裝葦以給本道廂軍及江浙驛置之用福州四牧日水嶺龍湖瀝時海瀧泉州二牧日浯州列嶼興化軍二牧日東越侯嶼舊十一牧十中祥符二年廢潤州嶼嶼南園以上通考兵考三牧每牧置羣頭牧戶以主之每歲羣育本縣籍其數以使臣一人提點

度宗咸淳未臣僚請和市馬

有紀智立者獻謀以爲兩淮軍將武官巨室皆畜馬率三借二二借一一全起團結隊伍借助防江各令飼馬役夫自乘之官優給月錢一年以半年爲約江面寧卽放歸臣僚言宜倣祖宗遺意亟謀和市馬如出一馬則免其某色力役時川秦之馬遵陸則崇岡複嶺盤回斗絕舟行則峽江湍急灘礮險惡每綱運公私經費十倍而人馬俱疲上則耗國用下則困州縣綱兵所經甚於寇賊雖臣僚條奏更迭終莫得其要領豈馬政各因風土之宜而非東南之利歟

恭帝德祐元年十二月括臨安府州縣馬

以上續通考兵考

右馬政

二十四史九通政典類要合編卷二百十二

宋三十六

刑制 贖刑

宋法制因唐律令格式而隨時損益則有編敕一司一路一州一縣又別有敕建隆初詔判大理寺竇儀等上編敕四卷凡一百有六條詔與新定刑統三十卷並頒天下參酌輕重爲詳世稱平允太平興國中增敕至十五卷淳化中倍之咸平中增至萬八千五百五十有五條詔給事中柴成務等芟其繁亂定可爲敕者二百八十有六條準律分十二門總十一卷又爲儀制令一卷當時使其簡易大中祥符間又增三千卷千三百七十四條又有農田敕五卷與敕兼行仁宗嘗問輔臣曰或謂先朝詔令不可輕改信然乎王曾曰此儉人惑上之言也咸平之所刪太宗詔令十存一二去其繁密以便於民何爲不可於是詔中外言敕得失命官修定取咸平儀制令及制度約束之在敕者五百餘條悉附令後號曰附令敕天聖七年編敕成合農田敕爲一書視祥符敕損百有餘條其麗于法者大辟之屬十有七流之屬三千有四徒之屬百有六杖之屬二百五十有八笞之屬七十有六又配隸之屬六十有三大辟而下奏聽旨者七十有一凡此皆在律令外者也既頒行因下詔曰敕令者治世之經而數動搖則衆聽滋惑何以訓迪天下哉自今有司毋得輒請刪改有未便者中書樞密院以聞然至慶厯又復刪定增五百條別爲總例一卷後又修一司敕二千三百十有七條一

路數千八百二十有七條一州一縣數千四百五十有一條其屬于法者大辟之屬總三十有一流之屬總二十有一徒之屬總百有五杖之屬總百六十有八笞之屬總十有二又配隸之屬總八十有一大辟而下奏聽旨者總六十有四凡此又在編數之外者也

太祖受禪始定折杖之制凡流刑四加役流脊杖二十配役三年流三千里脊杖二十二千五百里脊杖十八二千里脊杖十七並配役一年凡徒刑五徒三年脊杖二十徒二年半脊杖十八二年脊杖十七一年半脊杖十五一年脊杖十三凡杖刑五杖一百臀杖二十九十臀杖十八八十臀杖十七七十臀杖十五六十臀杖十三凡笞刑五笞五十臀杖十下四三十臀杖八下二十臀杖七下常行官杖如周顯德五年制長三尺五寸大頭闊不週二寸厚及小頭徑不得過九分徒流笞通用常行杖徒罪決而不殺

建隆三年令諸州奏大辟案須刑部詳覆尋如舊制大理寺詳斷而後覆于刑部凡諸州獄則錄事參軍與司法掾參斷之

開寶二年五月帝以暑氣方盛深念縲繫之苦乃下手詔兩京諸州令長吏督獄掾五日一檢視灑掃獄戶洗滌桎械貧不能自存者給飲食病者給醫藥輕繫即時決遣毋淹滯

以上刑志

八年三月有司言自三年至今詔所貸死罪凡四千一百八人上注意刑辟哀矜無辜嘗讀虞書欽曰堯舜之時四兇之罪止從投竄何近代憲網之密邪蓋有意於措刑也故自開寶以來犯大辟非

情理深害者多貸其死云

太宗太平興國三年改司寇參軍爲司理參軍以司寇院爲司理院令於選部中選歷任清白能折獄辨訟者爲之秩滿免選赴集又置判官一員委諸州於牙校中擇幹局曉法律高貴者爲之給以月俸秩滿上其殿最以定黜陟有踰濫者坐長吏以卞其後又詔諸州察司理參軍有不明推鞠致刑獄淹滯具名以聞蔽匿不舉者罪之是歲命有司取國初以來敕條纂爲太平興國編敕十五卷行於世太平興國時始用士人爲司理判官

六年詔自今長吏每五日一慮囚情得者卽決之詔自今繫囚如證左明白而捍拒不伏合訛掠者集官屬同訊問之勿令胥吏拷決上頗慮天下有滯獄復建三限之制大事四十日中事二十日小事十日有不須追捕而易決者不過三日

九年三月令諸州十日一具囚帳及所犯罪繫繫日數以聞刑部專加糾察

以上通考刑考

太宗雍熙元年令諸州十日一具囚帳及所犯罪名繫繫日數以聞俾刑部專意糾舉帝聞諸州所奏獄狀有繫三百人者迺令門留寄禁取保在外并邸店養疾者咸準禁數件析以聞其鞠獄違限及可斷不斷事小而禁繫者有司駁奏之

眞宗咸平元年從黃州守王禹偁之請諸路置病囚院徒流以上有疾者處之餘責保於外

景德三年詔諸道州軍斷獄內有宣敕不定刑名止言當行極斷者所在卽寘大辟頗乖平允自今

凡言處斷重斷極斷決配朝典之類未得論決具獄以閏四年復置諸路提點刑獄官

以上刑  
法志

大中祥符二年詔御史臺開封府及在京凡有刑案之處今特置司糾察令金部員外郎知制誥周起等充凡徒以上罪即時具收禁移報內未盡理及淹延者追取款詞詳關駁奏

四年詔自今決杖令衆者舊十日減爲三日半月以上勿過五日暑月免之

七年殿中侍御史曹定上言諸州長更有罪恐爲訟訴卽投牒自首雖情狀至重亦以例免詔自今如實未有顯露卽以狀報轉運使如格當原免亦書於歷 十月御史臺鞠殺人賊獄具知雜王隋

請鬻割之上曰五刑自有常制何必爲此況此賊本情已見一死足矣 又內供奉官楊守珍使陝

西督捕賊因請擒獲強盜至死者望以付臣凌遲用戒後來詔所捕賊送所屬依法論決毋爲慘毒

以上通  
考刑考

仁宗明道二年令四按分覆大辟有能駁正死罪五人以上歲滿改官法直官與詳覆官分詳天下旬奏獄有重辟獄官毋預燕遊迎送凡上具獄大理寺詳斷大事期二十日小事第減十日審刑院詳議又各減半其不待期滿而斷謂之急按凡集斷急按法官與議者並書姓名議刑有失皆坐之嘉祐五年判刑部李經言一歲之中死刑無慮二千餘夫風俗之薄無甚於骨肉相殘衣食之窮莫急於盜賊今犯法者衆豈刑罰不足以止姦而教化未能導其爲善歟願詔刑部類天下所斷大辟歲上朝廷以助官自從之

五年陝西旱因詔民劫倉廩非傷王者減死刺隸他州非首謀又減一等自是諸路災傷卽降赦饑民爲盜多蒙矜減賴以全活者甚衆司馬光時知諫院言曰臣聞敕下京東西災傷州軍如貧戶以饑偷盜斛斗因而盜財者與減等斷放臣竊以爲非便周禮荒政十有二散利薄征緩刑弛弓舍禁去幾率皆推寬大之恩以利於民獨於盜賊愈更嚴急蓋以饑饉之歲盜賊必多殘害良民不可不除頃年嘗見州縣官吏有不知治體務爲小仁遇凶年劫盜斛斗輒寬縱之則盜賊公行更相劫奪鄉村大擾不免廣有收捕重加刑辟或死或流然後稍定今若朝廷明降敕文豫言與減等斷放是勸民爲盜也百姓乏食當輕徭薄賦開倉賑貸以救其死不當使之自相劫奪今歲府界京東京西水災極多嚴刑峻法以除盜賊猶恐春夏之交饑民嘯聚不可禁禦又況降敕以勸之臣恐國家始於寬仁而終於酷暴意在活人而殺人更多也事報聞帝嘗御邇英閣經筵講周禮大荒大札薄征緩刑楊安國曰緩刑者乃過誤之民耳當歲歉則赦之憫其窮也今衆持兵杖劫糧廩一切寬之恐不足以禁姦帝曰不然天下皆吾赤子也一遇饑饉州縣不能賑恤饑孱所迫遂至爲盜又捕而殺之不亦甚乎

熙甯四年立賊盜重法凡劫盜罪當死者籍其家貲以賞告人妻子編置千里遇赦若災傷減等者配遠惡地罪當徒流者配嶺表流罪會降者配三千里籍其家貲之半爲賞妻子遞降等有差應編配者雖會赦不移不釋凡囊橐之家劫盜死罪情重者斬餘皆配遠惡地籍其家貲之半爲賞盜罪



當徒流者配五百里籍其家貲三分之一爲賞竊盜三犯杖配五百里或隣州雖非重法之地而囊橐

重法之人以重法論

以上刑法志

元豐元年帝以國初廢大理獄非是乃詔曰大理有獄尚矣今中都官有所劾治皆寓繫開封諸獄囚既猥多難於隔訊盛夏疾疫傳致瘵死或主者異見輒淹歲時不決朕甚愍焉其復大理獄置卿一人少卿二人丞四人專主鞫訊檢法官二人主簿一人應三司諸寺監吏犯杖笞不俟追究者聽卽決餘悉送大理獄其應奏者並令刑部審刑部詳斷應天下奏案亦上之遷寺於馳道之西

三年正月詔審刑院刑部斷議官自今歲終具嘗失入徒罪五人以上或失入死罪者取旨連名者二人當一人京朝官展磨勘年幕職州縣官展考或不與任滿指射差遣或罷本年斷絕支賜去官不免先是嘗詔歲終比較取旨而法未備故有是詔

哲宗元祐八年中書省言往詔內外歲終具諸獄囚死之數初無禁繫多寡之限至元祐元年諸路所上刑部獄死之數遂以禁繫一十而死一則不具卽是歲繫二百人許以十人獄死恐州縣弛意獄事甚非欽恤之意詔刑部自今不許輒分禁繫之數

紹聖四年治同文館獄

刑部言祖宗以來重失入之罪所以恤刑紹聖之法以失出三人比失入一人則是一歲之中偶失出死罪三人卽抵重譴夫失出臣下之小過好生聖人之大德請罷理官失出之責使有司讞議之

開務盡忠恕從之

徽宗建中靖國元年五月大理卿周鼎言律鬪殺人者絞故殺人者斬蓋兩相爭競者謂之故義理甚明今法寺斷案每於故鬪之際議論不一蓋泥刑統所謂非因鬪爭無事而殺是名故殺殊不知所謂無事而殺者以言無彼此爭鬪之事而殺人者是名故殺若謂不必鬪爭但緣他事而殺者不當爲故則律之立文奚不曰有事殺人絞而曰鬪殺人絞不曰無事殺人斬而云故殺人斬以此實之法意可見請自今凡斷奏故鬪案並令有司指定兩相關爭是否若止辯說往復卽非忿競則故鬪情狀判然矣刑部亦是鼎議詔申明行下

崇寧元年臣僚言三省六曹所守者法法所不載然後用例今顧引例而破法此何理哉請取前後所用例以類編脩與法妨者去之詔從之

大觀元年詔計贓之律以絹論罪絹價有貴賤故論罪有輕重今四方絹價增貴而計絹之數猶循舊制以定一貫三百爲率計價既低抵罪太重非仁民恤獄之意可以一貫五百定罪

二年更定笞法自今並以小杖行決笞十爲五二十爲七三十爲八四十爲十五五十爲二十不以大杖比折永爲定制

四年詔河北河東羣賊所經歷縣及十次以上知縣降一官衝替縣尉降一官勒停不及十次知縣衝替縣尉勒停

三四身之通正理義身有類 卷二百二 夕  
政和二年臣僚言比來大理迎合觀望曲法用情例使倖免有犯在開封而願移大理者至號法寺  
爲休和所甚非廷尉持平之義詔大理少卿罷免

四年詔立聚問審錄之限死囚五日流罪三日杖笞一日

五年詔令今後不法官吏已爲按察官所劾而輒論告按察官者雖指斥等事亦候結勘斷罪畢再  
推勘如不實誣告人特於法外別行重斷

七年詔品官犯三問不承卽奏請追攝若果情理重害而拒隱者方許枷訊所以示別也邇來有司  
廢法不候三問追攝不原輕重枷訊與常人無異將使人有輕視爵祿之心可申明條令以稱欽恤  
庶獄之意 又詔宗室犯罪與常人同法有司承例奏請不候三問未承卽加訊問非朕所以爲親  
親之恩也自今有犯除涉情理重害別被處分外餘止以衆證爲定仍取伏辯無得輒加捶拷若罪  
至徒以上方許依條置勘其合庭訓者竝送大宗正司以副朕敦睦九族之意

中書省言律在官犯罪去官勿論蓋爲命官立文其後敕文相因脩立掌典解役亦用去官免罪  
例而有犯則解役歸農幸免重罪詔政和敕掌典解役者聽從去官法勿行

重和元年二月河北西路提點刑獄虞奕言州縣虐吏輒借杖爲溜筒用鐵鉗項以竹實沙而貫之  
非理慘酷詔悉禁止犯者以違制論 四月詔肉刑廢而爲杖笞

宣和元年詔處州近斷大辟二人其元犯人乃於斷後首獲人命至重失刑如此深可憫傷其令本

路提點根勘官吏並先勒停不以故原誤斷之家優加存恤

二年右司員外郎翁彥深言陛下欽恤庶獄無所不至而州郡不能審克吏得以竝緣爲姦刑及貧民而富者規免寢失天下之平今奏牘之首纒悉畢載而畧其尸等至今奏案竝列其尸之高下審其吏姦而懲之使寡弱之民不見凌暴從之

臣僚言比年官吏希求恩賞治獄者務作獄空輒不受辭又寄留囚徒於他所致有逃逸斷刑者務作斷絕滅裂齒莽用刑失當有以婦人配隸千里者昨詔大理寺開封府不得輒奏獄空近復有旨

不許妄作斷絕然開封府復有斷絕獄官吏冒賞者詔令御史臺覺察彈奏

以上通考刑考

高宗建炎初著令諸獄具當職官依式檢校枷以乾木爲之輕重長短刻識其上笞杖不得留節目亦不得釘飾及加筋膠之類仍用官給火印暑月每五日一洗濯枷杻刑寺輪官一員躬親監視諸獄司竝旬申禁狀品官命婦在禁別具單狀合奏案者具情款招伏奏聞法司朱書檢坐條例推司錄問檢法官吏姓名于後各州每年開收編配羈管奴婢人及斷過編配之數各置籍各路提點刑獄司歲具本路州軍斷過大辟申刑部諸州申提刑司其應書禁歷而不書應申所屬而不申奏案不依式檢坐開具違令回報不圓致妨詳覆與提刑司詳覆大辟而稽留失覆大辟致罪有司入者

各抵罪

刑法志

熙甯中神宗厲精爲治議置局修敕蓋謂律不足以周盡事情凡邦國沿革之政與人之爲惡入

於罪戾而律所不載者一斷以敕乃更其目曰敕令格式而律存乎敕之外自元祐變熙甯之法  
紹興復熙甯之制以後銜前以新改舊各自爲書而刑書浸繁至是乃有此詔又詔重修敕令所  
應仁宗法度理合舉行自今遵奉嘉祐條法將嘉祐敕與政和敕對修紹興初張守等上對修嘉  
祐政和敕令格式一百二十卷及看詳六百四卷詔以紹興重修敕令格式爲名頒行於是熙甯  
元祐紹聖法制無所偏循善者從之

自渡江以來有司圖籍散失凡所施行多出百司省記胥吏因得子奪至是監察御史劉一止奏  
曰伏見尚書六曹下逮百司凡所用法令初無畫一之論類以人吏省記便爲子奪蓋法令具存  
姦吏猶得而舞之今乃一切聽其省記顧欺弊何所不有陛下聖明灼見此弊嘗見處分令左右  
司郎官以其省記之文判定頒行然左右司職事號爲最繁竊恐於此不能專一無由速成伏望  
改差詳定一司敕令所立限刊定鏤版頒降施行詔如其請

四年二月詔靖康元年正月一日以前所降御筆多出於法令之外奉行牴牾甚非恤刑之意自今  
除靖康元年正月一日以前御筆有出於法之外者依畧降指揮施行其餘減杖卹刑之類竝合遵守

自蔡京當國請降御筆手詔以快已私自呼法令有司莫知適從至是釐正之

以上通考刑考

乾道二年下詔曰獄重事也用法一傾則民無所措手足比年以來治獄之吏巧持多端隨意輕重  
之朕甚患焉其自今革玩習之弊明審克之公使姦不容情罰必當罪用迪於刑之中勉之哉毋忽

三年詔曰獄重事也稽者有律當者有比疑者有讞比年願以獄情白於執政採取旨意以輕爲重甚亡謂也自今其祗乃心敬於刑惟當爲貴毋習前非不如吾詔吾將大寬於罰罔攸赦

刑法志

四年正月臣僚言杖笞之制著令具存輕重大小之制不得以私意易也比年以來吏務酷虐浸乖仁恕之意凡訊囚合用荆子一次不得過三十共不得過二百此法意也今州縣不用荆子而用藤條或用雙荆合而爲一或鞭股鞭足至三五百刑罰冤濫莫此爲甚願戒有司申嚴行下凡守令與掌行刑獄之官並令依法製大小杖當官封押乃得行用不得增添換易過數訊囚恣爲慘酷從之五月臣僚言民命莫重於大辟方鍛鍊時何可盡察獨在聚錄之際官吏聚於一堂引囚而讀示之死生之分決於頃刻而獄吏憚於平反摘紙疾讀離絕其文嘈囁其語故爲不可曉解之音造次而畢呼囚書字茫然引去指日聽刑人命所于輕忽若此臣竊照聚錄之法有曰人吏依句宣讀無得隱瞞令囚自通重情以合其款此法意蓋不止於只讀成案而已臣謂當稽參自通重情以合其款之文於聚錄時委長貳點無干礙吏人先附囚口責狀一通覆視獄案果無差殊然後亦點無干礙吏人依句宣讀務要詳明令囚通流庶幾伏辜者無憾冤枉者獲伸從之六年祕書少監權刑部侍郎汪大猷等重脩敕令格式百二十二卷存雷照用指揮二卷詔以乾道重脩敕令格式爲名

淳熙元年五月詔頒浙西提刑鄭興裔檢驗格目於諸路提刑司

初興裔言諸州縣檢驗之弊遂措置格目行下所屬州縣每一次檢驗依立定字號用格目二本一申所屬州縣一付被害之家一申本司照會州縣受詞差官檢官受牒起發皆注日時於上關防詳密州縣不得爲欺朝廷善之乃行於諸路

十月詔六部除刑部許用乾道所脩刑名斷例及司勳許用編類獲盜推賞例并乾道元年四月十八日輕置脩例敝事指揮內立定合引例外其餘竝依成法不許用例

先是臣僚言今之有司旣問法之當否又問例之有無法旣當然而例或無之則事皆沮而不行夫法之當否人所共知而例之有無多出吏手往往隱匿其例以沮壞良法甚者賄賂旣行乃爲具例爲患不一請詔有司應事有在法灼然可行而未有此例者不得以無例廢法事下六部看詳至是來上乃有是詔

六年知湖州長興縣茹驥坐贓免眞決編管台州仍籍沒家財參知政事錢良臣奏臣昨任淮東總領日失舉茹驥改官今以贓敗法當同坐詔覽良臣所奏乃欲以身行法國有常憲朕不敢私勉從所請可鑄三官於是陳覲張宗元趙礪老徐本中竝坐舉驥各降三官

八年詔自今強盜抵死特貸命之人竝於額上刺強盜二字餘字分刺兩頰

十六年臣僚言在律鞠獄者皆須依所告狀鞠若於本狀之外別求他罪者以故入人罪論比年中外之獄聞於狀外求罪推尋愆咎鞠勘平生旁及他人干連禁繫豈無冤濫乞申明法令自今獄事

無得於狀外求罪如有違戾重寘於法從之

光宗紹熙五年臣僚言廣東一路十有四州惟英德府煙瘴最甚有人間生地獄之號諸司分在廣韶二州置司英德府界乎廣韶之間故諸司凡以公事送獄者多送英德人一間生地獄之名則已心懼凡罪不至死與未必有罪之人每至獄則皆引伏其意以爲久繫於獄未必辨明而不免於死不若亟就刑責猶得一生由是獄之欲速成者必之英德而英德之吏以善治獄名今一路之中東有潮惠西有二廣北有南雄連州皆風土之不甚惡者請行下本路諸司應今後公事合送別州根勘者不許送英德府庶獄無冤濫人獲生全從之

宣宗嘉泰二年臣僚言近日大辟行兇之人鄰保逼令自盡或使之說誘被死家賂之財物不合到官嘗求其故始則保甲憚檢驗之費避證佐之勞次則巡尉憚於檢覆又次則縣道憚於鞫勘結解上下蒙蔽只欲省事不知置立官府本何所爲今若縱而不問則是被殺人者反爲妻子親戚乞錢之資甚可痛也請明降指揮凡有殺傷人處如都保不會申官州縣不差官檢覆及家屬受財私和許諸色人告首竝合從條究治其行財受和會之人更合計贓論罪從之

二年刑部侍郎休粟言嘉泰改元一年天下所上死案共一千八百一十一人而斷死者纔一百八十一人餘皆貸放夫有司以具獄來上必皆可論刑之人陛下貸其罪辜者凡一千三百六十人豈爲細事請詔秘書省脩入日歷上以示陛下好生之德下以戒有司用刑之濫從之



四年詔頒湖南廣西刑印檢驗正背人形圖於諸路提刑司

先是江西提刑徐似道言推鞠大辟之獄自檢驗始其間有因檢驗官司指輕作重以有爲無差訛交互以故姦吏出入人罪弊倖不一伏見湖南廣西見行刑印正背人形隨格目給下檢驗官司令於傷損去處依樣朱紅書畫橫斜曲直仍於檢驗之時唱喝傷痕令罪人同共觀看所畫圖本衆無異詞然後著押則吏姦難行愚民易曉於是詔行之

臣僚言切見縣獄苦無囚糧而城下之邑尤甚法許於運司錢內支往往縣道不敢支破例多陪辦於推獄私取於役戶分甘於同禁之人簞食入獄攫拏紛然極可憐憫乞從諸縣申州就於常平米內支撥從之

十三年詔凡在官財物不應用而用之依律科坐贓罪之人自今私自入己者爲贓罪私自饋遺者爲私罪用充公用者爲之公罪創始者爲首坐以全罪循例者爲從與減一等

以上通考刑考

### 右刑制

金作贖刑蓋以鞭朴之罪情法有可議者則寬之也穆王贖及五刑非法矣宋損益舊制凡用官蔭得減贖所以尊爵祿養廉恥也乾德四年大理正高繼申上言刑統名例律三品五品七品以上官親屬犯罪各有等第減贖恐年代已深不肖自恃先蔭不畏刑章今犯罪身無官須祖父曾任本朝官據品秩得減贖如仕于前代須有功德及民爲時所推歷官三品以上乃得請從之後又定流內

品官任流外職準律交徒罪以上依當贖法諸司授勒留官及歸司人犯徒流等罪公罪許贖私罪以決罰論淳化四年詔諸州民犯罪或入金贖長吏得以任情而輕重之自今不得以贖論婦人犯杖以下非故爲量輕重答罰或贖銅釋之仁宗深憫夫民之無知也欲立贖法以待薄刑廼詔有司曰先王用法簡約使人知禁而易從後代設茶酒鹽稅之禁奪民厚利刑用滋章今之編敕皆出律外又數改更官吏且不能曉百姓安得閱之一陷于理情雖可哀法不得贖豈禮樂之化未行而專用刑罰之弊與漢文帝使天下人人入粟於邊以受爵免罪幾于刑措其議科條非著于律者或冒刑犯禁奢侈違令或過悞可憫別爲贖法鄉民以穀麥市人以錢帛使人重穀麥免刑罰則農桑自勸富壽可期矣詔下論者以爲富人得贖而貧者不能免非朝廷用法之意時命輔臣分總職事以參知政事范仲淹領刑法未及有所建明而仲淹罷事遂寢至和初又詔前代帝王後嘗仕本朝官不及七官者祖父母父母妻子罪流以下聽贖雖不仕而嘗被賜子者有罪非巨蠹亦如之隨州司理參軍李抃父歐人死抃上所授官以贖父罪帝哀而許之君子謂之失刑然自是未嘗爲比而終宋之世贖法惟及輕刑而已

刑法志

真宗景德二年審刑院大理寺上折杖贖金條犯加役流而下一罪先發已經論罰餘罪後發又計前杖科決上以細民膚革薦傷殊非哀矜之意詔申定其制止贖金以滿餘數若情理凶惡者卽復決杖

神宗熙寧四年前單州碭山縣尉王存立言嘉祐中同學究出身以父坐事配隸納官贖自便而鄉縣不免丁役願同舉人例詔復賜出身仍注合入官

中書言刑名未安者五條其四令州縣考察士民有能孝悌力田爲衆所知者給帖付身偶有犯

令情輕可恕者特議贖罰其不悛者科決後竟不行

以上通考刑考

右贖刑

宋三十七

刑 赦宥 配役 詳獻

宋自祖宗以來三歲遇郊則赦此常制也世謂三歲一赦於古無有景祐中言者以爲三王歲祀圜丘未嘗輒赦自唐興兵以後事天之禮不常行因有大赦以蕩亂獄且有罪者寬之未必自新被害者抑之未必無怨不能自新將復爲惡不能無怨將悔爲善一赦而使民悔善長惡政教之大患也願罷三歲一赦使良民懷惠凶人知禁或謂未可盡廢卽請命有司前郊三日理罪人有過誤者引而赦之州縣須詔到做此疏奏朝廷重其事第詔罪人情重者毋得以一赦免然亦未嘗行

恩宥之制凡大赦及天下釋雜犯死罪以下甚則常赦所不原罪皆除之凡曲赦惟一路或一州或別京或畿內凡德音則死及流罪降等餘罪釋之間亦釋流罪所被廣狹無常又天子歲自錄京師繫囚畿內則遣使往往雜犯死罪以下第降等杖笞釋之或徒罪亦得釋若并及諸路則命監司錄焉初太宗嘗因郊禮議赦有秦再恩者上書願勿赦引諸葛亮佐劉備數十年不赦事帝頗疑之時趙普對曰凡郊祀肆眚聖朝盛典其仁如天若劉備區區一方臣所不取上善之遂定赦初太祖將祀南郊詔兩京諸道自十月後犯強竊盜不得預郊祀之赦所在長吏告諭民無言法是後將祀必先申明此詔天聖五年馬亮言朝廷雖有是詔而法官斷獄乃言終是會赦多所寬貸惠姦失詔旨

遂詔已下約束而犯劫盜及官典受贓勿復奏悉論如律七年春京師雨彌月不止仁宗謂輔臣曰  
豈政事未當天心耶因言向者大辟覆秦州縣至於二京師至於五蓋重人命如此其戒有司決獄  
議罪母或枉濫又曰赦不欲數然捨是無以召和氣遂命赦天下帝在位久明於人之情僞尤惡許  
人陰事故一時士大夫習爲醇厚久之小人乘間密上書疏人過失好事稍相與唱和又按人赦前  
事翰林學士張方平御史呂誨以爲言因下詔曰蓋聞治古君臣同心上下協穆而無激訐之俗何  
其德之盛也朕竊慕焉嘉與公卿大夫同底斯道而教化未至澆薄日滋比者中外羣臣多上章言  
人過失暴揚難驗之罪或外託公言內緣私忿詆欺曖昧苟陷善良又赦令者所以與天下更始而  
有司多舉按赦前之事始非信命重刑罰使人洒心自新之意也今有上言告人罪言赦前事者訊  
之至於言官宜務大體非事關朝政自餘小過細故勿須察舉神宗卽位又詔曰夫赦令國之大恩  
所以蕩滌瑕穢納於自新之地是以聖王重焉中外臣僚多以赦前事摺摭吏民興起獄訟苟有誣  
誤咸不自安甚非持心近厚之義使吾號令不信於天下其內外言事按察官毋得依前舉劾具按  
取旨否則科違制之罪御史臺覺察彈奏法寺有此奏按許舉駁以聞知諫院司馬光言曰按察之  
官以赦前事興起獄訟禁之誠爲大善至於言事之官事體稍異何則御史之職本以繩案百僚糾  
擿隱伏姦邪之狀固非一日所爲國家素尚寬仁數下赦令或一歲之間至於再三若赦前之事皆  
不得言則其可言者無幾矣萬一有姦邪之臣朝廷不知誤加進用御史欲言則違今日之詔若其

不言則陛下何從知之臣恐因此言者得以藉口偷安姦邪得以放心不懼此乃人臣之至幸非國家之長利也請追改前詔刊去言事兩字光論至再帝諭以言者好以赦前事誣人光對曰若言之得實誠所欲聞若其不實當罪言者帝命光送詔于中書熙寧七年二月帝以旱欲降赦時已兩赦王安石曰湯旱以六事自責曰政事不節與若一歲三赦是政不節矣非所以弭災也乃止八年編定慶免人敘格常赦則郡縣以格敘用凡三暮一敘卽暮未滿而遇非次赦者亦如之元祐元年門下省言當官以職事墮曠雖去官不免猶可言至於赦降大恩與物更始雖劫盜殺人亦蒙寬宥豈可以一事差失負罪終身今刑部所修不以官赦降原減條請更刪改徽宗在位二十五年而大赦二十六曲赦十四德音三十七而南渡之後紹熙歲至四赦蓋刑政紊而恩益濫矣以上刑法志

太祖皇帝建隆元年受周禪大赦改元 二年以皇太后后疾赦 乾德元年四月平荆湖赦其地

十一月郊大赦 三年平蜀赦其地 開寶元年郊大赦 四年二月平廣南赦其地 十一月郊

大赦 八年平江南赦其地 九年郊大赦

太宗卽位大赦改元 太平興國三年郊大赦

詔自元年十二月二十二日以後卽登極赦京朝幕府州縣官犯入已贖除名配諸州者縱逢恩赦不

在放還之限

四年平河東赦其地 二年五月以旱大赦 十一月郊大赦 雍熙元年郊大赦 端拱元年大

赦

少府監言犯贓配役人郭寃等九人皆嘗任京朝官會赦當敘用上曰寃等贓吏不可復齒仕版

止令釋遣之

淳化四年郊大赦 五年大赦 至道元年立皇太子大赦 二年郊大赦

眞宗卽位大赦 咸平二年郊大赦

詔如聞小民知有恩赦故爲劫盜自今不在原免之限

五年郊大赦 景德元年大赦 二年正月大赦 十一月郊大赦

大理寺言郊禮在近諸州奏按多不精詳冀於覆駁延留以俟恩宥請自今有侵損贓私事狀明

白公然抗拒當駁退者卽具情實定斷以絕僥倖詔可

大中祥符元年正月以天書降大赦 十月封禪禮成大赦 四年祀后土睢上大赦 五年聖祖

降大赦 七年恭謝東郊大赦 八年正月上玉皇聖號大赦 閏六月以日食大赦 天禧元年

上玉皇聖祖寶冊大赦

江南提點刑獄范應辰上言伏觀辛亥制書常赦不原者咸除之謹按呂刑云兩造具備師聽五

辭五辭簡孚正於五刑五刑不簡正於五罰五罰不服正於五過繇是五刑之疑有赦五罰之疑

有赦其來詳矣臣今所部州軍過誤而被宥者雖多竊害而蒙釋者亦衆蓋以姦凶之輩密斷赦

期百計是爲萬端斯起發其夙憾徃於忿心單弱受辜強梁肆暴或舉家隕命罄室虜財或持刃殺人肝腦塗地或縱火焚舍蘊蓄蕩空至有糾輕生之徒爲強剽之盜公行戕害以奪資儲巡警之官上逼下逐設謀緝捕冒險闖敵科罰者伍薄令尉以茲敗獲合正典刑逢此需恩亦蠲其罪悉又配爲卒伍咸給衣糧令力耕之人有受其寒餒者而此輩季賜以服月賦以粟又何異賞人爲盜者邪與夫疑則赦之言殊矣望自今應有知赦在近而固爲罪戾若赦後彰顯情理切害者死罪以下止遞減一等赦前殺人剽財赦後雖不復爲若因事捕獲決隸遠惡州軍其殺人放火虜劫財貨已依赦配本城者如更配逃亡飲博之罪依禁軍例科斷其重罪該原而情理切害者所在長吏籍其犯由若再贖憲綱不以罪之大小禁錮奏裁其州縣官吏侮刑受賂望止原其罪而削其官以申警戒焉上覽之頗嘉其盡心然以赦數則不可無之實難也

二年七月彗見大赦 八月立皇太子大赦 三年八月以天書再降大赦 十一月郊赦 四年大赦 五年赦 乾興元年大赦

仁宗卽位大赦 天聖二年郊大赦 五年郊大赦 八年郊大赦 明道元年八月大赦 十一月大赦改元 二年二月躬耕籍田大赦 三月以皇太后不豫大赦 景祐元年以星變大赦

二年郊大赦 寶元元年郊大赦 慶曆元年郊大赦 四年郊大赦 五年大赦 皇祐二年大享明堂大赦 四年郊大赦 至和二年八月赦京輔



先是正月己降德音知諫院范鎮言京輔歲一赦而去歲再赦今歲三赦又在京諸軍歲再賜緡錢姑息之政無甚於此夫歲一赦者細民謂之熟恩以其必在五六月間也姦猾爲過指以待免况再赦三赦乎今備塞之兵五六十萬使聞京師端坐受賜者能不動心哉請自今罷所請一赦以推姦猾而使善良得以立也罷兵士之特賜以均內外而使民得以寬也

嘉祐元年正月大赦 二年大享明堂大赦 八年上不豫大赦

英宗卽位大赦 治平二年郊大赦 三年大赦

熙寧元年郊大赦 四年大享明堂大赦 七年郊赦 八年彗出大赦 十年郊赦 元豐三年

大享明堂赦 五年景靈宮成大赦 六年郊赦

大理少卿劉克言赦書以赦降日昧爽以前爲限非次恩需人難預期請依德音例以赦到日爲限從之

八年上不豫大赦 立皇太子大赦

哲宗卽位大赦 元祐元年大享明堂赦 四年大享明堂赦 七年郊大赦 八年赦

門下侍郎韓維言請自今每近郊赦令刑部大理寺開封府並依當時決遣獄訟不減日限其情重難釋者別爲一等奏斷從之

紹聖二年大享明堂赦 四年四月西邊進築赦陝西河東 九月彗出氏赦 元符元年郊赦

二年以西邊進築畢功赦陝西河東 三年上不豫大赦

中書省言元祐編救惟傳習妖教託幻變之術及故盜決河堤堰不以赦降原減餘犯一再遇非次赦或兩經大禮者聽從原免元符新赦刪去遂使犯法者無由自新詔依元祐法

徽宗卽位大赦

元符三年正月

四月皇太子生大赦

建中靖國元年郊赦

崇寧二年大赦

三年郊

赦 五年彗出西方赦

大觀元年正月大赦

九月大享明堂赦

二年受八寶赦

四年五月

星孛奎婁大赦

十一月郊赦

政和元年受元圭大赦

三年四月赦梓夔路

十一月郊赦

四年祭地赦

五年立皇太子赦

知興仁府夏鑄言諸路奏獄有因祖父母爲人所歐而子孫歐之以致死者並坐情理可憫奏裁多免流配若遇赦則不復奏裁卽作鬪殺情理減等流配是不遇赦者爲幸遇赦者爲不幸請自今雖遇赦亦令奏裁從之

六皇上玉皇號大赦

修京西大內成赦京西路

十一月郊赦

七年大享明堂赦

重和元年

受定命寶大赦

二月赦四川及陝西河東

九月大享明堂赦

十一月改元大赦

宣和元年

赦陝西河東 三年討方臘大赦

方臘平赦江浙淮南等路

四年郊赦

五年入燕赦兩河燕

雲路 六年大赦

七年五月赦山東河北

十一月郊赦

欽宗卽位大赦

靖康元年五月赦河北

神宗大赦凡十一卽位覃恩一南郊四明堂二星變一景靈宮成奉安一帝不豫祈福一立皇太子一曲赦凡十一兩京鄭州河陽以山陵畢功河北諸州以水災地震西京以奉安二后神御河東陝西以師旅熙河秦鳳以恢復而熙河獨再廣東西湖南以交趾平潁昌府以帝藩邸受封梓州路以夷人平德音凡八以冬無雪以皇子生以日食正陽之月者再以奉安中太一以慈聖光獻皇后弗豫以山陵復土以四后升祔親錄在京繫囚凡十五及諸路者一及西京者二哲宗大赦凡八卽位覃恩一南郊二明堂三太皇太后不豫一星變一帝不豫一德音凡九兩京畿河陽以永裕陵復土西京以修奉應天禪院會聖宮影殿成兩京畿河陽鄭州以宣仁皇后山陵復土陝西河東兩路以西邊進築九城以建西安州而連雪久陰上清儲祥宮成受傅國寶皇子生皆及天下徽宗大赦二十六卽位覃恩一南郊八明堂三皇子生親謁原廟九鼎成星變二受八寶受元圭立皇子上玉皇尊號受定命寶太一宮成罷方田收復燕雲曲赦十四荆湖北路以平荆湖猖賊熙河秦鳳永興軍路以收復澶州熙河蘭湟路以撫定鄆廓熙河陝西河東京西路以興復解鹽池寶廣西以郎康居之屬納土熙河蘭湟秦鳳永興軍路以關陝西疆土四川以平西南夷淮南西路以平淮南賊陝西河東路以破西夏陝西河東路以夏人納款河北河東路以收復燕京燕山府雲中路德音二十七西京畿內以日食以皇太后罷同聽政兩京畿河陽鄭州以永泰陵復土以陞端州爲肇慶府以皇太后服藥以日食止陽之月兩京畿河陽以欽聖惠肅皇后

園陵復土西京畿內以景靈西宮成西京畿內河陽鄭州以欽成皇后園陵復土西京畿以哲宗神御殿成西京畿內以延福宮火以陞瀘州爲開德府真光壽舒和宿泗楚揚亳蘇常湖潤杭秀越穎徐拱州高郵無爲軍江寧潁昌府河南應天府及陳留縣管內以妖賊張懷素平兩京河陽鄭州以帝疾康寧以收復溱播州梓夔路兩京畿河陽鄭州管內以昭懷皇后園陵復土河北京西京東路以修三山河橋成兩浙江東福建淮南路以方臘伏誅京東河北路以盜賊而北郊凡三以禁中神御成以皇帝元命之月以神霄宮成皆及天下欽宗大赦一卽位覃思金國講和德音一河北路以金人出境

高宗建炎元年五月卽位於南京大赦改元 六月以皇長子生大赦

右僕射李綱言登極赦獨遺河東北而不及勤王之師夫兩路爲朝廷堅守而赦令不及勤王之師雖未嘗用然在道半年亦已勞矣況疾病死亡者不可勝數恩恤不及後復有急何以使人上嘉納故此赦於二者特詳

二年十一月郊赦 三年二月上如杭州大赦 三月苗傅劉正彥叛請太后聽政大赦 四月上

復位大赦 四年三月以虜退大赦 紹興元年正月上在越州大赦改元 九月大享明堂大赦

二年九月以彗出大赦 四年大享明堂大赦 七年大享明堂大赦 九年正月以大金講和

大赦 十年大享明堂大赦 十二年以皇太后至臨安大赦 十三年郊赦 十五年四月以彗

出東方大赦 十六年郊赦 十九年郊赦 二十二年郊赦 二十五年郊赦

右正言凌哲言陛下深念比年臣僚有緣誣告不測之罪投竄遐裔無路自明迺因郊祀赦曠然與之昭雪或除罪籍或復元官寬憤既伸萬物吐氣甚盛德也至於姦賊狼籍已經按治蹟狀顯著人所共知者亦復巧飾詞理公肆誕謾咸以違忤權臣爲辭今陛下方開公正之路小人乃欲啟僥倖之門此正清議之所不容也又況此曹嗜利之人與生俱生未易懷革倘復齒仕途再臨民社且益務培尅以殘虐吾民其害將又甚於前日矣請特詔有司應自今陳雪過名之人並須檢會元犯事因如係贓罪已經勘劾者乞止依元斷條法施行詔刑部看詳本部言官犯罪若元因論訴按發鞠勘贓證結錄別無番異者並欲具元斷因依告示其餘特赦罪或因緣連坐之人後來有司看詳委有冤抑者卽行開具因依申取朝廷指揮從之

二十八年郊赦 二十九年以太后不豫大赦 三十一年大享明堂赦 十二月以虜渝盟上親征赦新復州軍

孝宗受內禪卽位大赦 隆興二年十一月赦沿邊諸州 乾道元年正月郊赦 八月立皇太子

大赦 三年七月以皇太子疾大赦 十一月郊赦 六年十一月郊赦 七年二月立皇太子大

赦 淳熙二年行上皇慶壽禮大赦 三年十一月郊赦 六年大享明堂赦 九年大享明堂赦

大理卿王尚之言近以民間詞訴官司按劾多有連及赦前事者復送有司根勘如此則與不曾

經天赦無以異非所以示信也請降指揮應今後送所司推勘者只合將大赦後罪犯依法結斷若所犯在大赦前苟非惡逆以上並不許推究從之

十年行太上皇帝慶壽禮赦 十二年郊赦 十三年行上皇后慶壽禮赦 十四年上皇遠豫大赦 十五年大亨明堂大赦

光宗受內禪大赦 紹熙二年郊赦 五年壽皇不豫赦天下

寧宗七月卽位赦天下 九月合祭天地於明堂大赦 慶元三年十月以冬雷赦 十一月郊赦

六年八月以太上皇遠豫赦 九月祭明堂赦 嘉泰三年十一月郊赦 開禧二年六月以北

伐曲赦泗州 九月祭明堂赦 三年四月以誅吳曦曲赦四川 五月以皇太后遠豫赦天下

十一月以立皇太子赦天下 嘉定二年祀明堂赦天下 五年郊赦 八年祀明堂赦 十二年

祀明堂赦 十四年祀明堂赦 十五年受玉寶大赦 十七年上遠豫赦

以上通考刑考

### 右赦宥

凡應配役者傳軍籍用重典者黥其面會赦則有司上其罪狀情輕者縱之重者終身不釋

太宗以國初諸方割據沿五代之制罪人率配隸西北邊多亡投塞外誘羗爲寇乃詔當徒者勿復隸泰州靈武通遠軍及緣邊諸郡時江廣已平乃皆流南方先是犯死罪獲貸者多配隸登州沙門島及通州海島皆有屯兵使者領護而通州島中凡兩處官衰鹽豪強難制者隸崇明鎮懦弱者隸

東州市太平興國五年始令分隸鹽亭役之而沙門如故

端拱二年詔免嶺南流配荷校執役初婦人有罪至流亦執鍼配役至是詔罷免之始令雜犯至死貸命者勿流沙門島止隸諸州牢城舊制僮僕有犯得私黥其面帝謂僮使受傭本良民也詔盜主財者杖脊黥面配牢城勿私黥之十貫以上配五百里外二十貫以上奏裁

乾興以前州軍長吏往往擅配罪人仁宗卽位首下詔禁止且令情非巨蠹者須奏待報又詔諸路按察官取乾興赦前配隸兵籍者列所坐罪狀以聞自是赦書下輒及之初京師裁遣院募女工而軍士妻有罪皆配隸南北作坊天聖初特詔釋之聽自便婦人應配則以妻窰務或軍營致遠務卒之無家者著爲法時又詔日間配徒者其妻子流離道路罕能生還朕甚憐之自今應配者錄具獄刑名及所配地里上尚書刑部詳覆

知益州薛田言蜀人配徙他路者請雖老疾毋得釋帝曰遠民無知犯法終身不得還鄉里豈朕意哉察其情可矜者許還後復詔罪狀積惡者勿許

天聖初吏同時以贓敗者數人悉竄之嶺南下詔申做在位有平羗縣尉鄭宗諤者受賕枉法抵死會赦當奪官帝問輔臣曰尉奉月幾何豈祿薄不足自養邪王欽若對曰奉雖薄廉士固亦自守特仗宗諤配隸安州其後數懲貪吏至其末年吏知以廉自飾犯法者稍損於舊矣罪人貸死者舊多配沙門島至者多死景祐中詔當配沙門島者第配廣南地牢城廣南罪人乃配嶺北然其後又有

配沙門島者慶曆三年既疏理天下繫囚因詔諸路配繫役人皆釋之

皇祐中既赦命知制誥曾公亮李紳閱所配人罪狀以聞於是多所寬縱公亮請著爲故事且請益梓利夔四路就委轉運鈐轄司閱之自後每赦命官率以爲常配隸重者沙門島若其次嶺表其次三千里至鄰州其次羈管其次遷鄉斷訖不以寒暑即時上道吳充建議流人冬寒被創上道多凍死請自今非情理巨害遇冬月聽流役本處至春月遣之詔可

元豐元年青州民王贊父爲人毆死贊幼未能復讎幾冠刺讎斷支首祭父墓自首論當斬帝以殺讎祭父又自歸罪其情可矜詔貸死刺配鄰州

紹聖三年刑部侍郎邢恕等言藝祖初定天下主典自盜賊滿者往往抵死仁祖之初尚不廢也其後用法稍寬官吏犯自盜罪至極法率多貸死然甚者猶決刺配島錢仙芝帶館職李希甫歷轉運使不免也比朝廷用法益寬主典人吏軍司有犯例各貸死畧無差別欲望講述祖宗故事凡自盜計贓多者間出虐斲以肅中外詔今後應枉法自盜罪至死贓數多者並取旨或患加役流法大重官有監驅之勞而道路有奔亡之慮蘇頌元豐中嘗建議請依古圍土取當流者治罪訖髡首鉗足晝則居作夜則置之圍土滿三歲而後釋未滿歲而遇赦者不原既釋仍送本鄉議察出入又三歲不犯乃聽自如時未果行崇寧中始從蔡京之請令諸州築圍土以居強盜貨死者晝則役作夜則拘之視罪之輕重以爲久近之限許出圍土充軍無過者縱釋行之二年其法不便迺罷大觀元年



復行四年復罷南渡後諸配隸祥符編敕止四十六條慶曆中增至百七十餘條至於淳熙又增至五百七十條則四倍於慶曆矣配法既多犯者日衆黥配之人所至克斥淳熙十一年校書郎羅點言其太重乃詔刑寺集議奏聞至十四年未有定論其後臣僚議以爲若止居役不離鄉井則幾慮姦不足以懲惡若盡用配法不恤黥刺則面目一壞誰復顧藉強民適長威力有過無由自新檢照元豐刑部格諸編配人自有不移不放及移放條限政和編配格又有情重稍重情輕稍輕四等若依做舊格稍加參訂如入情重則做舊刺面用不移不放之格其次稍重則止刺額角用配及十年之格其次稍輕則與免黥刺用不刺面役滿放還之格其次最輕則降爲居役別立年限縱免之格儻有從坐編管則置之本城減其放限如此則於見行條法並無愆悞且使刺面之法專處情犯凶姦而其他偶屬於罪皆得全其面目知所顧藉可以自新省黥徒銷姦黨誠天下之切務卽詔有司裁定其後迄如舊制

嘉泰四年臣僚言配隸之人蓋有兩等其鄉民一時鬪毆殺傷及胥徒犯贓貨命流配等人設使逃逸未必能爲大過止欲從徒配本州牢城重役限滿給據復爲良民至於累犯強盜及聚衆販賣私商曾經殺傷捕獲之人非村民胥吏之比欲並配屯駐軍立爲年限限滿改刺從正軍從之

以上刑志

太祖皇帝開寶時定刑制凡流刑四徒刑五

流配舊制止於遠徙不刺而晉天福中始創刺面之法遂爲最姦重典宋因其法

開寶五年御史臺上言伏見大理寺斷徒罪人非有官當贖銅之外送將作監役者其將作監舊兼充內作又有左校右校中校署比來工役並在此司今雖有其名無復役使或遇祠祭供具水火乏人使令欲望令大理寺依格斷遣徒罪人後並送作坊應役從之

紹聖三年詔配沙門島人已溢額者並配瓊州萬安軍昌化珠崖軍定爲合

光宗紹熙二年知瓊州黃揆言今中外之姦民以罪抵死而獲貸者必盡投之海外以爲兵是聚千百虎狼而共置之一邱也今日積者已多而纍纍遞送者方來未已一旦檢惡積釁潰裂四出臣恐偏州之民項背不能帖席而臥也請自今凡兇惡貸死而隸於流籍者許分之沿江諸屯及其他遠惡之地無專指海外以爲兇藪庶幾陰消潛削不至滋蔓流毒偏方從之

三年臣僚言配法自有年限方許放停近來更不照應一二年間隨即放便是致人皆玩法以配爲常請行下諸路應犯法刺配人如至本州須依條限方許放停如限內再有所犯乞撥入屯駐軍中重役永不放便從之

開禧元年閏八月臣僚言國朝品式條章燦然備具謂人之難於離鄉井也於是有配隸羈管編管之條然非姦賊強盜殺人貨命與夫鬪傷情重者不以是罪之今世酷吏會不是思於配隸編管羈管之外自創爲押出外界之條使之蕩析離居浮游失所未免有客死異鄉之歎欲嚴飭中外自配隸編管羈管之外惟他郡作過之人許勒歸本貫其餘悉從本條科罪不得輒將土著之家人屬押

出外界從之

以上通  
考刑考

### 右配役

端拱初廣定軍民安崇緒隸禁兵訴繼母馮與父知逸離全奪資產與己子大理當崇緒訟母罪死太宗疑之判大理張佖固執前斷遂下臺省雜議徐鉉議曰今第明其母馮嘗離卽須歸宗否卽崇緒準法處死今詳案內不曾離異其證有四況不孝之刑教之大者宜依刑部大理寺斷右僕射李昉等四十三人議曰法寺定斷爲不當若以五母皆同卽阿蒲雖賤乃崇緒親母崇緒特以田業爲馮強占親母衣食不給所以論訴若從法寺斷死則知逸何辜絕嗣阿蒲何地托身臣等議田產並歸崇緒馮合與蒲同居供侍終身如是則子有父業可守馮終身不至乏養所犯並準赦原詔從昉等議

蘇州民張朝之從兄以槍斃死朝父逃去朝執而殺之審刑大理當朝十惡不睦罪死案旣去參知政事王安石朝父爲從兄所殺而朝報殺之罪止加流役會赦應原帝從安石議特釋朝不問熙寧八年洪州民有犯徒而斷杖者其餘罪會恩免官吏失出當劾中書堂後官劉袞駁議以謂律因罪人以致罪罪人遇恩者準罪人原法洪州官吏當原又請自今官司出入人罪皆用此令而審刑院大理寺以謂失入人罪乃官司誤致罪於人難用此令其失出者宜加袞議

給事中范純仁言熙寧按問欲舉條並得原減以容姦太多元豐八年別立條制竊詳已殺人強姦

於法自不當首不應更用按問減等至於貸命及持杖強盜亦不減等深爲太重按嘉祐編救應犯罪之人因疑被執贓證未明或徒黨就擒未被指說但詰問便承皆從律按問欲舉首減之科若已經詰問隱拒本罪不在首減之例此救當理當時用之天下號爲刑平請於法不首者自不得原減其餘取嘉祐編救定斷則用法當情上以廣好生之德下則無一夫不獲之寬從之

又詔諸州鞠訊強盜情理無可憫刑名無疑慮而輒奏請許刑部舉駁重行朝典無得用例破條從司馬光之請也

以上刑志

太祖皇帝開寶三年詔諸道州府應大辟罪決論錄其案朱書格律斷辭禁儀月日官典姓名以聞委刑部覆視

五年陝州言民范義超周顯德中以私怨殺同里人常古真家十二口古真小子留留脫走得免至是長大擒義超訴於官有司引赦當原上曰豈有殺一家十二口而可以赦論卽命斬之

太宗興國五年涇州言定縣婦人怒夫前妻之子婦斷其喉而殺之下詔曰刑憲之設蓋厚於人倫孝慈所生實由乎天性矧乃嫡繼之際固有愛憎之殊法貴原心理難共貫自今繼母殺傷夫前妻之子及姑殺婦者並以凡人論

慶厯開寧州童子年九歲毆殺人當棄市帝以童孺爭鬪無殺心止命罰金入死者家開封民聚童子教之有因槓楚死者爲其父母所訟府上具獄當民死宰相以爲可矜帝曰情雖可矜法亦難屈

命杖脊捨之

紹聖元年權刑部侍郎杜紘言諸州大辟本非疑慮其間有因奏裁遂獲免死而已決者不得蒙宥是因之生死惟奏與否而已詔刑部大理寺申明立法

徽宗崇寧三年大理寺言熙寧四年詔獄案不當奏而奏者大辟疑慮可憫免勘其餘並具官吏所坐刑法於案後取旨原之元祐初流罪以下不應奏而奏者勿坐故有司皆知免戾不復詳法用刑率多奏上是致奏牘滋多有煩朝廷處斷請自今並依熙寧法從之

五年詔民以罪屢法情有重輕則法有增損故情重法輕情輕法重舊有取旨之令今有司惟以情重法輕則請加罪而法重情輕則不聞奏減是樂於罪人而工於用恕非所以爲欽恤也自今宜遵舊法取旨使情法輕重各適其中否則以違制論從之

宣和六年臣僚言舊法有情輕法重情重法輕若六辟刑名疑慮並許奏裁比來諸路以大辟疑慮決於朝廷者大理寺類以不當劾之夫情理巨蠹罪狀明白裁奏以幸寬貸固在所戒然有疑而難決者一切劾之則官吏莫不便文自營臣恐天下無復以疑獄奏矣願詔大理寺並依元豐法從之高宗紹興元年以道路不通諸死囚應奏讞者權令降等斷遣慮滯獄也

二十七年十月盜發烏江縣王公哀母家有司釋之公哀手殺盜事聞其兄佐爲吏部員外郎乞納官以贖公哀之罪詔令給舍議時給舍楊椿等大略謂發冢開棺者律當絞公哀始獲盜不敢殺而

歸之吏獄成而吏出之使揚揚出入閭巷與齊民齒則地下之辱沉痛鬱結終莫之伸爲人子者尚得自比於人椿等謂公袞殺掘冢法應死之人爲無罪納官贖弟之請當不許故縱失刑有司之罪宜如律上是之詔公袞降一官佐依舊供職紹興府當職官皆抵罪

孝宗乾道六年臣僚言國家立法議罪最爲詳備大抵共毆傷殺人必有首有從甲爲首則乙以下皆從甲於法合坐死罪自乙而下並當先次決遣在外州郡如甲情理可憫方許奏裁如駐蹕之地凡罪應死者必奏徒流以下申御史臺取旨施行此定制也今有司不務遵行成法纔事涉大辟不問首從俱奏又流徒以下多作情重看詳取旨則合先次決遣之人豈得不例遭禁繫請今後大辟只許以爲首坐應死罪者奏爲從而不應坐死者先次決遣流徒罪不許牽引情重取旨不然則坐以不應奏而奏之罪從之

淳熙十三年臣僚言恭觀國朝法令諸大辟情理昭然不應奏者具奏欸申提刑司詳覆論決其有情輕法重情重法輕刑名疑慮應奏裁者徑從本州申奏錄副本申提刑司訪聞諸路憲臣間有固執偏見凡所部獄案不問應奏皆令申上俟其看詳之後方許聞奏推其本心固欲審克力不遺志竟成淹滯至有一郡之獄凡十八案申上累月不報遂致一路之獄積四百餘件終歲待報而不決請令刑部檢坐慶元敕令遍符諸路州軍合應奏者州郡徑自照條聞奏不必俟憲司回報庶使獄無淹滯從之

中書舍人葛郊言乾道六年指揮強盜並依舊法議者以爲持杖脅人以盜財者亦死是脅人與殺人等死恐非所以爲良民地後來遂立六項並依舊法處斬外餘聽依刑名疑慮奏裁自此指揮已行之後非特刑名疑慮者不死而在六項者亦爲不死法出姦生徒爲胥吏受贓之地若犯強盜者不別輕重而一於死則死者必多又非所以示好生之德也乞下有司詳議立爲定法從之其後言者又謂強盜苟不犯六項雖累行劫至十數次以上並贓至百千貫皆可以貸命謂宜除六項指揮外其間行劫至兩次以上雖是爲從亦合依舊法處斷乃詔自今應強盜除六項指揮外其間有累傷人下手放火因而行姦殺人加功已曾貸命再犯之人也

寧宗開禧元年八月知衡州張訢言國家斷獄備極詳審苟有疑慮奏裁別推又有殺人無證一條斷獄註云殺人屍不經驗與無證佐者若勘鞫證佐逃死及雖有證而於法不許爲證者同夫屍不經驗與證佐逃死事因顯然往往州郡引用失當遂致抵牾蓋謀殺劫殺則有佐而必無證關殺故殺則有證必無佐夫謂之證者旁證之謂也謂之佐者助己之謂也曰證曰佐自是二事苟有其一皆可以表殺人之然否至於不許爲證正謂殺害人親屬等人慮其私於黨與法故不許近日曲法者凡是重囚多作無證具奏且行兇之時相助協力到官之後自相供通謂之有佐可也何必更求有證至如行兇之人親屬旁援到官固無由證之理例拘親屬不許爲證承舛襲訛寢失本意請行

下刑寺及敕令所明施行刑寺奏實如所請行下諸路自今後不許將無證有佐無佐有證之獄入疑慮之色奏裁從之

三年三月吳曦以反逆誅族屬悉當連坐詔付從官給舍刑部法寺集議合得刑名吏部尚書兼給事中陸峻等議曰竊詳反逆罪父子年十六已上皆絞伯叔父兄弟之子合流三千里自有正條外所有十五以下及母女妻妾子妻妾祖孫兄弟姊妹赦無罪名律止沒官比之伯叔父兄弟之子服屬尤近卽顯沒官重於流三千里蓋緣坐沒官雖貸而不死世爲奴婢律比畜產此法雖存而不見於用其母女妻妾子妻妾祖孫兄弟姊妹合於流罪上議刑竊緣上條所載止爲謀反疏文云臣下將圖逆節者今吳曦建號稱備極僭擬反逆已成上件條未足以盡其罪請特出睿斷施行詔吳曦叛逆族屬悉合誅戮朕念其先世不忍夷滅除曦妻男並決重杖處死外其男十五以下并女及生子之妾並分送二廣遠惡州軍編管內女已出嫁者免親兄弟有官人除名勒停應吳璘位下子孫並移徙出蜀分往湖廣諸州居住吳玠位下子孫與免連坐通主吳璘墳墓祭祀令四川宣撫置司取見服屬官職照應施行訖聞奏

以上通考刑考

右詳讞





二十四史九通政典類要合編卷一百十四

宋三十八

四裔

夏國

高麗

交趾

大理

占城

真臘

蒲甘

暹羅

三佛齊

閩婆

南毗

勃泥

注華

丹眉流

天竺

于闐

夏之境土方二萬餘里其設官之制多與宋同朝賀之儀雜用唐宋而樂之器與曲則唐也河之內外州郡凡一十有二河南之州九曰靈曰洪曰宥曰銀曰夏曰石曰鹽曰南威曰會河西之州九曰興曰定曰懷曰永曰涼曰甘曰肅曰瓜曰沙熙秦河外之州四曰西寧曰樂曰鄯曰積石其地饒五穀尤宜稻麥甘涼之間則以諸河爲溉興靈則有古渠曰唐涼曰漢源皆支引黃河故灌溉之利歲無旱澇之虞其民一家號一帳男年登十五爲丁率一丁取正軍一人每百擔一人爲一抄百擔者隨軍雜役也四丁爲兩抄餘號空丁願隸正軍者得射他丁爲負擔無則許射止軍之疲弱者爲之故壯者皆習戰鬪而得正軍爲多凡正軍給長生馬馳各一團練使以上帳一弓一箭五百馬一橐駝五旗鼓槍劔棍柁枹袋披氈渾脫背索鐵鑊斤斧箭牌鐵瓜篋各一刺史以下無帳無旂鼓人各橐駝一箭二百幕梁一兵三人同一幕梁幕梁織毛爲幕而以木架有砲手二百人號濬喜陁立旋風砲於橐駝鞍轡石如拳得漢人勇者爲前軍號撞令郎若腕性無他伎者遷河外耕作或以手肅州有左右廂十二監軍司曰左廂神勇曰石州祥祐曰宥州嘉寧曰章州靜塞曰西壽保泰曰卓囉和南曰右廂朝順曰甘州甘肅曰瓜州西平曰黑水鎮燕曰白馬強鎮曰黑山威福諸軍兵總計五

十餘萬別有擒生十萬興靈之兵精練者又二萬五千別副以兵七萬爲資贖號御圍內六班分二  
番以宿衛每有事於西則自東點集而西於東則是西點集而東中路則東西皆集用兵多立虛營  
設伏兵包敵以鐵騎爲前軍乘善馬重甲刺不入用鈎索絞聯雖死馬上不墜遇戰則先出鐵騎  
突陣陣亂則衝擊之步兵挾騎以進戰則大將居後或據高險其人能寒暑饑渴出戰率用健日避  
晦日齋糧不過一旬弓皮弦矢沙柳葶惡雨雪晝舉煙揚塵夜篝火以爲候不耻奔遁敗三日輒復  
至其處提人馬射之號曰殺鬼招魂或縛草人埋於地衆射而還篤信機鬼尙詛祝每出兵則先卜  
卜有四一以艾灼羊脾骨以求兆名爻勃焦二擲竹于地若撲著以求數謂之擲算三夜以羊焚香  
祝之又焚穀火布靜處晨屠羊視其腸胃通則兵無阻心有血則不利四以矢擊弓弦審其聲知敵  
至之期與兵交之勝負及六畜之災祥五穀之凶稔俗皆土屋惟有命者得以瓦覆之

李彝興夏州人也本姓拓跋氏唐貞觀初有拓拔赤辭者歸唐太宗賜姓李置靜邊等州以處之其  
後析居夏州者號平夏部唐末拓跋思恭鎮夏州統銀夏綏宥靜五州地討黃巢有功復賜李姓思  
恭卒弟思諫代爲定難軍節度使思諫卒思恭孫彝昌嗣梁開平中彝昌遇害將士立其族子蕃部  
指揮仁福仁福卒子彝興嗣事具五代史彝興彝超之弟也本名彝殷避宋宣祖諱改殷爲興初爲  
行軍司馬清泰二年彝超卒遂加定難軍節度使晉初加同平章事開運初契丹授西南詔討使漢  
初加兼侍中周初加中書令顯德初封西平王世宗卽位加大保恭帝初加大傅宋初加太尉北漢

劉鈞結代北諸部來寇麟州尋興遣部將李彝玉會諸鎮兵禦之鈞果遂引去建隆初獻馬二百匹太祖大喜親視攻玉爲帶且召使問曰汝帥腹圍幾何使言彝與腰腹甚大太祖曰汝帥真福人也

遂遣使以幣賜之外國列傳

右夏國按夏國馬氏通考收入封建考今依宋史仍列于四裔之首

高麗本曰高句麗禹別九州屬冀州之地周爲箕子之國漢之玄菟郡也在遼東蓋扶餘之別程以平壤城爲國邑漢魏以來常通職貢亦屢爲邊寇隋煬帝再舉兵唐太宗親駕伐之皆不克高宗命李勣征之遂拔其城分其地爲郡縣唐末中原多事遂自立君長後唐同光天成中其主高氏累奉職貢長興中權知國事王建承高氏之位遣使朝貢以建爲玄菟州都督充大義軍使封高麗國王建隆三年十月昭遣其廣評侍郎李興祐副使李勵希判官李彬等來朝貢四年春制加食邑七千戶仍賜推誠順化保義功臣其國東西二千里南北五百里西北接契丹特鴨綠江以爲固江廣二百步其東所臨海水清澈下視十丈東北望明州水皆碧玉居開州蜀莫郡曰開成府依大山置宮室立城壁名其山曰神嵩民居皆茅茨大止兩椽覆以瓦者才十二以新羅爲東州樂浪府號東京百濟爲金州金馬郡號南京平壤爲鎮州號西京西京最盛總之凡二京四府八牧郡百有十八縣鎮三百九十州島三千七百郡邑之小者或只百家男女二百十萬口兵民僧各居其一地寒多山土宜松栢有稭黍麻麥而無秫以稭爲酒少絲蠶匹練直銀十兩多衣麻紵王出乘車駕牛歷山險

乃騎紫衣行前捧護國仁王經以導出令曰教曰宣臣民呼之曰聖上私謂曰嚴太后妃曰公主百官名稱階勳功臣檢校頗與中朝相類過御史臺則下馬違者有劾士人以族望相高柳崔金李四姓爲貴種無官者以世族子爲內侍六銜歲十二月朔王坐紫門小殿注官外官則付國相有國子監四門學學者六千人貢士三等王城曰土貢郡邑曰鄉貢他國人曰賓貢間歲試于所屬再試于學所取不過三四十人然後王親試以詩賦論三題謂之簾前重試亦有制科宏詞之目然特文具而已士尚聲律少通經王城有華人數百多閩人因賈舶至者密試其所能誘以祿仕或強留之終身朝廷使至有陳牒來訴者則取以歸百官以采爲奉皆給田納祿卒給死乃拘之國無私田民計口授業十六以上則充軍十六軍三衛常留官府二歲以還成西北半歲而更有警則執兵任事則服勞事已復歸農畝王亦有分地以供私用王母妃主世子皆受湯沐田上下以賈販利入爲事日中爲虛用米布貿易地產銅不知鑄錢中國所予錢藏之府庫時出傳餽而已崇寧後始學鑄錢有海東通寶重寶二種通寶二種錢然其俗不便也兵器疏簡無強弩大刀崇尙釋教雖王子弟亦常一人爲僧信鬼拘陰陽病不相視斂不撫棺貧者死則露置中野歲以建子月祭天國東有穴號歲神常以十月望日迎祭謂之八關齋禮儀甚盛王與妃嬪登樓大張樂宴飲賈人曳羅爲幕至百正相聯以示富三歲大祭祠遍其封內因是斂民財而王與諸臣分取之祖廟在國門之外大祭則具車服冕圭親祠王城有佛寺七十區而無道觀大觀中朝廷遣道士往乃立福源院置羽流十餘輩俗

不知鑿自王侯來請醫後始有道其術者人首無枕骨背扁側男子巾幘如唐裝婦人髮髻垂右肩餘髮被下約以絳羅貫之簪旋襪重疊以多爲勝男女自爲夫婦者不禁夏月同川而浴婦人僧尼皆男子拜樂聲甚下無金石之音旣賜樂乃分爲左右二部左曰唐樂中國之音也右曰鄉樂其故習也堂上設席升必脫履見尊者則膝行必跪應必唯其拜無不答子拜父猶半答其禮性仁柔亞殺不屠宰欲食羊豕則包以蒿而燔之刑無慘酷之科唯惡逆及罵父母者斬餘皆杖肋外郡刑殺悉送王城歲以八月減囚死罪貸流諸島累赦眠輕重原之自明州定海遇便風三日入洋又五日抵墨山入其境自墨山過島嶼詰曲礁石間舟行甚駛七日至禮成江江居兩山間東以石岐湍激而下所謂急水門最爲險惡又三日抵岸有館曰碧瀾亭使人由此登陸崎嶇山谷四十餘里乃其

國都云

外國列傳

昔麗人之來率由登萊登萊距梁汴山河之限甚遠也今日三韓直趨四明四明距行都限一浙江爾雖自明而麗海道渺瀰中隔洲島凡海中之地大曰洲洲之小者曰島島之小者曰嶼隨其大小有千百十家之聚惟無草木而有石者曰礁而海深無際曰洋海舟之行觸礁則摧入洋則覆又有黑風海動之變遇之則天地晦冥波濤鼎沸故舟人每委曲避就出急水門至郡山島始謂平遠非數十日不至也然南北行各遇順風則懸險如夷楊應忱戊申之役其回也九月癸未發三韓戊子至明州之昌國縣僅六日耳海道之當防如此

通考四  
備考

右高麗國

交趾本南越之地漢武平南越分其地爲儋耳珠崖南海蒼梧鬱林合浦交趾九真曰南凡九郡置交趾刺史以領之後漢置交州晉宋齊梁陳因之又爲交趾郡隋平陳廢郡置州煬帝初廢州置郡唐武德中改交州總管府至德中改安南都護府梁貞明中土豪曲承美專有其地送款於末帝因授承美節鉞時劉隱擅命嶺表遣將李知順伐承美執之乃并有其地後有楊廷藝紹洪皆受廣南署繼爲交趾節度使紹洪卒州將吳昌及遂居其位昌及死其弟昌文龍乾德初昌文死其參謀吳處珩峇州刺史矯知護武寧州刺史楊暉牙將杜景碩等爭立管內一十二州大亂部民嘯聚起爲寇盜攻交州先是楊廷藝以牙將丁八著攝驩州刺史兼禦蕃都督部領卽其子也八著死部領繼之至是部領與其子璉率兵擊敗處珩等賊黨潰散境內安堵交民德之乃推部領爲交州帥號曰大勝王署其子璉爲節度使凡三年璉位璉立七年間嶺表平遂遣使貢方物上表內附

外國列傳

右交趾國

大理國卽唐南詔也熙寧九年遣使貢金裝碧玕山種扇刀劍犀皮甲鞍轡自後不常來亦不領於鴻臚政和五年廣州觀察使黃璠奏南詔大理國慕義懷徠願爲臣妾欲聽其入貢詔璠置局於賓州凡有奏請皆俟進止六年遣進奉使天驕奴彥貴李紫琮副使坦綽李伯祥來詔璠與廣東轉運副使徐揚偕詣闕其所經行令監司一人主之遣出荆湖南當由邵州新化縣至鼎州一路御史劾

其嘗農事之際而觀望勞民詔罷方紫琮等過鼎聞學校文物之盛請於押伴求詣學瞻拜宣聖像  
邵守張察詩之遂往遍謁見諸生又乞觀御書閣舉笏扣首七年二月至京師貢馬二百八十四匹及  
麝香牛黃細氈碧玕山諸物外國列傳

右大理國

占城國在中國之西南東至海西至雲南南至真臘國北至驪州外界海南去二佛齊五日程陸行  
至賓陀羅國一月程其國隸占城焉東去麻逸國二日程滿端國七日程北去廣州便風半月程東  
北至兩浙一月程西北至交州兩日程陸行半月程其地東西七百里南北二千里南曰施儂州西  
曰上原州北曰烏里州國無城郭有百餘村材落戶二五百或至七百亦有縣鎮之名宋太祖建隆  
二年其王釋利因陀羅遣使蒲訶散來表章書於貝多葉以香木函盛之貢犀牙龍腦香藥孔雀四  
大食瓶二十使回錫賚有差以器幣優賜其王三年乾德四年開寶二年五年六年七年九年太平  
興國二年三年四年俱遣使入貢六年交州黎桓上言欲以占城俘九十三人獻於京師太宗令廣  
州止其俘存撫之給衣服資糧遣還占城詔諭其王七年八年俱入貢雍熙二年遣使入貢且訴爲  
交州所侵詔荅令保國睦鄰三年入貢儋州言占城人蒲羅邊爲交州所逼率其族百口來附四年  
秋廣州上言雷恩州開送占城人夷斯當李娘并其族一百五十人來歸分隸南海清源縣端拱元  
年廣州又言占城夷人忽官等族二百一人來附淳化元年遣使貢方物且訴爲交州所攻國中



民財寶皆爲所掠上賜黎桓詔令各守境二年遣使貢方物至道元年其王遣使來朝貢奉表詞甚恭順且言臣本國元有流民三百散居南海曾蒙聖旨許令放還今有猶在廣州者本國舊有進奉夷人羅常占見駐廣州乞詔本州盡數點集令船舶乘便風部領歸國上覽表詔還使廣州詢問願還者悉復使回復賜良馬一遂爲常制咸平二年景德元年俱入貢詔以良馬介胄戎器賜之四年遣使奉表來朝表函藉以文錦其使言本國舊隸交州後奔於佛逝北去舊所七百里使還賜物甚厚大中祥符三年來貢四年又遣使貢獅子詔畜於苑中使者留一蠻人以給養上聽其懷土厚給資糧遣還八年天祐二年並遣入貢二年其使還詔賜國王銀四千七百兩并戎器鞍馬海上又有蒲端國三麻蘭國勿巡國蒲婆眾國太平祥符四年祀汾陰並遣使來貢蒲端國王上言伏見詔旨給賜占城使鞍勒馬人神旗各各乞如恩例有司以蒲端在占城下請賜雜絲小旗五從之天聖八年入貢慶曆二年獻馴象皇祐二年貢方物表一通一以蕃書一以中國書五年嘉祐元年俱入貢六年獻馴象七年正月廣西經略司言占臘素不習兵與交趾鄰常苦侵軼而占城復近脩武備以抗交趾將緣廣東路入貢望撫以恩信五月入貢賜白馬一觀寧元年入貢乞市驃馬詔賜白馬一令於廣州置驛以歸五年貢方物七年交趾李乾德言其王領兵二千人并妻子來降且言其國自海道抵真臘一月程西北抵交州四十日皆山路所治聚落一百五大略如州縣後討交趾以其素仇遣使詔以乘機協力蕩除使還言其國選兵七千扼賊要路其王以木葉蕃書回牒詔使上之

然亦不能成功後兩國同入貢占城使者乞避交人詔遇朔日朝文德殿分東西立望日則交人入  
垂拱而占城趨紫宸大燕則東西坐元祐七年又表言如天朝討交趾願率兵掩護朝廷以交趾數  
入貢不絕臣節難以興師荅敕書報之而以其使良保故倫軋丹副使傍木知突爲保順郎將政和  
中授其王楊卜麻疊金紫光祿大夫領兼白州刺史卜麻疊言身糜化外不常祿食願得薄受俸給  
壯觀小蕃許之宣和元年進檢校司空兼御史大夫懷遠軍節度使琳州管内觀察處置等使封占  
城國王自是每遇郊恩輒降制加封邑其州所統大小州二十八通不盈二萬家稅磚爲城護以石  
塔其戎器以標鎗勝牌竹爲弓無鎗箭戰則五人爲甲走則同甲皆坐山多香木每歲官監民入山  
斫香輸官謂之身丁香如中國身丁鹽稅之類納足聽民貿易商船到其國則差蕃官摺黑皮爲策  
書曰字鈔物數監盤上岸十取其二外聽交易建炎元年國王入貢遇郊恩制授檢校太傅加食邑  
後以爲常紹興二十五年其子鄒時巴蘭嗣立貢方物求封爵詔授以其父官乾道二年其子鄒亞  
娜遣使入貢詔受其獻十分之一既而福建市舶司言大食國人烏師點等訴占城入貢卽所奪本  
國物上以爭訟卻之詔學士院荅敕洪邁引崇寧故事乞用金花綾紙寫詔禮部郎中李燾上言當  
從紹興二十五年例用白藤紙況今進貢非實卻而不受豈宜更優其禮上曰李燾之論有理卽用  
近例邁以爲侵官自是與燾有隙臣僚亦言鄒亞娜承襲若以禮入貢則當議封旣與大食爭訟難  
卽降詔俟再貢如禮然後賜命乾道七年閩人有泛海官去陽軍者飄至占城負其國與真臘乘象

以戰無大勝負乃說玉以騎戰教之弓弩騎射其王大悅具舟送之吉陽厚齋隨以買馬得數十疋以戰則克次年復來人徒甚盛瓊州不受怒歸肆行劫掠迨熙二年詔帥臣張叔草書付瓊管司諭以中國馬自來不許出外界令還所掠人口等自今不得生事知吉陽軍林寶慈令王三俊指引占城國人買馬圖利令本司取勘具奏三年占城發回所掠人口見存八十三人又申乞與本蕃通商詔試行下瓊管司朝廷加惠外國各已有市舶司主管交易海南四郡卽無通商條令仰遵依自來體例施行迨熙四年五月以舟師襲真臘請和不許殺之遂爲大豐慶元己未真臘大舉入占城停其主戮其臣僕勳殺幾無唯類更立真臘人爲主

通考四  
裔考

右占城國

真臘國亦名占臘其國有占城之南東際海西接蒲甘南抵加羅希其縣鎮風俗同占城地方七千餘里有銅臺列錫塔二十有四銅象八以鑲其上象各重四千斤其國有戰象幾二十萬馬多而小建炎二年以郊恩授其王金哀質深檢校司徒加食邑遂定爲常制其屬邑有真里富在西南隅東南接波斯蘭西南與登流眉爲鄰所部有六十餘聚落慶元六年其國王立二十年矣遣使奉表貢方物及馴象二詔優其報賜以海道遠涉後毋再入貢

外國  
列傳

真臘國在林邑西南本扶南之屬國也去日南郡舟行六十日而至南接車渠國西有朱江國其王姓利氏名質多斯那自其祖漸已強盛至質多斯那遂兼扶南而有之死子伊奢那先代立居伊奢

那城郭下一萬餘家城中有一大堂是其王聽政所總二十所城有數千家各有部帥官名與林邑同其王三日一聽朝其國北多山阜南有水澤地氣尤熱無霜雪饒瘴癘毒蟲宜梁稻少黍粟菓菜與日南九真相類異者有婆羅那樹無花葉似柿實似冬瓜庵羅花葉似棗實似李毗野樹花似木瓜葉似杏實似楮婆田羅樹花其葉實並似棗而小異歌畢佗樹花似林檎葉似榆而厚大實似李其大如升自餘多同九真海有餘名建同四足無鱗鼻如象吸水上噴高五六十尺有浮胡魚形似鮪背如鸚鵡有八足多大魚半身出望之如山每五六月中毒氣流行卽以白猪白羊於城西門外祠之不然五穀不登畜多死人疾病近都有陵伽鉢婆山上有神祠每以兵二千人守衛之城東神名婆多利祭用人肉其王年別殺人以夜祠禱亦有守衛者千人其敬鬼神如此

通考四  
裔考

### 右真臘國

蒲甘國崇寧五年遣使入貢詔禮秩視注聲尚書省言注聲役屬三佛齊胡熙寧中敕書以大背鞞織以匣襪今蒲甘乃大國王不可下視附庸小國欲如大食交趾諸國禮凡制詔並書以白背金花綾紙貯以閒金鐵管需用錦絹夾襪緘封以往從之

外國  
列傳

### 右蒲甘國

遼黎國元祐四年般次冷移四捺粟迷等貢于闐國黑汗王并本國王表章來有司以其國未嘗入貢請視于闐條式從之

外國  
列傳

右邊黎國

三佛齊國蓋南蠻之別種與占城爲隣開於真臘闍婆之間所管十五州土產紅藤紫銅筆沈香檳榔子無縉錢土俗以金銀貿易諸物四時之氣多熱少寒冬無霜雪人用香油塗身其地無麥有米及青白豆雞魚鵝鴨類中土有椰花酒椰子酒檳榔酒皆非麴蘖所醞飲之亦醉樂有小琴小鼓峴嶠奴踏曲爲樂國中文字用蕃書以其王指環爲印亦有中國文字上章表即用馮果覽爲城周數千里用椰葉覆屋人民散居城外不輸租賦有所征伐隨時調發立酋長率領皆自備兵器糧糗汎海便風二十日至廣州如泉州舟行順風月餘亦可到國人多姓蒲習水陸戰臨敵敢死伯於諸國其國在海中扼諸蕃舟車往來之咽喉若商船過不入卽出船合戰期以必死故諸國之舟輻湊焉宋建隆元年九月其王悉利胡大霞里禮遣使李遮帝來朝貢

通考四  
裔考

右三佛齊國

闍婆國在南海中其地平坦宜種植產稻麻粟豆無麥民輸十一之租煮海爲鹽多魚蠶雞鴨山羊兼椎牛以食果實有木瓜椰子蕉子甘蔗芋出金銀犀牙箋沈檀香茴胡椒檳榔硫黃紅花蘇木亦務蠶織有薄絹絲絳吉貝布藍銀葉爲錢博易官以粟一斛二斗博金錢室宇壯麗飾以金碧中國賈人至者待以賓館食豐潔地不產茶其酒出於椰子及蝦蟇丹樹之中蝦蟇丹樹華人未嘗見或以梳榔橫榔醱成亦甚香美不設刑禁雜犯罪者隨輕重出黃金以贖惟寇盜者殺之宋太宗道

化二年十二月其王穆羅茶遣使陀湛副使蒲亞理判官李陀那假澄等來朝貢陀湛云中國有真主本國乃脩朝貢之禮國王貢象牙真珠繡花銷金及繡絲絞雜色絲絨吉貝織雜色絨布檀香玳瑁檳榔盤犀裝劍藤織花篋白鸚鵡七寶飾檀香亭子其使別貢玳瑁龍腦丁香藤織花篋先是朝貢使汎船船六十日至明州定海縣掌市舶監察御史張肅先釋奏其使飾服之狀與嘗來入波斯相類譯者言云金主舶大商毛旭者建溪人數往來本國因假其鄉導來朝貢又言其國王一號曰夏至馬囉夜王妃曰落肩娑婆利本國亦署置僚屬又其方言目舶王爲勃荷王妻曰勃荷比尼曠其船中婦人名眉珠椎髻無首飾以蠻布纏身顏色青黑言語不能曉拜亦如男子膜拜一子頂戴金連鎖子手有金鉤以帛帶繫之名阿嚕其國與三佛齊有讎怨互相攻戰本國山多猴不畏人呼以霄霄之聲卽出或投以果實則有大猴一先至土人謂之猴王猴夫人食畢羣猴食其餘使既至上令有司優待之久使還賜金帛甚厚仍賜良馬戎具以從其請其使云鄰國名婆羅門有法善察人情人欲相危害者皆先知之又有摩逸國太平興國七年載寶貨至廣州海岸大觀三年闍婆復遣使入貢詔禮之如交趾建炎三年制授懷遠軍節度琳州管內觀察處置等使金紫光祿大夫檢校司空使持節琳州諸軍事琳州刺史兼御史大夫上柱國闍婆國王食邑二千四百戶食實封一千戶悉里地茶蘭固野可特授檢校司空加食邑實封以南郊加恩也自後每遇大禮必加食邑

四裔考

右閩婆國

南毗國在大海之西南由三佛齊風颺月餘可至其國王每巡行先期遣兵百餘人持水灑地上以防颺風揚沙塵列鼎百以進食日一易之置翰林官供王飲食俗喜戰鬪習刀稍善射鑿雜白銀爲錢產眞珠番布其國最遠番船罕到時羅巴智力干父子其種類也居泉之城南自是船舟多至其

外國  
列傳

右南毗國

勃泥國在京都西南大海中其國以板爲城城中居者萬餘人所統十四州其王所居屋覆以貝多葉民舍覆以草在王左右者爲大人王坐繩牀若出卽太布單坐其上眾昇之名曰阮囊戰鬪者則持刀被甲甲以銅鑄狀若大筒穿之於身護其腹背其地無麥有麻稻又有羊皮雞魚無蠶絲用吉貝花織成布飲椰子酒婚聘之資先以椰子酒檳榔次之指環又次之然後以吉貝布或量出金銀成其禮喪葬亦有棺斂以竹爲鑿載棄山中二月始耕則祀矣以十二月七日爲歲節地熱多風雨國人宴會鳴鼓吹笛擊鉦歌舞爲樂無器皿以竹編貝多葉爲器盛食食訖棄之其國隣於底門國有藥樹取其根煎爲膏服之及塗其體兵刃所傷皆不死前代未嘗朝貢故史籍不載宋太平興國二年其王向打遣使齎表貢大片龍腦光龍腦蒼龍腦玳瑁檀香象牙其表以數重小囊緘封之非中國紙類木皮薄整滑色微綠而長數尺闊寸餘橫卷之僅可盈握元豐五年二月其王錫理麻喏

復遣使貢方物其使乙從前州乘海船歸國從之

通考四  
商考

### 右勃泥國

注營國東距海五千里西至西天竺千五百里南至羅蘭一千五百里北至頓田二千里自古不通中國今國主相傳三世矣民有罪卽命侍郎一員處治之輕者繫於木格笞五七十至一百重者則斬或以象踐殺之其宴則國主與四侍郎膜拜於階遂共坐作樂歌舞不飲酒而食肉俗衣布亦有餅餌嘗饌執事有婦人其嫁娶先用金銀指環使媒婦至女家後三日會舅家親族約以土田生畜檳榔酒等稱其有無爲禮女家復以金銀指環越諾布及女所服錦衣遺婿若男欲離女則不取可財女欲卻男則倍償之其兵陣用象居前小牌次之梭槍次之長刀又次之弓矢在後四侍郎分領其版國東南約一千五百里有悉蘭池國或相侵伐地產眞珠象珊瑚玻璃檳榔豆蔻吉貝布獸有山羊黃牛禽有山雞鸚鵡果有餘甘蔗蔗千年棗椰子甘羅峴嶠梅婆羅蜜之類花有白茉莉散絲蛇膽佛桑麗秋青黃碧婆羅璫蓮蟬紫水蕉之類五穀綠黑豆麥稻地宜竹自昔未嘗朝貢宋太宗祥符八年九月其國主羅茶羅乍遣進奉使侍郎娑里三文副使滿加心判官翁勿防援官亞勤加等奉表來貢三文等以盤捧眞珠碧玻璃升殿布於御坐前降殿再拜譯者導其言曰願以表遠人慕化之意初羅茶羅乍聞商船言且曰十年來海無風濤古老傳云如此則中國有聖人故遣三文等入貢三文離本國舟行七十七晝夜歷那勿丹山婆里西蘭山至占賓國又行六十一晝夜歷伊



麻羅里山至古羅國國有古羅山因名焉又七十一晝夜歷加入山古不牢山舟寶龍山至三佛行  
齊國又行十八晝夜度嶺山水口歷天竺山至賓頭狼山望東西王母冢距舟所將百里又行二十  
晝夜度羊山九星山至廣州之琵琶洲離本國凡千一百五十日至廣州焉詔閣門祇候史祐之館  
伴凡宴賜恩例同龜茲使

通考四  
備考

### 右注蠻國

丹肩流國其俗以版爲屋跣足衣布無紳帶以白紵纏其首貿易以金銀其主所居廣袤五里無城  
郭出則乘象車亦有小馴地出犀象鑰石紫草蘇木諸藥四時炎熱無雪霜未嘗至中國咸平四年  
國主多須機遣使打吉馬副使打臘判官皮泥等九人來貢木香千斤鑰鐵各百斤胡黃連二千五  
斤紫草百斤紅氈一合花布四段蘇木萬斤象牙六十一株召見崇德殿賜以冠帶服物及還又賜  
多須機詔書以敦獎之

外國  
列傳

### 右丹眉流國

天竺國舊名身毒亦曰摩伽陀復曰婆羅門俗宗浮圖道不飲酒食肉漢武帝遣使十餘輩聞出西  
南指求身毒爲昆明所閉莫能通至漢明帝夢金人於是遣使天竺問佛道法由是其教傳於中國

外國  
列傳

乾德三年滄州僧道圓自西域還得佛舍利一水晶器具葉梵經四十夾來獻道圓天福中詣西域

在途十二年住五印度凡六年五印度即天竺也還經于闐與其使偕至太祖召問所歷風俗山川道里一一能記四年僧行動等一百五十七人詣闕上言願至西域求佛書許之以其所歷甘沙伊肅等州焉者龜茲于闐割祿等國又歷布路沙加濕彌羅等國並詔諭令人引導之開寶後天竺僧持梵夾來獻者不絕

通考四裔考

### 右天竺國

建隆二年十二月于闐國主李聖天遣使貢圭一以玉爲神使者言國城東有白玉河西有綠玉河次西有烏玉河源出崑崙山去國城西千三百里每歲秋水小之後國人取玉於河謂之撈玉官取之後方許私取以葡萄酒爲酒味極醇美乾德三年五月于闐僧善名善法來朝賜紫衣嘉祐八年八月遣使貢方物十一月以其國王爲特進歸忠保順碯麟黑韓王于闐謂金翅鳥爲碯麟黑韓蓋可汗之訛使言其王乞此號云熙寧以來遠不踰一一歲近則歲再至所貢珠玉珊瑚翡翠象牙乳香木香琥珀花蕊布砵砂龍鹽胡錦玉鞞轡馬臙膂金星石水銀安息雞舌香有所持無表章者每賜以暹錦旋襪衣金帶器幣宰相則盤毬雲錦夾襪地產乳香來輒羣負私與商賈牟利不售則歸諸外府得善價故其來益多八年請討夏國不許紹聖中其王阿忽都董娥密竭篤又言緬藥家作過別無報效已遣兵攻甘沙肅三州詔厚答其意知秦州游師雄言于闐大食拂菻等國貢奉般次踵至有司憚於供養扣留邊方限一歲一進夷狄慕義萬里而至此非所以來遠人也從之自是

訖於宣和朝貢不絕

通考四  
裔考

右于闐國

二十四史九通政典類要合編卷二百十五

宋三十九

四裔

高昌 回鶻 大食 層檀 龜茲 沙州 拂菻 法求國 定安國 渤海國  
日本國 党項 吐蕃 附喇嘛囉 董德 阿里骨 隴征 趙思忠諸國

高昌國漢車師前王之地位有高昌城取其地勢高故人民昌盛以為名焉宋太祖建隆三年四月西州回鶻阿都督等四十二人以方物來貢乾德三年十一月西州回鶻可汗遣僧法淵獻佛牙琉璃器琥珀蓋太平興國六年其王始稱西州外生師子王阿厮蘭漢遣都督麥索溫來獻五月太宗遣供奉官王延德殿前承旨白勛使高昌八年其使安鶴盧來貢雍熙元年四月王延德等還叙其水程來獻云初自夏州歷王亭鎮次歷黃羊平其地平而產黃羊渡沙磧無水行人皆載水凡二日至都囉囉族漢使過者遺以財貨謂之行當次歷茅女嗚子族族臨黃河以羊皮為囊吹氣實之浮於水或以囊駝牽木筏而渡次歷茅女王子開道族行入六窠沙沙深三尺馬不能行行者皆乘囊駝不育五穀沙中生草名登相收之以食次歷樓子山無居人行沙磧中以日為占旦則昔日暮則向日日中則止夕行望月亦如之次歷卧梁劾特族地有都督山唐回鶻之地次歷大畢太子族族接契丹界人衣尚錦繡器用金銀馬乳釀酒飲之亦醉次歷屋地因族蓋達于于越王子之子次至達于于越王子族次歷搜利王子族有合羅川唐回鶻公主所居之地城基尚在有湯泉池次歷阿墩族經馬駿山望鄉嶺嶺上石龕有李陵題字處次歷格囉美源西方百川所會極望無際鷗鷺雁

之類甚衆次至托邊城亦名李僕射城城中首領號通天王次歷小石州次歷伊州將陳氏其先  
自唐開元二年領州凡數十世唐時詔勅尙在地有野鷺生苦參上可爲綿帛有羊尾大而不能走  
尾重者二斤小者一斤肉如熊白而其美又有礪石剖之得蜜鐵謂之喫鐵石又生梧桐樹經兩卽  
生胡桐律次歷益都次歷納職城城在大患鬼魅磧之東南望玉門關甚近地無水草載糧以行凡  
三日至鬼谷口避風驛用本國法設祭出詔神禦風風乃息凡八日至澤田寺高昌閩使至遣人來  
迎次歷地名寶莊又歷六種乃至高昌高昌卽西州也其地南距于闐西南距大食波斯西距西天  
步路涉雪山葱嶺皆數千里地無雨雪而極熱每盛暑居人皆穿地爲穴以處飛鳥羣萃河濱或起  
飛卽爲日氣所燠墜而傷鬢屋室覆以白堊雨及五寸卽廬舍多壞有水源出金嶺導之周圍國城  
以溉田園作水碓地產五穀惟無蕎麥貴人食馬餘食羊及鳧鴈樂多琵琶篋篋出貂鼠白氈繡文  
花氈布俗好騎射婦人戴油帽謂之蘇幕遮用開元七年歷以二月九日爲寒食餘一社冬至亦然

外國  
列傳

右高昌國

回鶻本匈奴之別裔在天德西北安陵水上後魏號鐵勒唐初號特勒後稱回紇其君長曰可汗後  
唐同光中冊其國王仁美爲英義可汗仁美卒其弟仁裕立冊爲順化可汗晉天福中又改爲奉化  
可汗仁裕卒子景瓊立先是唐朝繼以公主下嫁故回鶻世稱中朝爲舅中朝每賜答詔亦有外甥

五代之後皆因之隆建二年景瓊遣使朝獻三年阿都督等四十二人以方物來貢端拱二年九月回  
鶻都督石仁政麼囉王子逸孛王子越黠黃水州巡檢四族並居賀蘭山下無所統屬諸部入貢多  
由其地麼囉王子自云向爲靈州馮暉阻絕由是不通貢奉今由內附意各以錦袍銀帶賜之外國列傳

### 右回鶻國

大食國本波斯之別種隋大業中波斯有桀黠者探穴得文石以爲瑞乃糾合其衆剽略資貨聚徒  
浸盛遂自立爲王據有波斯國之西境外國列傳

乾德四年僮行勤游西域因賜王書以招懷之開寶元年遣使來朝貢四年又貢方物以其使李訶  
末爲懷化將軍特以金花五色綾紙寫官詔以賜是年本國及占城闍婆又致貢物於李煜煜不敢  
受遣使來上因詔今以勿以爲獻六年遣使來貢方物七年九年皆遣使入貢太平興國二年遣使  
貢方物其從者目深體黑謂之崑崙奴詔賜其使襲衣器幣從者縑帛有差至道元年其國舶主蒲  
押陀黎齋蒲希密表獻白龍腦腦膈龍睛龍鹽眼藥白沙糖千年棗五味子扁桃薔薇水乳香山子華  
錦駝馬褥面白越諾引對於崇政譯者代奏云父蒲希密因緣射利泛舶至廣州逮今五稔未歸殿  
母令臣遠來尋訪昨至廣州見之具言前歲蒙皇帝聖恩降赦書賜以法錦袍紫綾纏頭閒塗金銀  
鳳瓶一對綾絹二十疋今令臣奉章來謝以方物致貢太宗因問其國對云與大秦國相隣爲其統  
屬今本國所管之民甚及數千有都城界山海間又問其山澤所出對云唯犀象香藥問犀象以何

法可取對云象用象媒誘致漸以大繩羈縻之耳犀則使人升大樹操弓矢伺其至射而殺之其小者不用弓矢可以捕獲上賜以襲衣冠帶被褥等物景德元年又遣使來時與二佛齊蒲端國使並在京師會上元館鐘皆賜錢縱其宴飲其年秋蕃客蒲加心至四年又遣使同占城使來優加館餘之禮許徧至苑囿寺觀遊覽大中祥符元年十月車駕東封陔渡離上言願執方物赴泰山從之自國初以來數入貢路繇沙州涉夏國抵秦州乾興初趙德明請道其國中不許至天聖元年來貢恐爲西人鈔掠乃詔自今取海路繇廣州至京師至和嘉祐間四貢方物最後以其首領蒲沙乙爲武寧司階每入貢朝廷視其物多寡加賜答之其國在泉州西北自泉州發船四十餘日至藍里博易住冬次年再發順風六十餘日方至其國本國所產多運載與二佛齊貿易商賈轉販以至中國其國雄壯其地廣袤民俗侈麗甲於諸蕃天氣多寒雪厚二三尺如背毯毳國諸蕃衝要其王錦衣玉帶躡金履朔望則戴百寶純金冠其居以瑪瑙爲柱綠甘爲壁水晶爲瓦礫石爲甍活石爲灰帷幕之屬悉用百花錦官有丞相太尉各領兵馬一萬餘人馬高七尺士卒驍勇民居屋宇與中國同但瓦則以薄石爲之市肆諠譁金銀綾錦之屬種種而聚技巧咸精建炎二年張浚奏大食國遣使進奉珠玉寶貝等物已至熙州上宣諭曰大觀宣和間車馬之政廢川荃不以博馬惟市珠玉故馬政浸缺武備不脩致胡虜亂華危弱之甚今若復捐數十萬緡貿易無用珠玉曷若惜財以養戰士宜以禮贈賄而謝遣之乃詔張浚並不得受量度支賜以答遠人之意紹興元年六月俱以船舶

入貢乾道四年進貢方物初遣使資寶貝象牙乳香等入貢舟至上占城爲所奪訴於福建市舶上令

以禮遣回

通考四  
商考

### 右大食國

層檀國在南海傍城距海二千里宋熙寧四年始入貢海道使風行百大令日經勿巡古林三條齊國乃至廣州其王名亞美羅亞眉蘭傳國五百年十世矣人語音如大食地春暖貴人以越布織頭服花錦白疊布出入乘象馬有傳祿其法輕罪杖重死斃有稻粟麥食有魚豕有胡羊山羊沙牛水牛橐駝馬犀象藥有木香血竭沒藥臘砂阿魏薰陸產珍珠玻璃密沙華三酒交易用錢官自鑄三分其齊金銅相半而銀居一分禁民私鑄元豐六年使保順郎將層伽尼再至神宗念其絕遠詔頒賚如故事仍加賜白金二千兩

通考四  
商考

### 右層檀國

龜茲本回鶻別種其國主自稱師子王衣黃衣寶冠與宰相九人同治國事國城有市井而無錢貨以花蓋布博易有米麥瓜果西至大食國行六十日東至夏州九十日或稱西州回鶻或稱西州龜茲又稱龜茲回鶻自天聖至景祐四年入貢者五最後賜以佛經一藏熙寧四年使李延慶曹福入貢五年又使盧大明篤都入貢紹聖三年使大首領阿連撒羅等二人以表章及玉佛至洮西熙河經畧使以其罕通使請令於熙秦州博買而估所齎物價答賜遣還從之

外國  
列傳



自龜茲羸六百里踰小沙磧有跋祿迦小國也一日五墨卽漢姑墨國橫六百里縱二百里風俗文字與龜茲同言語少異出細氍毹西二百里度石磧之凌山蔥嶺北原也水東流春夏山谷積雪西北五百里至素葉水城比國商胡雜居素葉以西數十城皆立君長役屬突厥自素葉水城至羯霜那國衣氍毹皮毯以繒繞額素葉城西四百里至于泉地羸二百里南雪山二垂平陸多泉池因名之突厥可汗歲避暑其中羣羆鹿飾鈴鑼可狎也西羸百里至咀邏私城亦比國商胡雜居有小城三百里本華人爲突厥所掠羣保此尙華語西南羸二百里至泉城原限膏腴南五十里有奴赤建國廣千里地沃宜稼多葡萄又二百里卽石國宋太宗祥符二年龜茲王可汗遣使貢方物天禧四年又貢

通考四裔考

### 右龜茲國

沙州本漢燉煌故地唐天寶末陷于西戎大中五年張義潮以州歸順詔建沙州爲歸義軍至宋崇寧時張氏之後絕州人推長史曹義金爲帥義金卒子元忠嗣建隆二年加元忠中書令子延首爲瓜州防禦史興國五年元忠卒子延祿遣人來貢贈元忠燉煌郡王授延祿本軍節度五年延祿爲從子宗壽所害宗壽權知留後而以其弟宗允權知瓜州表求旌節乃授宗壽節度使宗允檢校尙書左僕射知瓜州宗壽子賢順爲衙內都指揮使大中祥符末宗壽卒授賢順本軍節度使延惠爲檢校刑部尙書知瓜州賢順表乙金字藏經洎茶藥金箔詔賜之至天聖初遣使來謝貢乳香礪砂玉

團自景祐至皇祐中凡七貢方物

外國列傳

### 右沙州國

拂菻國南東至滅力沙北至海皆四十程西至海二十程東自西大石及于闐回紇達靺靱唐乃抵中國歷代未嘗朝貢至宋元豐四年十月其王滅力沙靈改撒始遣大首領你厮都令厮孟判來獻鞍馬刀劍眞珠言其國地甚寒土屋無瓦產金銀珠胡錦牛羊馬獨峯駝梨杏十年果巴槽粟麥以蒲萄釀酒藥有箏篥胡琴小篳篥偏鼓王服紅黃衣以金線織絲布纏頭歲二月則詣佛寺坐紅床使人昇之貴人如王之服或青綠緋白粉紅紫褐並纏頭跨馬城市田野皆有首領主之每歲爲夏秋兩得俸給金錢錦穀帛以治事大小爲差刑罰罪輕者杖數百重者至二百大罪則盛以毛囊投諸海不尙鬪戰鄰國小有爭但以文字往來相詰問事大亦出兵鑄金銀爲錢無穿孔面鑿彌勒佛皆爲王名禁民私造元祐六年其使兩至詔別賜其王帛二百疋白金餅對衣金束帶

按唐史有拂菻國以爲卽古大秦也然大秦自後漢始通中國歷晉唐貢獻不廢而宋四朝史拂菻傳則以爲其國歷代未嘗朝貢至元豐時始遣使入獻方物今以二史兩拂菻傳參之唐傳言其國西瀕大海宋傳則言西至海尙三千程而餘界亦齟齬不合土產風俗亦不同恐是其名偶同而非大秦也今故以唐之拂菻附入大秦而此拂菻自爲一國云

通考四  
疏考

### 右拂菻國

流求國在泉州之東有海島曰澎湖烟火相望其國塹柵三重環以流水植棘爲藩以刀稍弓矢以  
鼓爲兵器時月盈虧以紀時無他奇貨商賈不通厥土沃壤無賦斂有事則均稅旁有毗舍邪國諸  
言不通袒裸肝睢殆非人類淳熙間國之酋豪嘗率數百董莽至泉之水灣圍頭等村肆行殺掠喜  
鐵器及匙筋人閉戶則免但剽其門圈而去擲以匙筋則賴捨之見鐵騎則爭剽其甲斷首就戮而  
不知悔臨敵用標槍繫繩十餘丈爲操縱蓋惜其鐵不忍棄也不駕舟楫惟縛竹爲符急則羣舁之  
泗水而遁外國  
列傳

### 右流求國

安安國本馬韓之種爲契丹所攻破其酋帥糾合餘衆保于西鄙建國改元自稱定安國開寶三年  
其國王列萬華因女眞遣使入貢乃附表貢獻方物太平興國中太宗方經營遠略討擊契丹因降  
詔其國令張犄角之勢其國亦怨寇讎侵侮不已聞中國用兵北討欲依王師以據宿憤得詔大喜  
六年冬會女眞遣使來貢路由本國乃托其使附表來上云定安國王臣烏玄明言伏遇聖主治天  
地之恩撫太宗賜以詔書付女眞使令齋以賜之端拱二年其王子因女眞使附獻馬雕羽鳴鏑淳  
化二年其王子太元女眞使上表其後不復至外國  
列傳

### 右安定國

渤海本高麗之別種唐高宗平高麗徙其人居中國宋太宗太平興國四年太宗平晉陽移兵幽州

其酋帥大蠻河率小校李勛等十六人部族二百騎來降以蠻河爲渤海都指揮使六年賜烏舍城浮渝府渤海瑛府王諭旨九年春宴大明殿因召大蠻河慰撫久之上謂殿前都校劉延翰曰蠻河渤海豪帥束身歸我嘉其忠順夫夷落之俗以馳騁爲樂候高秋戒候當與駿馬數十匹令出郊遊獵以遂其性因以緡錢十萬并酒賜之

外國列傳

### 右渤海國

日本國者本倭奴國也自以其國近日所出故以日本爲名或云惡其舊名而改之其地東西南北各數千里西南至海東北隅隔以大山山外卽毛國自後漢始朝貢

外國列傳

雍熙元年本國僧裔然與其徒五人浮海而至獻銅器十餘事并本國職員今年代紀各一卷裔然衣緣自云姓滕原氏父爲眞連眞連其國五品官也裔然善隸書而不通華言問其風土但書以對上召見存尉甚厚賜紫衣上聞其國王一姓傳繼臣下皆世官因謂宰相曰此島夷耳乃世祚遐遠其臣亦繼襲不絕蓋古之道也中國唐季寓縣分割梁周五代享歷尤促大臣世胄鮮能嗣續可歎也其國多中國典籍裔然之來復得孝經一卷越王孝經新義第十五卷皆金縷紅羅縹水晶爲軸孝經卽鄭氏註者越王乃唐太宗子越王貞新義者記室參軍任希古等撰也裔然又求印本大藏經詔給之元二年在台州寧海縣商人船歸其國後數年遣弟子奉表來謝又別啟貢佛經及方物裔然書曰國中有五經書及佛經白居易集七十卷並得自中國土宜五穀而少麥交易用銅錢

文曰乾文大寶畜有水牛驢羊多犀象產絲蠶多織絹薄縠可愛樂有中國高麗一部四時寒暑大類中國國之東境接海島夷人所居身面皆有毛東奧州產黃金西別島出白銀以爲貢賦國王以王爲姓傳襲至今王六十四世文武僚吏皆世官咸平五年建州海賈周世昌遭風飄至日本凡七年得還與其國人滕木吉至上皆召見之世昌以國人唱和詩來上其詞雕刻膚淺無取後賜裝錢遣還景德元年其國僧寂照八人來朝寂照不曉華言而識文字繕寫甚妙凡問答並以筆札詔號圓通大師賜紫方袍天聖四年明州言日本國太宣府遣人貢方物而不持本國表詔卻之其後亦未通朝貢南貢時有傳其物貨至中國者熙寧五年有僧誠尋至台州止天台國清寺願留州以聞詔使赴闕誠尋獻銀香爐木櫨子白琉璃五香水精紫檀琥珀所飾念珠及青色織物綾神宗以其遠人而有戒業處之開寶寺盡賜回來僧紫方袍是後連貢方物而來者皆僧也元豐元年使通事僧仲回來賜號慕化懷德大師明州又年得其國大宰府牒因使人孫忠還遣仲回等貢色段二百匹水銀五千兩州以孫忠乃泛海客商而貢禮與諸國異請自移牒報而答其物直付仲回東歸從之乾道五年附明州綱首進貢方物淳熙二年其國人泛海遭風飄至明州無口食詔給之又有百人行丐於市至臨安詔守臣支給津遣往明州養贍候有便船發回本國十年七十三人飄至秀州華亭紹熙元年飄至泰州詔見行貨物免抽買船隻物件盡數給還仍給常平米賑恤慶元六年至至江嘉泰二年至定海縣詔並支給錢米養贍候風便津發回國

右日本國

党項古析支之地漢西羌之別種後周世始強盛有細風氏費聽氏往利氏頗超氏野亂氏房當氏

來禽氏招拔氏最爲強族

外國列傳

建隆二年代州刺史折也埋來朝也埋黨項之大姓也世居河右有捍邊之功故授以方州召令入覲而遣還開寶元年直蕩族首領啜侏等引并人入寇府州爲王師所敗招降之太平興國六年七年府州豐州黨項族首領俱來貢雍熙初諸族渠帥附李繼遷爲寇詔判四方館事田仁節及閻門使王侁等相繼領兵討擊并賜麟府夏寧豐州及日利月利族敕書招諭之二年四月侁等於銀州北破悉利諸族斬首二千六百餘級生擒八十人俘蕃漢老小一千四百餘口器甲一百八十六鳥僞署代州刺史折羅遇并弟埋乞獲馬牛羊三萬計五月又於開光谷西杏子平破保寺保杏族追奔二千餘里斬首八百餘級梟其首領也埋已等五十七人生擒四十九人係其老小三百餘人獲牛羊馬驢凡四千餘計又破保洗兩族俘三千人降五十五族獲牛羊八千計侁等麟州及二族寨羌人二千餘族皆降番官折軍也等六十四人獻馬首罪願改圖自效爲國討賊遂與部下兵濁輪川斬賊首五十級酋豪二十人李繼遷及二族寨監押折御也皆遁去命內客省使郭守文自二交乘驛亟往與王侁等同領邊事其後侁等又破銀州浪悉訛等族及夏州岌伽羅賦等族又招降銀麟夏等州二族寨諸番一百二十五族合萬六千一百八十九戶乃賜勅書以安撫之端拱二年夏

三四頁之通正史考卷之九  
卷一百一十三  
州趙忠言準詔市馬已獲二百匹其有州御泥布等族黨附繼邊不肯賣馬臣已領兵掩殺二百餘人擒百餘人其族卽降詔書撫諭之四年鄭文寶獻議禁青鹽蕃族四十四首領引騎萬二千人入寇環州石昌鎮知環州程德言等擊走之因詔弛鹽禁田是部族寧息自是朝貢不絕官其首領賜錦袍銀帶茶綵以撫慰之景德元年麟府路言附契丹戎人言泥族拔黃太尉率三百餘帳內屬拔黃本大族居黃河北古豐州前數犯邊阻市馬之路其首領勇黠難制契丹結之署爲太尉令悉眾款塞詔府州厚賜茶綵給八田依險居之計口賦粟毋得侵擾三年府州折堆昌言元泥族大首領名崖從父盛佑族爲趙德明白池軍主密遣使來諭名崖云德明雖外託修貢之名而黠閱兵馬尤急恐必劫掠山名崖以告界上嘉之降詔撫諭就賜錦袍銀帶十一月鎮戎軍曹瑋言叛去蕃官蘇尙娘復來歸附詔報瑋曰尙娘反覆無信特恐狙詐以誤邊吏又使德明緣此爲詞不可納也自後訖天禧之末蕃族來歸朝貢者不絕每加拊慰或補官賜器幣羈縻之恩有加焉

通考四  
裔考

### 右党項國

吐蕃本漢西羌之地其種落莫知所出或云南涼秀髮利鹿孤之後其子孫以禿髮爲國號語訛故

謂之吐蕃

外國  
列傳

建隆二年靈武五蕃以蒙駝良馬致貢來離等八族蕃越寇護送入界書救獎諭又賜秦州首領尙波于錦袍銀帶尙波于感悅咸平元年十一月河西軍左廂副使歸德將軍折迪游龍鉢來朝龍鉢

四世受命爲酋雖貢方物未嘗自行今始至獻馬二千餘匹河西軍節古涼州東至故原州千五百里南至雪山土谷運蘭州界三百五十里西至甘州同城界六百里北至部落三百里周迴平州二千里舊領姑臧神烏蕃禾昌松嘉麟五縣戶一萬五千六百九十三口十二萬八千一百九十二今有漢民三百戶城周迴五十里如鳳形相傳李軌舊治也皆龍鉢自述云詔以龍鉢爲安遠大將軍三年以儀州延蒙八部都首領渴哥領化州刺史首領透通等爲懷化郎將四年知鎮戎軍李繼和言西涼府六谷都首領潘羅支願戮力討繼遷請授以刺史仍給廩祿羅支貢馬五千匹詔厚給馬價別賜茶絲六年原渭蕃郎二十二族納質來歸羅支又遣蕃吳福聖駕來貢表言感朝廷恩信憤繼遷倔強已集騎兵六萬乞會王師收復靈州乃以羅支爲朔方軍節度靈州西面都巡檢使賜以鎧甲器幣又以吳福聖服爲定遠將軍次首領兀佐等七人爲懷化將軍景德元年二月羅支遣其甥厮陶完來獻捷六月又遣其兄邦通支入奏且欲更率部族及回鶻精兵直抵賀蘭山討除殘孽願發大軍援助卽詔涇原部署陳興等俟羅支以養兵馬率衆鼓行赴石門策應邦通支又言前賜羅支牌印官誥衣服器械爲遷賊劫掠有詔別給羅支又言修洪元大雲寺詔賜金箔物絲先是繼遷種落迷般囉及日通吉羅丹二族亡歸者龍旗而欲陰圖羅支是月會遷黨攻者龍羅支率百餘騎急赴將議合擊遂爲一族戕於帳詔贈羅支武威郡王遣使贈卹其家諸豪議以羅支弟厮鐸督爲首領詔授鐸督鹽州防禦使靈州西面沿邊都大巡檢使上以遷黨未平藉其腹背攻刺遂加鐸



督朔方軍節度押蕃落等使右隰州言河西諸蕃四十五族內附其年遷黨寇永寧塞爲藥令合蘇擊而敗之斬首百餘級三年廝鐸督遣使入貢仍上與趙德明戰鬪功狀詔嘉獎之加檢校太傅渭州言妙娥延家熟魏等族率三千餘帳萬七千餘口及羊馬數萬款塞內附詔遣使撫勞之賜以袍帶茶綵仍以折平族首領撤通渴爲順州刺史充本族都軍主是年宗家當宗章迷族來貢移通撈父族歸附九月詔釋西面納質戎人先是諸蕃有鈔劫爲惡嘗經和斷者恐異時復叛故收其子弟爲質乃有蔡錮終身者上憫而縱之族感恩皆稽首誓不爲邊患四年邊臣言趙德明謀劫西涼襲回鶻上以六谷甘州久推忠順思撫寧之乃遣使諭廝鐸督令援結回國爲備并賜鐸督茶藥纓衣金帶及部落物有差鐸督奉表謝七年知秦州張佶直大路門親塞先是佶欲近渭置採木場蕃族聞之卽徙帳去佶不能遂撫之戎人輒悔因鄉導鈔劫佶入掩擊之悉敗走至是求和佶不許時宗哥立遵鳴廝羅搆通等哥帳族甚盛勝悉六七萬與趙德明抗敵希望朝廷恩命佶奏請拒絕涇原鈐轄曹瑋又言宜厚鳴廝囉以扼德明八年會廝囉遣使來貢詔賜錦袍金帶器幣供帳什物茶藥有差凡中金七千兩他物稱是其年鳴廝囉宗哥文法聚衆數十萬討平夏以自效上以爲戎人多詐慮援急侵寇及擾熟戶卽命周文質監涇原軍曹瑋知秦州兩沿邊安撫使路以備之宗哥城東南至永寧寨九百一十五里東北至西涼府五百里西北至甘州五百里東至蘭州二百里南至河州四百一十五里又東至龕谷五百五十里又西南至青海四百里又東至新渭州千八百九

十里九年廝囉立遵等獻馬五百八十二匹詔賜幣總萬二千計以答之是年以宗哥族李遵爲保順軍節度賜襲衣金帶器幣遵一名郢成佐唃廝囉甚有威名性貪忍其下怨而懼之屢表求贊普號朝廷以爲贊普戎王也遵居廝囉下不應忘授乃用廝鐸恩例焉其後或比歲或閒歲朝貢不絕李遵或曰李立遵爲論逋佐唃廝囉論逋者相也立遵貪且喜殺戮國人不附其後舉兵與瑋戰三都谷不勝又襲西涼爲所敗廝囉遂與立遵不協更徙遼川以溫通奇爲論逋數使人至秦州來內屬明道初卽授廝囉寧遠大將軍愛州團練使授逋奇歸化將軍已而逋奇爲亂囚廝囉置奔中出收不附己者守穿人開出之廝囉集兵殺逋奇徙居青唐景祐中以廝囉爲保順軍節度觀察留後歲以奉錢令秦州就賜元昊始強侵掠其界兵臨河湟廝囉知衆寡不敵壁鄯州不出陰聞元昊頗得虛實其元昊已度河插幟志其淺廝囉潛使人移植深處以誤元昊及大戰元昊潰而歸士視幟渡溺死者十八九所鹵獲甚衆自是數以奇計破元昊元昊遂不敢窺其境及元昊取西涼府潘羅支舊部往往歸廝囉又得回紇種人數萬廝囉居鄯州西有臨國城通青海高昌諸國蕃商皆趨鄯州貿易以故富強寶元元年加保順軍節度使仍兼遼川大首領時以元昊反遣左侍祭魯經持詔諭廝囉使背擊元昊以披其勢賜帛一萬正經還以勞擢閣門祇候廝囉奉詔出兵四萬五千向西涼西涼有備廝囉知不可攻捕殺遊邏數十人亟遣聲言圖再舉元昊旣屢寇邊仁宗召對魯經欲再遣經固辭貶經爲左班闕直某敢使者屯田員外郎劉渙應詔渙至廝囉迎導供帳甚厚介騎士

爲先驅引渙至庭廡囉冠紫羅襪冠腹金線花袍黃金帶絲履並揖不拜延坐勞問稱阿舅天子安  
否道舊事則數十二辰屬曰兔年如此馬年如此云渙傳詔以廝囉召酋豪大犒約盡力無身然終  
不能有大功後累加恩兼保順河西節度使洮涼兩州刺史又加階勳檢校官功臣食邑賜器幣鞍  
勒馬嘉祐三年擦羅部阿作等叛廝囉歸諒祚諒祚乘此引兵攻掠境上廝囉與戰敗之丁酉一六  
人收橐駝戰馬頗衆因降隴通立功馬波三大族會契丹遣使送女妻其少子董穗乃罷兵歸治平  
二年夏羌邈奔及阿叔溪心以隴珠珂諾三城叛諒祚歸廝囉廝囉不禮乃復歸諒祚請兵還取所  
獻地諒祚以兵隨之不能克但收邈川歸丁家五百餘帳而還廝囉其年十月二日卒以三年五月  
二日葬年六十九董穗嗣廝囉三妻生董穗者曰喬氏其一妻李立遵女生瞎穗及磨穗角立遵死  
李氏寵衰斥爲尼置廓州錮其子瞎穗磨穗角結母黨李巴全竊載其母奔宗哥廝囉不能制其磨  
穗角因有其衆李氏以寶元二年恩賜紫衣磨穗角亦累奉貢初補嚴州團練使以思州團練使卒  
所部立其子瞎撒欺丁李氏懼孤弱不能守乃獻皮帛入庫廩文籍於廝囉廝囉因受之嘉祐三年  
命欺丁爲順州刺史瞎穗居龜谷屢通貢授澄州團練使先卒子木征不能自立青唐於酋瞎藥雞  
囉及僧遵鹿迎居洮州欲立以服洮岷疊宕武勝軍諸羌秦州以其近邊逐之乃還河州後徙安江  
城董穗雖羈屬之不能有也母弟瞎吳叱居銀川是家山至和二年補本族副軍主於是唃氏地分  
爲二董穗居青唐獨有河北之地然最強其國大抵吐蕃遺俗懷恩重財貨無正朔市易用五穀

乳香硃砂罽毼馬牛以代錢帛用虎豹皮緣衣裘尊釋氏不知醫藥疾病召巫覡視之焚柴聲鼓謂之逐鬼信咀咒或以訣事訟有疑使咀之訟者上辭牘藉之以帛事重則以錦亦有鞭笞桎械諸獄其人喜啖生物無蔬茹醃醬獨知用鹽爲滋味而嗜酒及茶居板屋富室以氍爲幕貢獻謂之般次云神宗卽位加董種太保太傅以其子藹通叱爲錦州刺史二年夏人寇環慶董種乘虛入其境大獲賜璽書袍帶激獎之時王韶上平戎策謂國家欲平西夏當復河湟則西夏有腹背受敵之憂今古渭之西熙河隴鄯皆漢隴西等郡董種雖國其閒而不能制諸羌宜并有之以絕夏人右臂詔以韶爲秦鳳沿邊安撫使既定熙河其首領青宜結鬼章寇河州白踏城景思立死焉帝命邊臣招來之十年以鬼章及阿里骨皆爲刺史董種入貢賜以銀綵茶服改西平軍節度使元豐四年王師討夏國會其兵董種遣酋長林征尊率二萬人赴靈龍耳江及隴朱珂諾又集六部兵十二萬約以八月分三路與官軍會帝以其協濟軍威事功可紀田常樂郡公進封武威郡王鬼章阿里骨黨令支皆圍練使心牟欽種阿星李叱臘欽爲刺史夏人與之通好許割斫龍以西地云如歸我卽官爵思好一如所欲董種拒絕之訓整兵甲以俟入討且以蕃字來告神宗朝見其使使歸語董種盡心守圍每稱其上書情辭忠智雖中國士大夫存心公家者不過如此知遼川事力固不足與夏人抗但欲解散其謀使不與結和而已故終不能有大功哲宗立加檢校太尉元祐元年卒藹通叱已死養子阿里骨嗣阿里骨本于闐人少從其母給事董種故養爲子既嗣事遣使修貢元祐元年授冠

軍大將軍檢校司空河西軍節度使封宣塞郡公二年里骨逼鬼章使率眾據洮州八月鬼章就擒  
檻送京師詔赦之明年里骨奉表謝罪詔西河無復出兵許貢奉如故又加其官紹聖元年來獻獅  
子厚賜還之二年卒子瞻征嗣授以父官瞻征嗜殺部曲睽貳大酋心卒欽種之屬有異志已瞻征  
季父蘇南黨征雄勇多智共誣其謀逆瞻征不能察而殺之盡誅其黨獨錢羅結逃奔溪巴溫溪巴  
溫者董種疏族也自阿里骨之立去依隴通部河南諸鬼多歸之錢羅結奉溪巴溫長子杓椽據溪  
哥城瞻征討殺杓椽錢羅結奔河州說王瞻以取青唐之策已而溪巴溫入溪哥城自稱王子元符  
二年七月瞻取遼州八月瞻征自青唐脫身來降欽種迎溪巴溫入青唐立其子隴椽爲主八月瞻  
軍至青唐隴椽出降詔以遼川爲隴州青唐爲鄯州二酋雖然其種人本無歸漢意議者謂今不先  
修遼川以東城障而遽取青唐非計也閏九月欽種等果與青唐城中人相結謀復奪城山南諸羌  
亦叛瞻遣將破之青唐圍解而遼川益急夏人十萬助之總管王愍苦戰固守乃免瞻棄青唐歸溪  
巴溫與其子溪賒羅據之朝論請并棄遼川且謂董種無後趙懷義乃木征之子明斷囁嫡曾孫最  
爲親的於是以隴椽爲河西軍節度使知鄯州封武威郡公充西蕃都護依府州折氏例世世承襲  
尋賜姓名趙懷德以懷義爲廓州團練使同知隴州加瞻征檢校太傅懷遠軍節度使三年二月懷  
德隴椽及所降契丹夏國回鶻公主入見皆蕃服蕃拜各賜冠服退易之於邇英閣前復立班謝賜  
食於橫門徽宗命輔臣呼懷德與詔問何以招致溪巴溫對曰譬如乳牛繫其子即母須求繫其母

卽子須來至岷州當遣人往諭使之歸漢遂與瞎征俱還湟州溪賒羅撒謀襲殺懷德懷德奔河南瞎征不自安求內徙詔居鄧州崇寧元年卒三年王厚復湟都懷德至京師拜感德軍節度使封安化郡王趙思忠卽瞎征之子木征也嘉祐中卽河州刺史其後河州武勝軍諸族浸驕閉于闐諸國朝貢詔邊將問罪會王韶經略熙河詔納蕃部遣僧智緣往說之嘆以厚利因隨以兵前後殺其老弱數千焚帳房萬數得腹心首級十餘人又離其妻子皆不殺木征拒戰敗北遂以熙寧七年四月舉洮河二州來降賜今姓名拜榮州團練使建炎初錢蓋制置陝西上言青唐無毫髮之得而所費不貲請求唃氏後而立之必得其力乃以蓋爲陝西總制使持告賜趙懷德恩者董種從孫懷德之弟益麻黨征也議者以爲蕃部所推伏故賜姓名封爲隴西郡王

通考四裔考

右吐蕃國

附唃廝囉

董種

阿里骨

瞎征

趙思忠諸國



二十四史九通政典類要合編卷二百十六

宋四十

四裔

西南溪峒諸蠻 梅山峒蠻 誠徵州蠻 南丹州蠻 撫水蠻 廣源州蠻 甲洞蠻 瓊州蠻 黎峒蠻 契丹

太祖既下荆湖思得通變情習險阨勇智可任者以鎮撫之有辰州瑤人秦再雄者長七尺武健多謀在行逢時屢以戰關立功蠻黨伏之太祖召至闕下察其可用擢辰州刺史官其子爲殿直賜子甚厚仍使自辟吏屬于一州租賦再雄感恩誓死報効至州日訓練士兵得三千人皆能被甲渡水懸山飛輦穩如猿猴又選親校二十八人分使諸蠻以傳朝廷懷來之意莫不從風而靡各得降表以聞太祖大喜復召至闕面加獎激改辰州團練使又以其門客王充成爲辰州推官再雄盡瘁邊圉五州連袤數千里不增一兵不費帑庾終太祖世邊境無患

太宗雍熙元年黔南言溪峒夷獠疾病擊銅鼓沙鑼以祀神鬼詔釋其銅禁淳化二年知晃州田漢權言本管砂井步夷人粟忠獲古晃州印一鈕來獻因請命以漢權爲晃州刺史又以五溪諸州統軍鶴州刺史向通漢爲富州刺史從其請也是年荆湖轉運使言富州向萬通殺皮師勝父子七人取五藏及首以祀魔鬼朝廷以其遠俗令勿問

眞宗景德元年高州五姓義軍指揮使田文鄴來貢富州刺史向通漢遣使潭州營佛事以報朝廷存卹之惠二年夔州路降蠻首領皆自署職名請因而命之上不許第令次補牙校是歲辰州諸蠻



攻下溪州爲其刺史彭孺猛擊走之擒酋長以獻詔賜儒猛錦袍銀帶

仁宗皇祐五年邵州蠻舒光銀因湖南安撫司自陳捍禦之勞願於峒中置中勝州詔可嘉祐二年羅城峒蠻寇澧州發兵擊走之三年以施州蠻向永勝所領州爲安定州五年以邵州蠻楊光倩知徽州光倩通漢之子也通漢慶曆初嘗入貢既死光倩襲之舊制溪峒知州卒承襲者許進奉行州事撫遏蠻人及五年安撫司爲奏給敕告至是光倩行州事七年無他過故命之

哲宗元祐初傅堯俞王巖叟言沅誠州荆建以來設官屯兵布列峒縣募役人調戍兵費鉅萬公私騷然荆湖兩路爲之空竭又自廣西融州荆開道路達誠州增置潯江等堡其地無所有湖廣移賦以給一方給民不安業願斟酌廢置朝廷以沅州建置至是十五年蠻情安習已久但廢誠州爲集陽軍而沅州至今爲郡元祐諸蠻復叛朝廷方務休息痛懲邀功生事廣西張慙融州溫富坐覆殺蠻人皆實之罪詔諭湖南北及廣西路曰國家疆理四海務在柔遠頃湖廣諸蠻近漢者無所統壹因其請吏量置城邑以撫治之邊臣邀功獻議荆通融州道路侵逼峒穴致生疑懼朝廷知其無用旋即廢罷邊吏失於撫遏遂爾扇搖其叛酋楊晟臺等竝免追討諸路所開道路務置堡砦並廢巨後五溪郡縣棄而不問崇寧以來開邊拓土之議復熾於是安化上二州及思廣洞蒙光明樂安峒程大法都丹團黃光明靖州西道楊再立辰州覃都管罵等各願納土輸貢賦又令廣西招納左右江四百五十餘峒宣和中議者以爲招致熟羌接武請吏竭金帛繪絮以啗其欲捐高爵厚奉以移

其心開辟荒蕪草棚城邑張皇事勢僥倖賞恩入版圖者存虛名克府庫者亡實利不毛之地既不  
可耕狼于野心頑冥草軍建築之後西南夷獠交寇而溪峒子蠻亦復跳梁士卒死於干戈官吏沒  
於王事肝腦塗地往往有之以此知納土之議非徒無益而又害之所由生也莫若俾帥臣監司條  
具建築以來財用出入之數商較利病可省者省可併者併減戍兵漕運而夷狄可撫邊鄙可亡患  
矣乃詔悉廢所置初郡其餘諸蠻自乾興以來或叛或服其類不一各以歲月次之

高宗紹興二年臣僚言武岡軍溪峒舊嘗集人戶爲義保蓋其風土習俗服食器械悉同獠人故可  
爲疆場捍蔽雖曰籍之於官然亦未嘗遠戍靖康間調之以勤王其後湖南盜起征斂百出義保無  
復舊制困苦不勝乃舉其世業客依蠻峒聽其縣役州縣猶驗舊籍催科胥隸及門則挈家遠徙官  
失其舍蠻獠日強兼武岡所屬三縣悉爲獠人所有遠戍之實已無而鄉戶弩手之名尙在歲取其  
直人戶之怨已擇本路監司詳議以聞詔從之

宣宗嘉泰二年前知潭州湖南按撫趙彥勵上言湖南九郡皆接溪峒蠻夷叛服不常深爲邊軍制  
馭之方豈無其說臣以爲宜擇素其知勇爲獠人所信服者立爲酋長借補小官以鎮撫之況其習  
俗嗜欲悉同獠人利害情偽莫不習知故可坐而制服之也五年之間能立勞効卽與補正彼既榮  
顯其身取重瘳曲豈不自愛盡忠公家哉所謂捐虛名而收實利安邊之上策也

嘉定五年臣僚上言辰沅靖等州舊嘗募民爲弓弩手給地以耕俾爲世業邊陲獲保障之安州縣

無轉輸之費比年多故其制廢弛猶蠻因之爲亂沿邊諸郡悉受其害比申朝廷調兵招捕曠日持  
久蠻夷習玩成其猖獗之勢其如楊晟臺李全姚明教羅孟一季元礪陳廷佐之徒皆近事之明驗  
也爲今計者宜講舊制可紓饋餉之勞而得備禦之實其安邊息民之長策歟七年臣僚復上言辰  
沅靖三州之地多接溪峒其居內地者謂之省民熟戶山峒峒丁乃居外爲捍蔽其初匿處詳密立  
法行事悉有定制峒丁等皆計口給田多寡闊狹疆畔井井擅鬻者有禁私易者有罰一夫歲輸租  
三斗無他緣役故皆樂爲之用邊陲有警衆庶雲集爭負弩矢前驅出萬死不顧比年防禁日弛山  
峒峒丁得私售田田之歸於民者常賦復外輸稅公家因資之以爲利故漫不加省而山峒峒丁之  
常租仍虛掛版籍責其橫益急往往不能聊生反寄命峒人或導其入寇爲害滋甚宜勅湖廣監司  
檄諸郡俾循舊制毋廢庶邊境綏靖而遠人獲安也

以上蠻夷列傳

### 右西南溪峒諸蠻

梅山峒舊不與中國通其地東接潭南接邵其西則辰其北則鼎澧而梅山居其中開寶八年嘗寇  
邵之武岡潭之長沙太平興國二年左甲首領芭漢陽右甲首領頓漢凌寇掠邊界朝廷累遣使招  
諭不聽命客省使翟守素調潭州兵討平之自是禁不得與漢民交通其地不得耕牧後有蘇方者  
居之數侵奪舒向一族嘉祐末知益陽縣張頡收捕其桀黠符二等遂經營開拓安撫使吳中復以  
聞其議中格湖南轉運副使范子奇復奏蠻恃險爲邊患宜臣屬而郡縣之于奇尋召還又述前議

熙寧五年詔知潭州潘夙湖南轉運副使蔡燁判官喬執中同經制章惇招納之惇遣執中知全州將行而大田三砦蠻犯境又飛山之蠻近在全州之西執中至全州大田諸蠻納款於是遂檄諭開梅山蠻猛爭闢道路以待得其地東起寧鄉縣司徒嶺西抵邵陽白沙砦北界益陽四里河南止湘鄉佛子嶺籍其民得主客萬四千八百九戶萬九千八十九丁田二十六萬四百三十六畝均定其稅使歲一輸乃築武陽開峽二城詔以山地置新化縣并二城隸邵州自是鼎澧可以南至邵

蠻夷列傳

### 右梅山峒蠻

誠徽州唐溪峒州宋初楊氏居之號十洞首領以其族姓散掌州峒太平興國四年首領楊蘊始來內附五年楊通寶始入貢命爲誠州刺史淳化二年其刺史楊政巖復來貢是歲政巖卒以其子通壘繼知州事熙寧八年有楊光富者率其族姓二十二州峒歸附詔以光富爲右班殿直昌運五人補三班奉職晨情等十六人補三司將軍繼有楊昌銜者亦願罷進奉出租賦爲漢民詔補爲右班殿直子弟姪十八人補授有差獨光僭頗負固不從命詔湖南轉運使朱初平羈縻之未幾亦降元豐三年知邵州關杞請於徽誠則誠嶺擇要害地築城砦以絕邊患詔湖南安撫謝景溫轉運使朱初平判官趙揚商度以聞景溫等以爲宜如杞言乃議誠州以沅州貫保砦爲渠陽縣隸之以徽州爲時竹縣隸邵州趙揚言上江多星銅鐵羊鎮潭溪上和上城天村大田等團立至誠州城下貿易可漸招撫併乞下湖南邵州時竹竹縣招諭芙蓉萬驛諸團從之徒誠州治渠陽而貫保爲砦如故上

江等諸團果皆納土於是增築多星等若還連徹廣西融州王口砦焉元祐二年改融州爲渠陽軍罷兩州兵馬及守禦民丁有楊景臺者乘間寇文村堡知渠陽軍胡田措置亡術蠻結西融州蠻砦粟仁催往來兩路爲民患調兵屯渠陽至萬人湖南亦增屯兵應援三路俱驚朝廷方務省事議廢堡砦撤戍守而以其地予蠻乃詔湖北轉運副使李茂直招撫又遣唐又同措置邊事討之後以渠陽爲融州命光楷之子供備庫使呂遵供備庫副使楊昌等同知州事而實保豐山若水能此皆罷戍擇授土官俾又間毀樓櫓撤官舍護領居民入砦崇寧初改融州爲靖州

蠻夷列傳

### 右誠徽州蠻

南丹州蠻亦溪洞之種其地與宜州接宋開寶七年西帥莫洪普遣使奉表求內附九年復來貢求賜牌印詔刻印以給之太平興國五年貢銀百兩賀平太原雍熙四年洪普族人莫淮闖以河池縣知縣余承鑿取其牛怒而劫掠誘羣蠻爲寇詔誅承鑿以知宜州侯汀失於備禦免官發諸州兵進討未至而蠻已遁詔拊諭之自是不復寇淳化元年洪普卒其子洪皓襲稱刺史遣使入貢上降優詔賜綵自洪普領州十餘年歲輸白金百兩洪皓襲兄位專地利不修常貢其弟洪玩忿之乏甚挈妻子來奔宜州洪皓數引兵攻洪玩乃乘傳詣闕訴其事請發兵致討上以其蠻夷但羈縻而已不欲爲之興師報怨洪玩先自稱南丹州副使以爲邵州團練副使給田十頃下詔戒飭洪皓景德二年洪皓死長子淮勅襲父任俄爲其弟淮迪所逐遂以淮迪知南丹州淮勅帥屬來奔詔宜州賜閑

田資給之大中祥符九年討撫水蠻詔淮迪約勒溪峒勿從誘脅明年平撫水蠻淮迪等以勞進秩景祐二年淮迪老自言願傳其子世漸至和元年命世漸爲檢校散騎常侍權務遣州事明年以淮迪爲儀遠大將軍致仕世漸爲刺史檢校工部尚書賜袍帶錢十萬緡百疋又補其親黨數十人爲檢校官如故事也世漸死嘉祐末命其子公帳襲之有世忍者亦淮迪子也初率其屬人內附治平初逃歸攻殺公帳奪其地自守請於朝廷願授刺史補其親黨如故事歲輸銀百兩二年遂命爲刺史皆如其請熙寧二年授世忍檢校禮部尚書元豐三年八月其印以西南諸道武盛軍德政官家夫國王爲文詔以南丹州印賜之令毀其舊印六年遷檢校戶部尚書官其子姓九人世忍死子公佺襲大觀元年廣西經略使王祖道言公佺就擒進築平允從州收文地蘭那安外智南丹八州之地併爲鎮庭李觀州延德軍以其弟公晟襲刺史宣和四年公晟乞以州事傳其姪廷豐願與其子歸朝詔從之仍乘驛給券紹興三年廣西經略安撫劉亮適言南丹州莫公晟領賊圍打觀州燒毀寶積監宰臣朱勝非奏此皆是大觀及宣和以來所開新邊近來往往棄而不守如觀州屢下本路帥臣監司相度皆以爲所據控扼不宜棄之上曰前日用事之臣貪功生事公爲欺罔其實勞民費財使遠俗不安也

石湖范氏桂海虞衡志曰南丹在宜州西境地產奇材異藥惡獸毒虺其人剽悍以勁木爲弩聚毒傳矢中人立死宜之高峯寨古觀州也與南丹接壤地勢極高南丹對境亦高一壘矢可相及

南丹曰通市於高峯少不如意則怨毒思亂其酋莫氏聞朝命爲刺史月支鹽料及守臣供給錢百五十千比內郡自號莫大王聞入宜州則禮之以列郡來已數十年矣其說以爲宜州徵外西原黃洞武陽羣小蠻卽唐黃家賊之地崇建丹使控之制然莫氏家人亦時自相攻剽今刺史莫延甚逐其弟延廩而自立延廩奉朝廷謂之出宋

凡州洞歸朝皆稱出宋

延甚淫酷不能服其類隣永樂州

王氏與爲仇歲相攻乾道丁亥與王氏戰敗告急於帥司帥司遣官爲和解永樂益涪勵有勝兵萬人志滅莫氏延甚乃益驕不奉法至私刻經略安撫司及宜州溪洞司印效帥守花書行移以嚇諸蕃落己丑歲自言州去產馬蠻不遠願與國買馬乞於宜州置場意欲藉朝廷任使威制永樂邊將常恭與交通至爲代作奏章至闕下不經由帥司樞密院是其說差官置司宜州余論奏宜州密邇內地無故通道諸蠻且關邊隙不敢奉詔且自行在所捕得常恭因而劾奏其事朝廷大悟削籍竄之九江永不放還外有省民冒法商販入南丹受其帖牒至內地幹事者多桂之興安人余亦物色得其渠送獄論如法南丹稍蠻

以上通考四夷考

### 右南丹州蠻

撫水蠻在宜州南有縣四曰撫水曰京水曰多建曰古勞唐隸黔南其酋皆蒙姓同出有上中下三房民則有區廖潘吳四姓亦種水田采魚其保聚山險者雖畬田收穀粟甚少但以藥箭射生取鳥獸盡卽徙他處無羊馬桑柘地曰掃洞五十里至前村川原稍平合五百餘家次龍江居種稻似湖

湘中有樓屋戰棚倚以竹柵卽其酋所居兵器有環刀標牌木弩善爲藥箭中者大呼信宿死得邑藥解之卽活宋雍熙中數寇邊境掠取民口畜產詔書招安補其酋蒙令地殿直蒙令札奉職後至咸平中又數爲寇盜上令邊臣驅逐出境其黨狡獪者凡二千餘人宜州守將因擒送闕下上召見詰責之對曰臣等蠻陬小民爲飢寒所迫耳上顧謂左右曰昨不欲盡令殺戮顧無噍類矣因釋罪賜錦袍冠帶銀綵戒勛遣還逾年酋長蒙項等六十五人詣闕納器甲百七十事又蒙漢誠紫度璋蒙損來朝上器甲數百及毒箭藥誓不驩邊比歲皆遣使來貢及輸兵器乃授漢誠官賜物有差旣而侵軼如故大中祥符九年數寇宜融州界詔以知宜州董元已不善撫綏黜之仍行招撫羣蠻拒命侵掠不已乃命平州刺史曹克明領兵討之傷殺甚眾蠻逃竄窮蹙酋蒙承貴等面縛詣軍自首悉還所掠漢口資畜歆血立誓不敢復叛乃還師詔以撫水州爲安化州撫水縣爲歸仁縣京水縣爲長寧縣自是閒歲朝貢不復爲邊患寶元元年寇宜融等州發兵討之踰年乃定慶厯嘉祐間再入貢其後首領月赴宜州參謁及賀巨板每歲州四管犒及三歲聽輸所貢兵械於思立寨以其直償之遞以官資遷補熙寧初知宜州錢師孟等擅裁損侵削之土人羅世念等聚眾爲亂攻殺之官詔遣兵討之未入境明年世念等率其徒來降各拜官崇寧三年復嘯聚爲寇經畧司遣兵擊卻之大觀二年以三州一鎮戶口六萬一千來上詔知融州程鄰往黔南路撫諭官吏推恩有差紹興二年蠻酋蒙全劍等寇掠省地詔帥司討平之二十九年詔加安化上州蒙自臨等七人官勳及賜



錢帛有差孝中忠清熙十一年以知宜州馬寧祖滅刻蠻人生料錢鹽致令犯邊降一官十二年廣西  
經略司言蠻人出犯省地多用強弩藥箭本路造木弩五十架給付兩路踏射并造藥箭備用詔常  
如閱習

石湖范氏桂海虞衡志曰安化州最驚悍在宜州西境官月給生料鹽以拊之猶曰侵省地以耕  
民不敢與爭州亦不敢禁頃有凌羅二將者建炎間嘗率峒兵出勤王賊曹成人廣西建大旗賊  
一入二人遣健兵侏儒者數十輩截髮爲牧童候成兵過自牛背曠弩以毒矢射之中者立死成  
驚懼遁去時盜滿四方廣西獨晏然者一將之力也至今萬人稱之子孫有仕於州縣者以上通志  
四夷考

### 右撫水蠻

廣源州蠻儂氏州在邕州西南鬱江之源地峭絕深阻產黃金丹砂頗有邑居聚落俗椎髻左衽善  
戰鬪輕死好亂其先韋氏黃氏周氏儂氏爲首領互相劫掠初有儂全福者知儂猶州其弟有祿知  
萬滙州全福妻弟儂當道知武勒州一日全福殺存祿當道并有其地交趾怒舉兵執全福及其子  
智聰以歸其妻阿儂本左江武勒族也轉至儂猶州全福納之全福見執阿儂遂嫁商人生子名智  
高智高生十二年殺其父商人曰天下豈有二父耶因冒儂姓與其母奔雷火洞其母又嫁特磨道  
儂夏卿久之智高復與其母出據儂猶州建國曰大厯交趾攻拔儂猶州執智高釋其罪使知廣源  
州又以雷火頻婆四洞及思滙州附益之居四年內怨家仇讎據安德州僭稱南天國改年景瑞皇

祐元年寇邕州明年交阯發兵討之討克廣西轉運司蕭固遣邕州指使开贊往刺候而贊擅發兵  
攻智高爲所執因問中國虛實贊頗爲陳大略說智高內屬乃遣贊還奉表請歲貢方物未聽又以  
馴象金銀來獻朝廷以其後屬交阯拒之後復齎金函書以請知邕州陳珙上聞不報智高既不得  
請又與交阯爲仇且擅山澤之利遂招納亡命數出敝衣易穀食糶言洞中飢部落離散邕州信其  
微弱不設備也乃與廣州進士黃瓊黃師必及其黨儂建侯儂志忠等日夜謀入寇一夕焚其巢穴  
約其衆曰平生積聚今爲天火焚無以爲生許窮矣當拔邕州據廣州以自王否則兵死四年四月  
率衆五千沿鬱江東下攻破橫山砦遂破邕州於是智高僧號仁惠皇帝改年啓歷赦境內師必以  
下皆稱中國官名是時天下久安嶺南州縣無備一旦兵起倉卒不知所爲守將多棄城遁故智高  
所嚮得志相繼破橫貴巖潯藤梧封康端九州害曹觀于封州趙師旦馬貴于康州餘殺官吏奪其衆  
所過焚府庫進圍廣州初智高將至守將仲簡不許民入保城中民不得入者皆附智高智高勢益  
張南土騷然仁宗以爲憂命狄青爲宣撫使諸將皆受青節制曙恐青至有功亟挑戰故敗五年正  
月青及汚靖會兵賓州官軍士丁合二萬一千餘人按軍法誅曙及指揮使袁用等三十一人于坐  
一軍大振於是進兵青將前陣汚靖將後陣以一晝夜絕崑崙關歸仁鋪智高聞王師絕險  
而至出其不意衆來拒執大盾標槍衣絳衣望之如火青陣少却先鋒孫節死之青起麾蕃落騎  
兵張左右翼出其後交擊左者右右者左已而左者復左右者復右其衆不知所爲大敗走會日暮

智高復趨邕州夜焚城通由合江口入大理國得屍五千二百四十一築爲京觀所掠生口萬餘人復其業獲僞印九黃師必而下僞官五十七人梟其首城上敗馬牛金帛以鉅萬幾計高自起兵幾一年暴踐一方如行無人之境吏民不勝其毒朝廷乃下赦令優除復慰拊瘡痍百姓始得更生云先是謠言農家種羅家收已而智高叛爲青破皆如其謠智高母阿儂有計謀智高攻陷城邑多用其策僭號皇太后性慘毒嗜小兒肉母食必殺小兒智高敗走阿儂入保特磨依其夫儂夏卿收殘衆得三千餘人智騎戰復欲入寇至和初余靖督部吏黃汾黃獻珪石鑑進士吳舜舉發峒兵入特磨掩襲之獲阿儂及智高弟至光子繼宗繼封樞至京師初未欲殺日給食飲欲以誘出智高或傳智高死乃悉棄市旣而西川復奏智高未死謀寇黎雅州詔本路爲備御史中丞孫抃乃請勅益州先事經制以安蜀人然智高卒不出其存亡莫可知也

蠻夷列傳

### 右廣源州蠻

有甲峒蠻者亦役屬交阯閒出寇邕州景祐二年嘗掠思陵州憑祥峒生口殺登龍鎮將而去嘉祐五年合交阯門州等蠻五千餘人復爲寇與官兵拒戰斬首數百詔知桂州蕭固趨邕州發諸郡兵與轉運使宋咸提點刑獄李師中合議追討是歲數入寇又詔安撫使余靖擊之蘇茂州蠻亦近邕州至和嘉祐中皆嘗擾邊

蠻夷列傳

### 右甲峒蠻

環州蠻區氏州隸宜州羈縻領思恩都臺一縣有區希範者思恩人也狡黠頗知書嘗舉進士試禮

部景祐五年與其叔正辭應募從官軍討安化州叛蠻既而希範擊登聞鼓求錄用事下宜州而知

州馮伸己言其妄編管全州正辭亦嘗自言功不報二人皆歛望希範後輒遁歸與正辭率其族人

及白崖山酋蒙趕荔波峒蠻謀爲亂將殺伸己且曰若得廣西一方當建爲大唐國會自日者石太

清至因使之筮太清曰君貴不過封侯乃令太清釋日殺牛建壇場祭天神推蒙趕爲帝正辭爲奉

天開基建國柱王希範爲神武定國令公桂州牧皆北嚮再拜以爲受天命又以區不績爲宰相餘

皆僞立名號補置四十餘人慶曆四年正月十二日率衆五百破環州劫州印焚其積聚以環州爲

武城軍又破帶溪砦下鎮靈州及普義砦有衆一千五百宜州捉賊李德用出韓婆嶺擊卻之前後

斬獲其衆俘偏將一希範懼入保荔波峒間出拒官軍朝廷下詔贖之獲希範正辭及趕者大賜袍

帶錢二十萬鹽千斤明年轉運使杜杞大引兵至環州使攝官區暉進士曾子華宜州校吳香誘趕

等出降殺馬牛具酒給與之盟置曼陀羅花酒中飲者皆昏醉稍呼起問勞至則推仆後廡下比暮

衆始覺驚走而門有守兵不得出悉擒之後數日又得希範等凡獲二百餘人誅七十八人餘皆配

徙仍醢希範賜諸溪峒績其五藏爲圖傳於世餘黨悉平鎮靈州亦隸宜州景祐三年蠻酋莫陵等

七百餘人內寇遣西京作坊使郭志高閣門祇候梁紹熙往討未至陵等詣桂宜州巡檢李仲政請

降廣西轉運使不俟詔皆其罪詔勅之已而釋之是歲高靈州狄獠陳友朋等亦寇海上本路會兵

擊之潰去

蠻夷列傳

右瓊州蠻

黎峒唐故瓊管之地在大海南距雷州泛海一日而至其地有黎母山黎人居焉舊說五嶺之南人雜夷獠珠崖環海豪富兼并役屬貧弱婦人服總纒績木皮爲布陶土爲釜器瓠瓢人飲石汁又用有椒酒以安石榴花著甕中卽成酒俗呼山嶺爲黎居其閒者號人黎人弓刀未嘗去手弓以竹爲弦今儋崖萬安皆與黎爲境其服屬州者爲熟黎其居山峒無征徭者爲生黎時出與郡人互市宋至和初有黎人符護者邊吏嘗護其奴婢十人還之符護亦嘗犯邊執瓊崖州巡檢慕容允則及軍士至是以軍士五十六人與允則來歸允則道病死詔軍士至是皆其罪紹興三十二年廣西運判鄧酢言黎州王文滿結連西峒王承聞等攻破定南寨後復犯省地遂分遣官燒蕩巢穴生擒黎賊王用賓等詔令廣西諸司撫存歸業人戶乾道二年廣西經略轉運使言欲下瓊管及三軍守倅措置說論黎人示以朝廷得意威命使之自省退復省地能說論收復者量功立賞任內有侵犯省地或逃失省民亦重責罰其先省民逃居黎峒之人守臣招誘復鄉闕其通稅詔從之六年黎人王用休犯邊萬安權守巡檢孫滋等招諭之遂定九年樂昌縣黎賊劫省民焚官舍瓊管安撫請於朝黎人王用存王承福陳顏等招降復寨有功借補官資彈壓邊面義兵統制黃文廣屢戰有功竝欲推賞以澄邁縣巡檢權移駐劄樂昌縣控制黎人其省民久陷歸業蠲賦已責從之淳熙元年詔承節

王日存等許子孫承襲以瓊州言其祖父居蔭元係入貢又自言和以來能撫諭諸黎羣屢有勞也八年六月瓊管司言承襲宜人三十六峒統領王氏稱其祖本化外州皇祐熙寧間歸順彈壓三十六峒捍禦隘口正係瓊管咽喉之地三世受朝廷告命至母黃氏承襲彈壓邊界用宣紹興間又說論化外黎人各安生業莫肯從亂乾道七年受告封宜人今年老無男有一女欲依例承襲詔王氏襲其後又以王氏之姓黃間補官守寨彈壓黎峒嘉定九年詔復許宜人王氏吳氏承襲

通考四夷考

### 右黎峒蠻

太祖皇帝受命務保境息民不欲生事夷狄先是五代募民盜戎人馬給其直籍數以補戰騎之闕上乃令盡還所盜馬仍禁民毋得出塞外盜者未幾虜衆入寇棣州刺史何繼筠擊敗之獲馬四百匹乾德二年命昭義軍節度李繼勳攻遼州州將杜延翰以城降虜寇平晉軍三年四年俱寇易州開寶二年車駕征河東虜兩道率衆來援何繼筠韓重贊等取其師是秋涿州刺史許用瓊來降以爲左羽林將軍仍領涿州豐州刺史王重安上言契丹日利月利等部凡一十六族歸款照官其首領是歲述律爲帳下所殺國人立兀欲之子明記號明照王子稱天贊皇帝改元保寧二年六月虜六萬騎寇定州遣判四方館事田欽祚領兵三千人赴之上謂欽祚曰彼衆我寡但背城列陣以待之虜至卽戰勿與追逐欽祚與虜戰滿城虜騎小卻乘勝逐北至遂城殺獲其衆值暮夜入保遂城虜圍欽祚數日欽祚度城中糧少整衆開南門突圍一角出是夕至保塞軍軍中不亡一矢北邊傳

言三千打六萬太祖自是益修邊備嘗謂左右曰若虜敢犯邊我以二千四匹緡購一胡人首其精  
兵不過十萬人止費我二百萬匹緡此虜盡矣 太宗咸平六年七月僞供奉官李信來降言國中  
事云明記四子長卽隆緒次隆慶隆裕幼鄭哥早亡國中所謂幽州漢兵謂之神武控鶴羽林曉武  
等約萬八千餘曉其僞署將帥契丹九女奚南北皮室當直舍利及八部落舍利山後四鎮諸軍約  
十萬八千餘騎內五千六百餘常衛戎主九萬三千九百餘卽入寇兵也其國自幽州東行五百五  
十里至平州又五百五十里至古遼陽城卽號爲界東京者也又北京六百里至烏菴國其國用漢  
文法使印八角而圓又東南接高麗又北至女貞東臨鴨江卽新羅也大中祥符元年契丹置館於  
拒馬河北以候朝使二月戶部副使宋搏使還言契丹所居中京在幽州東北城壘庫小鮮居人夾  
道多蔽以垣牆宮中有武功殿其主居之文化殿母居之又有東掖西掖門然蕃夷性不檢每宴集  
有不拜而懈惰者一年十一月蕭氏卒遣使弔奠致贈是年其相韓德讓死德讓專政有智略契丹  
推服自蕭氏卒德讓繼死虜主閣弱隆慶尤桀黠衆心附焉其年契丹將伐高麗命所部南北大王  
皮室乙室頻畢太師奚室韋黑水女貞等賦重二千乘凡調發先下令使自辦兵器駝馬糧糗故其  
抄略所得不補所失又素境內漢口有罪者配軍爲贖民皆嗟怨十月遣使來告征高麗十一月虜  
主自遼陽親代高麗大爲高麗敗覆帳族卒乘罕有還者官屬戰沒大半乃令幽冀選士人以補其  
乏初奉使者止達幽州後署中京又置上京或西涼淀北安州炭山長泊自雄州白溝驛度河四十

里至新城縣右督亢亭之地又七十里至涿州北度涿水范水劉李河六十里至良鄉縣度盧孤河  
九十里至幽州僞號燕京子城就羅郭西南爲之正南曰啟夏門內有元和殿洪政殿東門曰宣和  
城中坊門皆有樓有閔忠寺本唐太宗爲征遼陣亡將士所造又有開泰寺魏王耶律漢寧造皆邀  
朝使遊觀城南門內有于越王廨爲宴集之所門外永平館舊名碣石館請和後易之卽桑乾河出  
北門過古長城延芳淀四十里至孫侯館後改爲望京館稍移故處望楮谷山五龍池過溫餘河大  
夏坡坡西北卽涼淀避暑之地五十里至順州東北過白嶼河北望銀冶山又有黃羅螺盤牛關山  
七十里至檀州自北漸入山五十里至金溝館川原平廣謂之金溝淀國王嘗於此過及自入山屈  
曲登陟無復里候但以馬行記曰景而約其里數過朝鯉河亦名七渡河九十里至古北口兩旁峻  
崖中有路僅容車軌口北有鋪毅弓連繩本范陽防扼奚契之所最爲隘東然幽州東趣營平州路  
甚平坦自頃犯邊多由斯出又度德勝嶺盤道數層俗名思卿嶺八十里至新館過雕窠嶺偏槍嶺  
四十里至臥如來館蓋山中有臥佛像故也過烏灤河東有灤州因河爲名又過墨斗嶺亦名度雲  
嶺長二十里許又過芹菜嶺七十里至柳河館河在館旁西北有鐵冶多渤海人所就河漉沙石居  
鍊得鐵渤海俗每歲時聚會作樂先命善歌舞者數輩前行士女相隨更相唱和回旋宛轉號曰踏  
追所居屋皆就山牆開門過松亭嶺其險峻七十里至打造部落館有蕃戶百餘編荆爲籬鑿鐵爲  
兵器東南行五十里至牛山館八十里至鹿兒峽館過蝦蟆嶺九十里至鐵漿館過石子嶺自北漸



出山七十里至富谷館居民多造車者云渤海人東望馬雲山山多鳥獸林木國主多於此打圍八  
十里至通天館二十里至中京大定府城垣庫小方圓纔四里許門但重屋無作閣之制南門曰朱  
夏門內夾道步廊多坊門又有市樓門曰天衢通闡望闕次至大同館其北正門曰陽德闡闡城內  
西南隅岡山有寺城南有園圃其射至所自過古口卽蕃境居人草庵板壁亦務耕種但有桑柘所  
種皆從壠上蓋虞吹沙所壅山中長松鬱然深谷中多燒炭爲業時見畜牧牛馬橐駝尤多青羊黃  
豕亦有挈車帳逐水草射獵食止糜粥糲糲自中京至北八十里至臨都館又四十里至窰館又七  
十里至松山館又七十里至崇信館又九十里至廣寧館又五十里至姚家館又五十里至威寧館  
又二十里度潢水石橋旁有饒州蓋唐家嘗於契丹置饒樂州也渤海人居又五十里至保和館度  
黑河七十里至宣化館又五十里至長館館西二十里許有佛寺民舍云卽祖州亦有祖山山中有  
阿保機廟所服鞞尙在長四九尺許又四十里至上京臨潢府自過崇信館契丹舊境蓋其南皆奚  
地也奚本與契丹等後爲契丹所併所在分奚契丹漢人渤海雜處之奚有六節度都省統領言語  
風俗與契丹不同嘉祐六年五月詔河北緣邊安撫禁北人捕魚於界河初界河屬我境而北人潛  
入河中捕魚採葦雄州移文涿州禁詰之契丹驅所犯人榜境上及隆緒統和二千四年亦下令禁  
約其後北人或自海口載鹽入界河涉雄霸入涿易邊吏因循不能止至趙滋守雄州遣人射殺其  
人破其舟遂嚴捕魚之禁自慶厯增歲賂契丹寢驕而貴臣杜防將死又教契丹以辯爭小事無輒

置使中國常爲我所挽則金帛時至持久之術也自此使者之來多頡頏爭禮禮邊數侵禁地又爲石牆於銀坊城以動眞定之北塞越耕薙子平夜遣人拔我宮城柳朝廷待以異類雖加錫論亦不關直取必而塘水益廣兵備甚飭矣契丹每歲上旬出行射獵凡六十日然後並獲麗河鑿冰釣魚冰泮卽縱鷹鷂以捕鶩雁夏居辰山或上徑避暑七月上旬復入山射鹿夜半令獵人吹角效鹿鳴旣集而射之賤他姓貴耶律蕭氏其官有契丹樞密院中書省行宮都總管司謂之南面以其在牙帳之南以主漢事其惕隱宗室也夷離畢參知政事也林牙翰林學士也夷離巾刺史也內外官多倣中國者其下佐吏則有倣史木古思奴古都奴古徒奴分領兵馬則有統軍侍衛控鶴司南王北王奚王府五帳分提失哥東西都省太師兵又有國舅鈐轄遙羅蒙哀諸司南北皮室二十部族節度類必里九克漢人渤海女貞五節度五治太師一百六十九百家奚凡民年十五以上五十以下皆籍爲兵將舉兵必殺灰牛白馬祠天地日及木葉山神鑄金魚符調發兵馬其捉馬及傳命有銀牌二百軍所含者遠探擱子馬以夜聽人馬之聲每其主立聚所剽人戶馬牛金帛及其下所獻生口或犯罪沒入者別爲行宮領之建州縣置官屬旣死則設大穹廬鑄金爲像朔望節辰忌日輒致祭築臺高丈餘以益焚酒食謂之燒針十宮各有民戶出兵馬阿保機曰洪義宮德光曰永興宮兀欲曰積慶宮述律曰延昌宮明記曰章敏宮突厥曰長寧宮燕燕曰崇德宮隆緒曰興聖宮隆慶曰敦睦宮隆運曰文忠王府又有四樓在上京者曰西樓木葉山曰南樓龍化州曰東樓唐州曰北樓

凡受冊積柴升其上大會蕃夷其下已乃燔柴告天而漢人不得預有護子部百人夜以五十人番直四鼓將盡歌於帳前號曰貼帳每謁拜木葉山卽射柳枝護子唱番歌前導彈胡瑟和之已事而罷三歲一試進士貢院以二寸紙書及第者姓名給之號喜帖明日舉案而出樂作及門擊鼓十二面云以發雷震自阿保機相承二百餘年盡有契丹奚渤海及幽燕雲朔故地四面與高麗安定女貞黑水灰國屋惹國破古魯阿里眉鐵離蘇羯項突厥土渾于厥哲不古等章越離喜等諸國相鄰高昌龜茲于闐大小食甘州人時以物貨至其國交易而去土宜羊馬馬庫而善走人能寒苦而眾故諸國憚之每正兵一名自備馬一匹驍鞍馬甲皮鐵視其力人鐵中丸事打草穀守營鋪家丁各一弓四箭四百長短鎗鎗鎗斧小旗鎗錘火刀石馬孟紗袋搭鈎氈傘各一糜馬繩二百尺紗一斛以九月末南來十二月退散伐桑柘園圃焚燒室屋虜掠老幼婦女所過城邑不可擊者聲言治攻具脅使自守不出每城門輒以百餘人刺候或城中突出力不敵則走還集眾兵往關號旋門兵津濟徑路皆巡視絞絡若攻城驛所掠老幼運薪土塞池壕引滿以居其後置陣必預度山水地闊狹馬五百或七百爲隊每十隊次第更進以一隊奔突哮嗽擾我軍疲困則退而飲食休息新羈者進回環不已又以草穀家丁揚塵助聲勢於其旁官軍多步兵裹糧負甲退而食息又爲所乘若累日不解則困於賊戎主則以精兵自隨命曰護駕兵馬其大略如此

通考四  
夷考